



أحمد يونس

نادر فوده 3

(النقش الملعون)



للنشر والتوزيع

المجموعة الدولية
للنشر والتوزيع



ساحر الكتب 3

النقش الماحون

رواية

أحمد يونس



للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا



دار سما للنشر والتوزيع

جمهورية مصر العربية

١٥ ش يوسف الجندي متفرع من شارع البستان - باب اللوق - القاهرة

تليفون: ٢٤٥١٧٣٠٠ - ٢٠٢٠ - ٢٠١٧١٩١٩١٠٠

emil: samanasher@yahoo.com

publishing@sama-publishing.com

الراعي الإعلامي



تصميم الغلاف : عبدالرحمن

تصميم الرسومات الداخلية : أحمد أبو النجا

التوزيع

المجموعة الدولية

للنشر والتوزيع

٨٠ ش طومان باي - الزيتون - القاهرة - جمهورية مصر العربية

تلفاكس: ٢٤٥١٨٠٦٨ - ٢٠٢٠ - ٠١٠٩٩٩٨٢٤٠

yahoo.com@emil:aldawleah_group١

التنفيذ الفني



درج

للنشر والتوزيع

ali@daraj-eg.com

نادر فوده ٣ (النقش الملعون)

أحمد يونس

الطبعة الأولى: يناير

١٤٣٩هـ - ٢٠١٨م

فهرسة أثناء النشر إعداد إدارة الشؤون الفنية

دار الكتب المصرية

يونس، أحمد

نادر فوده (النقش الملعون)

أحمد يونس - القاهرة: سما للنشر والتوزيع، ٢٠١٨

٢٢٤ ص، ١٣، ٧، ١٩، ٥/١ سم - (نادر فوده ٣ - النقش الملعون)

تدمك ٥-١٥٤-٧٨١-٩٧٧-٩٧٨

١ - القمصن العربية.

العنوان ٨١٣

رقم الإيداع: ٢٩٣٨٣/٢٠١٧

تدمك ٥-١٥٤-٧٨١-٩٧٧-٩٧٨

جميع حقوق الطبع والنشر محفوظة

لدار «سما» للنشر

يحظر طبع أو نشر أو تصوير أو تخزين أي جزء من هذا الكتاب

بأية وسيلة إلكترونية أو ميكانيكية أو بالتصوير

أو خلاف ذلك إلا بإذن كتابي من الناشر فقط.

للمزيد من الروايات والكتب الحصرية

انضموا لجرور سحر الكتب

sa7eralkutub.com

او زيارة موقعنا

لتحويلك الى الجروب اضغط هنا

لتحويلك الى الموقع اضغط هنا



ساحر الكتب

القوس الماعون

أحمد يونس

للمزيد من الروايات والكتب الحصرية
انضموا لـجروب ساحر الكتب

sa7eralkutub.com

او زيارة موقعنا



رسالة من أمي

إلى أعز الناس... إلى قلبي

إلى أطيب وأحن إنسان

دعائي لك بالنجاح ودوام الصحة والسعادة في حياتك

قلبي راضي عنك لأنك أحن ابن في الدنيا

وحبي لك ليس له حدود

بارك الله لك

ماما هدى

للمزيد من الروايات والكتب الحصرية
انضموا لجرؤب ساجر الكتب

sa7eralkutub.com

او زيارة موقعنا



إنسان

عرفت مؤخرًا قيمة حاجات كثير كنت بتعامل معاها إنها كده كده

موجودة، هتروح فين يعني؟

لكنها بمتتهى البساطة راحت!

تمسكوا بنعم الله واحمدوه عليها بجد قبل ما تبقى أطلال وذكريات

بتحلم برجوعها ولو ليوم..

الحمد لله..

احمد يونس




الفصل الأول

انتهى الدرس يا غبي

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا



للمزيد من الروايات والكتب الحصرية
انضموا لجروب ساحر الكتب

وانت بتفتح أول ورقة في هذه القصة المليئة بالأحداث؛ أحب بس
أعرفك إنك بتقرا المرحلة الثالثة لى أنا مریت به ..

حاول تقرا الأول المرحتين الأولى (الوقاد) والثانية (كساب)
عشان تفهم كويس اللي جاي ...

وافكر كمان إنى من أول مرة كتبت قولتلك إنى مش أديب ولا
روائي عظيم، أنا راجل على قدي بكتب حواديت بمر بها لى حابب
يقراها وبس .. واخذ لى بالك (وبس) ..

العمل بردو كالعادة معظمه بالعامية المصرية اللي من خلالها يعرف
اسرد حواديتي بشكل أكثر واقعية

خلينى أفكر كم بسرعة بآخر مشهد وقفنا عنده مكاملة من أختي
(أمنية) بتصرخ:

«أبوك مات ... والكل خايف يدخل عنده شكله رهيب يا
نادر الحقنا.»

وجواب قريته من (كساب) عبارة عن رسالة مربية معناها:

أبوك مات ممكن أكون أنا اللي موته ..
كل اللي حصلك ممكن جدًّا أكون أنا السبب فيه ..

حتى مش عاوز يقول بصراحة إن هو اللي عمل كل ده أو لا!!
أسلوب ملتوي من إنسان فقد كل مشاعر البنى آدمين ومبقاش
عنده هدف فى حياته غير أنه ينتقم وبس وكانت آخر كلماته ليا
«انتهى الدرس يا غبى» ..



وصلت البلد وقربت من بيتنا وكل حاجة بتعيد نفسها والتاريخ نفسه
 بيتكرر، مشهد وفاة عمي بيعيد نفسه... كراسي في الشارع قدام بيتنا،
 صوت قرآن خارج من بيتنا بصوت الشيخ (محمود خليل الحصري)
 بيأكد أن البيت ده فيه ميت.

وأنا بقدم رجل وبآخر رجل.... لحد ما ناس من اللي واقفة قدام
 البيت لمحوني؛ جم بسرعة ناحيتي واتكلموا كلهم مع بعض ومعايا:
 - حمد الله على السلامة يا نادر.

- كويس إنك متأخر تش.

- أمك رافضه أي حد يدخل على المرحوم.

- لسه قدامنا وقت على صلاة العصر.

- ادخل هدي أعصاب والدتك.

- انت مبردش ليه؟

- يا نادر مش هينفع كده.

- انت لازم تتناسك عن كده.

صرخت غصب عني: «هو في إيه، إنتوا شايفني بلطم وبقطع في

شعري!!»

اتصدموا من رد فعلي وكلهم سكتوا، انسحبت من وسطهم

واتوجهت ناحية باب البيت بتاعنا ودخلت وطلعت السلم.....



ودخلت الشقة، قابلني عم (مختار) حضني وانفجر في البكاء وأنا واقف متبلد المشاعر مبعلش أي رد فعل... اتحركت عشان أفك نفسي منه لقيته يبص لي باستغراب من فتوري معاه وهو حاضني وأنا إيديا جنبي محركتهاش!

لقيت أختي (أمنية) جت تجري عليا واترمت في حضني «بابا يا نادر بابا».... خدتها في حضني هديتها وطببت عليها.. سألتها: «ماما فين؟» قالت لي: «جوه في الأوضة مع بابا.»

سبتها وحاولت أفتح باب الأوضة مفتحش خبطت وناديت: «ماما.. ماما.. ماما..» أنا نادر يا ماما» مفيش ثانيه والباب اتفتح، وش أمي كان شارح كويس جدًّا إيه اللي هشوفه كمان ثواني.

ماما: «كنت فين؟!»
نادر: «كنت في الشغل.»
ماما: «كنت فين، وأبوك بيدفع تمن غلطاتك!!»
نادر: «غلطاتي أنا؟!»

ماما: «أيوه من أول يوم بدأت تمشي ورا السحرة والدجالين واحنا شايقين الغم بسببك، أبوك مات و بنت خالتك مخها اتلحس والله أعلم مين تاني يا نادر!»

ماما: «اكشف الغطا عن أبوك وانفرج.. ولا تحب آجي اكشفهولك أنا؟»
- اتحركت ببطء ناحية السرير وعليه الجثة المتغطية بكوفرتة...
وعقلي عمال يتخيل مليون شكل لوش أبويا...

مديت إيدي ورفعت الكوفرتة عن وشه... رميت الغطا وخطيت إيدي على بوقي عشان ما اصرخش ورجعت لورا من الصدمة.....

أبويا ملامحه كانت بشعة مرعبة لا تحتمل، عينيه مفتوحة على الآخر، وبوقه كمان مفتوح على الآخر، أما عن لون بشرة أبويا، فكان بني مليون آثار حرق وأجزاء من الجلد متشالة ولحم الوجه باين!

لكن اللحم محروق هو كمان، عينيه كانت بتبص على حاجة قدامه!

- أمني شدت باقي الغطا عن باقي جسم أبويا عشان أتفاجئ بالباقى،
أبويا إيديه كانت على صدره كأنه كان بيمنع بها شيء من إنه يقع على صدره!
وإيدين والدي محروقة هي كمان!

فقدت النطق ومش عارف أعلق بأي حرف، بحاول أهرب من نظرات أمني ليا بأي شكل...

اتحركت فتحت شباك الأوضة، ووقفت أبص على الغيطان إلي
ورا البيت..

جت ورايا وقالت لي:

أمي: «هنعمل إيه؟!»

نادر: «يعني إيه؟»

أمي: «محدث شاف أبوك غير الشيخ لظفي وعمك مختار وأمنية.»

نادر: «محدث هيشوفه تاني خلصت.»

أمي: «وبعدين.»

نادر: هنغسله وهنكفنه كويس وهندفنه علطول.»

أمي: «ولاد عمك وولاد عم أبوك بره عاوزين يدخلوا.»

نادر: «قابلوني برا وأنا داخل.»

أمي: «هنمنعهم ازاي يشوفوه!»

نادر: «هنمنعهم ولو حكمت أطردهم هطردهم.»

باب الأوضة خبط أمي سألت مين، قال أنا الشيخ لظفي..

أنا جريت فتحت الباب واترमित على كتفه وأنا إلي عيطت المرة دي..

قاللي: «اجمديا نادر الوضع صعب ولازم نخلصه بسرعة، العصر

فاضله ساعة على ما يبجي هنكون غسلناه وهنطلع على الجامع علطول.»



انضم لينا الحاج (مختار) وكان جايب أدوات الغسل.... وبدأنا
نغسل أبويا..

كنت معظم الوقت أثناء الغسل ببعد عينا عنه مش عاوز أشوفه،
وسامع الشيخ (لطفي) عمال يردد: «لا حول ولا قوة إلا بالله.» وعم
(مختار) بيعيط ويقول: «يا عيني عليك يا حبيبي.»

بصيت بطرف عيني لقيته بيص لي، عينيه جت في عينا بعد ما كان
باصص قدامه،.. باصص ليا وانا واقف جنبه! معلقتش والتزمت
الصمت.

وبدأت أسمع نداء الموت من المساجد:

«بسم الله الرحمن الرحيم

إنا لله وإنا إليه راجعون

توفي إلى رحمة الله تعالى

(نادر مصطفى عبد الرحيم فودة) والدفنة بعد صلاة العصر من

مسجد عباد الرحمن.»

وبدأ يكررها:

«بسم الله الرحمن الرحيم

إنا لله وإنا إليه راجعون

توفي إلى رحمة الله تعالى

(نادر مصطفى عبد الرحيم فودة) والدفنة بعد صلاة العصر من
مسجد عباد الرحمن.

أنا: «هو اللي أنا سمعته ده صح؟!»

مختار: «إيه البهايم دول! مين ابن ال... اللي ودى الاسم للجامع يا
شيخ لطفني.»

لطفني: «فيه إيه؟»

مختار: «أنت مش سامع! اللي بينادي بيقول إن نادر هو إلهي مات!»

«بسم الله الرحمن الرحيم

إنا لله وإنا إليه راجعون

توفي إلى رحمة الله تعالى

(نادر مصطفى عبد الرحيم فودة) والدفنة بعد صلاة العصر من
مسجد عباد الرحمن.

الشيخ (لطفني): «اطلع يا مختار بسرعة ابعت حد للجامع يصلحوا الاسم.»

مختار: «حاضر حالاً.»

خرج الحاج (مختار).

أما أنا، فمن وقت ما سمعت نداء الموت باسمي وأنا جتلي حالة من
الجمود، وفضل الشيخ (لطفي) يكلمني وأنا مبعلقش!
لحد لما فوقت وهو بيقولي: «هنكفنه ازاي وإيديه كده؟.. دي
خشبت.»

نادر: «هنلف الكفن عليها زي ما هي كده.»
لفينا نص الكفن العلوي على جسم أبويا وإيديه متخشبة على
صدره.»

وجينا عند الوش قلت له: «غطيه يا عم (لطفي) ولفه كويس مش
عاوز حد يكشفه في القبر وهم بيدفنوه.»

الشيخ (لطفي): «لا يا بني مبنعملش كده.»
قاطعته: «أكيد ميرضيش ربنا أن حد يشوف وش أبويا بالمنظر ده
ويطلعوا يتكلموا عنه!»

الشيخ (لطفي) مردش لأنه مش لاقني رديقوله، فلف وش أبويا
مرتين، خدت منه القماش ولفيت وش ودماغ أبويا يجي عشر مرات
زيادة لحد ما بقى جسم أبويا كله عبارة عن كتلة كفن أبيض زي الموميا
الفرعونية، فيها بروز واضح من عند الصدر...

بعد ما خلصنا ده، فتحت الباب وناديت على ولاد عم أبويا وولاد
عمي، ودخلوا عشان يسلموا عليه...

دخلوا ومحدث نطق، فضلوا بس يبصوا لبعض ومحدث علق،
ماعداش وقت كثير لحد لما النعش أو الخشبة زي ما بيقولو عليها عندنا
في البلد جت واتشال جثمان أبويا واتحط في النعش، وخرجنا به وسط
صرخات الستات متجهين به نحو المسجد..

كنت طالع وراهم من الأوضة لكن لفت نظري ورقه بارزة من
تحت المخدة اللي كان ابويا نايم عليها..

شديتها وقفلت الباب عليا، وفتحتها لاقيت مكتوب فيها أربع كلمات:
«انتهى الدرس يا غبي.»

صرخت بعزم ما فيا: «حرام عليك.. حرام عليك.»



للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا



الفصل الثاني

وداعاً أبي

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا



للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

طبقت الورقة ورميتها وقعدت على سرير أبويا، لاقيت صوت
ستات بتزقق وباب الأوضة اتفتح... فقومت وقفت من الصدمة..
(مروة) بنت خالتي لابسه فستان فرح وبتعيط وبتضحك في نفس
الوقت..

دخلت وقفلت الباب من جوه.

نادر: «مروة!»

مروة: «أيوه مروة الي دمرت حياتها وأبوك بوظ لها جوازها،
يرضيك كده؟ أبوك جاي يموت يوم فرحي.»

نادر: «لا مالوش حق! إنتي كتي متخيله أن (كساب) هيتجوزك
فعلاً!»

مروة: «أيوه هو وعدني بكده... أنا رايحة له أنا عملت كل اللي طلبه
مني.»

هو الي حدد معاد الجواز وكلمني النهارده الصبح قالي هستناكي
في بيت خالتك قولتلوا ازاي، قالي هصالحهم وأخلي والد نادر يوافق
على الجوازة، أنا رايح له دلوقتي هقنعه بطريقتي، مفيش ساعة خالتي
اتصلت بأمي تصوت، وتقول لها إن أبوك مات..

أبوك مات يا (نادر) و(كساب) اختفى بعدها.. أعمل فيكوا إيه أنا
بكرهكوا..

والفستان ده أوديه فين؟ يرضيك كده!»

نادر: «مروة فوقتي انتي مخك ضرب! غيري الزفت اللي لابساه ده
والبسي اسودزي الناس العاقلة!»

مروة: «لأأسود لأ أنا عروسة، أنا هتجوز النهارده وهو هيرجع....
يرجع عشان يموتك ونخلص منك زي أبوك وبعدها نتجوز.»
قومت وقفت وبعزم ما فيا اديتها قلم والتاني والتالت، وقعت
على الأرض وسبتها وفتحت الباب ودخلت خالتي (صفية) تجري،
سبتهم وخرجت متجه ناحية المسجد. وصلت كانوا لسه بيدخلوا
النقش المسجد.

العصر خلاص أذن... والناس بدأت تصلي تحية المسجد...
رجعت لورا عند نعش أبويا اللي مخطوط في آخر الجامع، ووقفت
أتأمله لاقيت صوت من ورايا يقول:

هو انتوليه اتاخرتوا في دفن عم (مصطفى)؟

قلت له: يعني ايه؟ وبصيت لاقيته حد من أهل البلد مش فاكر
اسمه بس اعرفه شكلاً.

قالي: «أصل دراعاته المتكثفه دي معناها إنه مات من مده وجسمه
مخشب.»

قلت له: «لأ هو أنا معرفش ميت بقالو أد ايه.. أنا كنت في مصر
مش في البلد وجيت حالاً.»

نودي لصلاة العصر، صلينا الفرض وكنت في أول الصفوف،
وبعدها جه وقت صلاة الجنازة..

الشيخ (لطفي) جه جنب ودني وقالي:

«لازم تقف إمام يا نادر.»

نادر: «مش هقدر.»

الشيخ لطفي: «مفيش حاجة اسمها مش هقدر... ده أبوك، فاك
صلاة الجنازة بتتصلى إزاي؟!»

نادر: «آه.. آه.. أنا نسيت كل حاجة.»

الشيخ (لطفي) بحزن شديد، لأني كنت تلميذه في يوم من الأيام:
«هتصلي وأنت واقف بأربع تكبيرات.»

التكبير الأولى - الفاتحة

التكبير الثانية - النصف الثاني من التشهد

التكبير الثالثة - الدعاء للميت

التكبير الرابعة - الدعاء لسائر الأموات ولنا

بعدها تسلم وانت واقف، مفيش ركوع ولا سجود.

نادر: «آه.. آه.. أنا عارف يا شيخ (لطفي).. افتكرت.»

ووقفت إمام وجابوا نعش أبويا وحطوه قدامي...

ووقفت وقلت للناس: «استقيموا... يرحمكم الله.» ولكن صوت

جوايا عمال يقولي:

«هتصلي إمام على أبوك بعد ما موته ازاي يا مفتري،

مش كفاية إن انت السبب في موته..

انت متخيل إن صلاتك دي هتفيده ولا حتى هتقبل..

جهنم وبئس المصير إن شاء الله..

موته وهتسبب في عذابه كمان بعد موته،

جهنم وبئس المصير إن شاء الله ..

جهنم وبئس المصير إن شاء الله ..

حرام عليك

حرام عليك

سيب الشيخ (لظفي) يقف إمام ..

انت صلاتك مش مقبولة ..

سيب حد عارف ربنا هو اللي يقف ..

أما انت فروح موت نفسك أكرم ليك ...

انا لما انت مؤت ابويا أنا موقتش إمام عليه، ولا حتى غيري

الحقيقة ..

جهنم وبئس المصير إن شاء الله ..

جهنم وبئس المصير إن شاء الله ..

جهنم وبئس المصير إن شاء الله ..

زعقت بصوت عالي: «لأ ده أبويا يا كساب وهقف إمام غضب

عنك وعن ابوك الوقاد.»

قولتها بصوت عالي والمسجد كله كان ساكت ...

اتلفت ورايا لقيت كل المصلين باصين عليا ووشهم عليه مليون

سؤال .. أكيد هيلتمسوا لي العذر إني بخرف في الموقف ده، وبعدين ما

البلد كلها عارفه حكايتي مع كساب.



الشيخ (لطفي) قرب مني وهمس لي: «استعد بالله من الشيطان الرجيم ومن أعوانه ومن همزة ولمزة وصلي يا نادر.. صلي يا بني.»

كبرت وبدأت الصلاة..

فكرت نفسي: صلاة الجنائز صلاة سرية مش جهرية بدأت أقرأ سورة الفاتحة

كبرت التكبيرة الثانية، وقرأت نصف التشهد الثاني

كبرت التكبيرة الثالثة

وبدأت أدعي لأبوي بالرحمة والمغفرة والجنة

اللهم يمن كتابه

اللهم يسر حسابه

اللهم هون عليه ضمة القبر وارحمه من عذاب القبر

اللهم ثبته عند سؤال الملكين

اللهم اجعل قبره روضه من رياض الجنة ولا تجعله حفرة من حفر

النار

اللهم انقله من مواطن الدود وضيق اللحود إلى جنات الخلود في

سدر مخضود وطلح منضود وماء مسكوب وفاكهة كثيرة لا مقطوعة

ولا ممنوعة وفرش مرفوعة.

- كنت مبسوط إن ربنا يسر لي الدعاء بالشكل ده..

كبرت التكبيرة الرابعة وبدون مقدمات عيني لمحت الإيدين

المتكفته جوا الكفن بتتحرك..



نسيت الدعاء ونسيت الصلاة وعمال بس أكذب عينيا لكني شايفها
بتتحرك أهيه.

غمضت عينيا عشان أركز ف الدعاء..

لاقيت قدامي القبر اللي دخلته قبل كده بس كان أكبر بكثير من
حجمه ومساحته الحقيقية..

أبويا اللي كان فيه وكان يحاول يزحف على الأرض عشان يخرج
لكن التكتيفة اللي احنا مكتفينها له مانعاه.

كل اللي بيحصل إن فيه حاجة زي موميا متكتفة عماله تتنفض..
سمعت صرخات مكتومة خارجة من الكفن وابويا فضل يترعش.

وظهر من العدم.. الوقاد.. أيوه هو... ظهر ومعاه سكيينة، وجه
عند صدر ابويا وقطع القماش فخرجت إيديه وفضل ابويا يضبش بها
زي الغريق، الوقاد مسك راس ابويا وبالسكيينه شق القماش عن وشه
انفجرت ماسورة دم غرقت الكفن على وش ابويا، ومد إيديه وشال
الكفن عن وشه وسمعته بياخذ نفس مصحوب بصرخة مدوية.. وشه
مكنش باين من الدم اللي عليه، قام قعد وعمال يبص حواليه ويصرخ
بعد ما أدرك هو فين والوقاد واقف يبص له ومبتسم.

أبويا قام وقف وغالبًا شافني لأنه وشه اتوجه ناحيتي، وجه بكل ما
فيه من رعب يجري ناحيتي!

فوقت في اللحظة دي على صوت حد بيكح ورايا، لقتني في صلاة
الجنائزة وبدعي في سري:



«اللهم لا تغفر لأبي ولا ترجمه.

اللهم اجعل قبره حفرة من حفر النار.

اللهم افتح له في قبره بابًا إلى الجحيم.

اللهم الحقه بأهل السعير.

اللهم أطل عليه ضمة القبر واجعلها عذابًا فوق العذاب.»

بدأت أركز في اللي أنا بقوله حطيت إيدي على بوقي لا إرادياً.

ورجعت دعيت له عكس كل ده بعد المصايب اللي أنا بقولها دي.

وأنييت صلاة الجنازة بالسلام عليكم ورحمة الله وبركاته.

جه مجموعة شباب وشالوا النعش وجه عمي (مختار) قالي: «في إيه يا

نادر، حد يقف يدعي في صلاة جنازة نص ساعة بحالها؟»

نادر: «إيه...! أنا دعيت نص ساعة؟»

عمي (مختار): «آه ده لولا الحاج نصر كح كنت هتكمل لبكرة، يا

بني إكرام الميت دفنه... ادعي له بعد دفنه زي ما انت عاوز.»

قلت له: «طب انت سمعت أنا دعيت بإيه؟!»

عم (مختار): «لأ، الدعاء كان في شرك يا نادر.. ربنا يتقبل.»

خرجنا من المسجد، واتجهنا ناحية المقابر ودخلناها وقلت دعاء

دخول المقابر:



«السلام عليكم دار قوم مؤمنين، أنتم السابقون ونحن بإذن الله
بكم لاحقون.»

ووصلنا لمقابر العيله وكالعادة كان (نزبه) مجهز التربة زي ما جهزها
قبل كده لعمي (شحاتة)..

فتحوا باب التربة بصوت تزييقة باها المخيف وشالوا أبويا ودخلوا
به جوا التربة، ولقيت عم (مختار) بيشدني من إيدي عشان ندخل التربة
لكني مجرد ما شوفت شكل التربة المضلمة من جوا؛ افتكرت كل اللي
مريت به جواها فاتجمدت مكاني وقلت له:

«لأ يا عم (مختار)، أنا مش هدخل معاكوا.»

قالي: «يا ابني مينفعش.»

نادر بصوت عالي: «قلت لك مش هدخل خلصنا.»

سابني ودخل معاهم التربة، ووقفت عند باب التربة أشوفهم وهم
بيحطوا جثة أبويا على الرمل وبيوجهوها ناحية القبلة والحنوتي معاهم
وعمال يقرأ آيات قرآن وشوفته بيحاول يرخي الكفن عن وش أبويا،
وقال للشيخ (لطفي):

«إيه ده يا شيخ (لطفي) أنتوا مكتفين راس المرحوم كده ليه؟..»

لازم نرخي القماش عن وشه.. ما انت عارف!»

الشيخ (لطفي) ملحقش يرد لأنني رديت وأنا برا:

«ممكن ملكش دعوة واخرج بقى وسيبه في حاله، أنا ابنه وهو

موصي بكده!»

كلامي كان غريب وكل الي واقفين حواليا برا ساكتين
ومبعلقوش ..

الخانوتي: «خلاص يا بني براحتك بس التكفين مش كده.»

نادر: «يا سيدي احنا أحرار.»

الخانوتي: «خلاص يا بني براحتك، أنا آسف.»

وخرجوا الثلاثة: «الخانوتي والشيخ (لطفي) وعم (مختار).»

وبدأ الشيخ (لطفي) يخطب خطبة العظة وفضل يكرر:

«مثل هذا فأعدوا

مثل هذا فأعدوا.»

رعبتني الجملة اللي ختم بيها الشيخ (لطفي) الخطبة: «اسألوا الأخيكم
التثيت فإنه الآن يُسأل.»

الجملة هزت كياني كله زي ما هزتك انت دلوقتي ..

مش بس عشان نعمل فعلاً لهذا اليوم، لأ عشان أنا مریت بكل ده
حتى لو كان وهم وكذب ومكتش ميت لكني مریت وشوفت أهوال
ما يتحملهاش بشر.

اتحركنا كلنا ناحية دار الضيافة (مكان العزاء عندنا) وفضلت واقف
أخذ العزافي أبويا لحد بعد صلاة العشا بساعة، كنت وصلت لمرحلة إني
واقف ومش شايف مين جه ومين مجاش ودراعي شبه اتشل،
كل إلي كنت بفكر فيه أسئلة:



«هو أنا فعلاً موّت ابويًا؟!»

هو أنا بعد ما دعيت عليه في صلاة الجنّازة، ياترى هيحصل له إيه؟»

خلصنا العزا وروح البيت؛ استقبلتني أمي بسيل من الاعتذارات:

«سامحني يا بني كان غضب عني..»

أنا عارفه أنك ملكش ذنب..»

أختك عارفه إني كنت منهاره..»

سيبتها بتتكلم ودخلت أوضتي؛ اترميت على السرير من التعب..»

الباب خبط؛ دخلت أختي (أمنية) بصينية أكل مش هكذب

وهقول مكنتش جعان، كنت حرفيًا ميت من الجوع... أكلت كل

الأكل وشربت كمان كوباية العصير وغيرت هدومي و اترميت على

السرير،

محتاج أرتاح بعد اليوم العصيب ده..»

ونمت.

للمزيد من الروايات والكتب الحصرية
انضموا لجروب ساهر الكتيب

sa7eralkutub.com

او زيارة موقعنا



الفصل الثالث

انت مد فنتنيش ليه؟!

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا



للمزيد من الروايات والكتب الحصرية
انضموا لجرّوب ساحر الكتب

نمت يبجي ساعة؛ بعدها قلقت وفضلت على السرير اتقلب
وأحاول أنام تاني لكن بدون أي فايذة أو أمل برغم كل الإجهاد اللي
انا فيه النوم مقرر إنه ميغيش دلوقتي تاني... قومت غيرت هدومي
عشان أخرج.. (أمنية) وأمي سألوني رايح فين، قولتلهم مش عارف!
خرجت أتمشي في البلد عند التربة والغيطان لوحدي، مش عارف
أفكر أو أشيل من دماغي ملامح أبويا المرعبة، يا ترى شاف إيه؟
يا ترى (كساب) عمل فيه إيه؟

الفرع إلي على وشه ده معناه إنه شاف حاجة أكثر من قدرته على
التحمل أو الاستيعاب وابويا مش حد سهل إنه يخاف خالص.

قطع تفكيري صوت: «الثلاثة يا نادر... شاف الثلاثة.»

كان صوت مميز؛ اتلفت وبصيت ورايا..

نادر: «مروة!»

مروة: «أبوك شاف الثلاثة فاكرهم؟..»

الحارس والعارف والكامن، ظهروا له مع (كساب) و(الوقاد)

كمان، كان فرح كبير وحياتك..»

نادر: «انتي عرفتي مينين؟ وعرفتي ازاى إني هنا وبفكر في إيه؟»

مروة: «أكيد منه... بعث لي صالحني وقال لي أجيلك وأقولك

الكلمتين دول.»

نادر: «وانتي مبسوطه كده!»

مرورة: «أنا مبعثش عارفه أنا مبسوطة ولا لأ!»

أنا مش عارفه غير حاجة واحدة بس، إنك انت السبب في كل إلي
أنا فيه، (كساب) بيقولك مش هيسيبك..

بالإذن بقا أنا ماشيه عشان مستنياه يجيلي تاني والمرة دي هياخدني
معاه..»

- بالمناسبة (مرورة) المرة دي كانت لابسه اسود وشكلها متغير عن ما
شوفتها في البيت...

وبعد ما مشيت اتلفتت وبصت لي وقالت: «بيقولك كمان متنساش
العين بالعين يا (نادر).»

مشيت وسابتني أغرق في بحر أسئلة أكثر من الأول.. وندم وشعور
بالذنب ميتحملوش بشر.

ببص حواليا لقتني واقف في مكان أنا عارفه كويس جداً وله ذكريات
معايا مستحيل تتمحي من دماغي..

دخلت جوا الشجر والغاب الكثير الموجود قدامي وفضلت ماشي
لحد ما وصلت للترعة؛ وقفت قدامها... نفس المكان الي طلعت لي
منه الجنية (جنية عثمان) فاكرينها؟؟

أيوه هي.. دي الي موتت الوقاد وهي سبب بداية المصايب كلها بعد
ما دخلتها بيته بإيدي، وانتقمت لجوزها منه وسابتني ادفع تمن كل حاجة
لوحدي..

لقتني واقف بنادي عليها وبقولها: «انتي فين؟..»

انتي عملتي إيلي عايزاه!..»

دخلتك بيته..»

سلمته ليكي..»

حرقتيه وسببيني أواجه كل اللعنات لوحدي..»

وآخرتها أبويا - أبويا..»

انتي فين؟ ردي عليا.. انتي فين؟..»

فضلت أعيد وأزيد في الكلام

سمعت صوت زرع بيتكسر ورايا كأن حد بيدوس عليه والصوت

بيعلى ويقترب مني، اتلفت بسرعة عشان متأكد إن الجنية رجعت من

جديد؛ لقيت واقف ورايا عم (مختار) الروح ردت فيا وقولته:

«أيه يا عم (مختار) بتعمل إيه هنا؟»

مختار: «أمك كلمتني وقالت إنك خرجت وشكلك يقلق فأنا

خوفت تكون روحت بيت (الوقاد) فطلعت ناحية العزبة وأنا معدي

هنا سمعتك بتتكلم وبتزق، فدخلت.»

نادر: «طيب اسبقني انت أنا هروح البيت بعدك علطول.»

الحاج (مختار): «لااااا رجلي على رجلك.»

نادر: «ماشي ماشي مفيش مشاكل.»

اتمشينا شويه كلمني فيهم عم (مختار) كثير عن أبويا ومواقفه إلي
محدث يقدر ينساها من أهل البلد كلهم... وفضل يحكي وأنا أسمع
لحد ما وصلت البيت؛ دخلت قعدت في أوضتي شويه طلعت موبايلي
لقيت رسالة جايه لي من مديري المباشر في الجورنال أستاذ (حاتم):

«اجمدا يا (نادر) وارجع شغلك علطول، جايلك جوابات أكيد
مغامرات جديدة ليك يا بطل.»

مددت على السرير، ونمت نوم عميق معرفش أدليه.. صحيت
على صوت أمي وهي بتقول: «يا (نادر) اصحى يا حبيبي إحنا بقينا
الضهر، والناس بتيجي تسأل عليك عشان يعزوك.»

صحيت وغيرت هدومي وقلت لأمي: «أنا رايح دار الضيافة
عشان أقابل الناس.»

لكن في الحقيقة أنا في القطر دلوقتي متجه للقاهرة، سبت كل
حاجة وقررت أبعده، مش طايق اللون الأسود في كل حته في البيت،
مش طايق أسمع كلام من نوعية انت إلي هتكمل، انت إلي هتشيل
المسؤولية، اجمد، أمك وأختك ملهمش غيرك، جمل سخيفة عمال
تتكرر من الكل بشكل غبي..

وتحديداً جملة «اجمدا خليك راجل» دي مش فاهمها الحقيقة!
أولاً: لأن أنا متماسك جداً وحتى لو مش متماسك فانتوا عاوزين
إيه؟ حرام أزعل على أبويا يعني!

ثانياً: إيه دخل الرجولة بالي أنا فيه؟! هو حزن أي حد على فقد أبوه وظهره وسنده في الدنيا يتعارض مع إنه راجل!
ده غير عقدة الذنب اللي هي مربوط الفرس، يمكن لما أبعد وارجع شغلي أنساها!

وصلت الجورنال الساعة خمسة المغرب؛ لاقيت معظم الناس روحت ماعدا كام زميل عزوني وقعدت معاهم شويه لعل وعسى أنسى..

ودخلت المكتب لاقيت فعلاً جوابات على المكتب خدتهم وروحت الشقة بتاعتي اللي هنا في القاهرة...

أول ما دخلتها حسيت بشعور الحنين لمكان بقيت بعتبره هو وطني الصغير.. لقيت (أمنية) بتتصل رديت وقولتلها اني جالي شغل ضروري ويومين وهرجع..

نزلت الساعة تسعة اشتريت أكل وطلبات للبيت وطلعت، وبدأت أحضر الأكل محاولاً استئناف حياتي كأن شيئاً لم يكن..

قعدت على سريري وفتحت أول جواب لقيته جواه مشكلة عاطفية من أحد القراء ضحكك وقفلته!

وجيت أفتح الثاني حسيت بشعور غريب جداً قلبي دق بسرعة وبعنف شديد، وبدأت أعرق وجسمي كله

سخن وشعرت بحرارة بتنتاب كل جسمي دون أي سبب، بس من ورايا حسيت بهوا بارد بيخبطني في ضهري..

اتلفت ورايا وأنا قاعد على السرير؛ لقيت ورايا طفل صغير قاعد
هو كمان على السرير....

فضلت ابص له ومش فاهم ده إيه ومين!

طفل قاعد ويبص لي في منتهى البراءة...

رفع إيدو وشاور ورايا وبص لي وملاحه اتبدلت لملاح خوف
وفزع وعيط زي أي طفل بريء لكن دموعه كانت سودا مخيفة..

اتلفت ورايا مكان ما بيشاور، كان بيشاور على باب البلكونة...
فشوفت الآتي:

الباب مقفول والستارة مقفولة لكن من الواضح جداً إن في حد
واقف بين الستارة والباب..

بعد كده الحد ده اتحرك وفتح الشيش ووقف في البلكونة، وبعدها
رجع تاني وقف ورا الستارة،

وأنا مستني أشوفه هيعمل إيه..

أي حد تاني مكاني مش هيقول غير إن ده حرامي لكن أنا ولا
فكرت في ده أبداً، أنا بعد اللي مریت به مستني أشوف جن أو عفريت
أو مخلوق تالت،

مش هنكر وأقول مش خايف، لأ أنا خايف وقلبي عمال يدق..

اتحرك ببطء شديد ودخل الأوضة والستارة بتتحرك من فوقه لحد
ما وقعت كلها من فوقه، وكانت الصدمه..

بابا!!!

يا بابا أنا والله العظيم ما ليا ذنب في إلي حصل لك..

بابا أنا آسف.

خلاص أنا تجننت وبكلم ميت أو عفريت..

فضل واقف قدامي ولا بيصد ولا بيرد، ملاحه جامدة مفيهاش

أي تعبيرات.

وطى بالراحة لحد ما بقا وشه في وشي وصرخ بكل قوه:

(أنت ما دفتنيش لبيبييه؟!)

صرخته خلتنى أنط من على السرير، وبدأت أتهته في الكلام..

والله يا بابا كنت موجود في الدفنة بس مادخلتش التربة.

أبويا: «ما دفتنيش ليه يا (نادر).»

نادر: «والله دفتك.»

أبويا: «انت ما دفتنيش ليه؟»

نادر: «أنا خوفت ادخل جوا التربة بس.»

انقض عليا ابويا فجأة ملحقتش أقاومه لما رفعني زي ما أكون طفل،

وشالني وخرج بيا البلكونه وأنا بقاوم بكل ما أوتيت من قوة.. لكن كل

شويه كانت صدمة كهربا تضرب جسمي تشله للحظات..

وقالي: «عقاب (كساب) مخلصش يا (نادر).»



ورماني من البلكونة، كل ده وانا متخيل اني بحلم... لكني فعلاً
اترميت من البلكونة.. واتبدلت كل حاجة....

لقتني بقع جوا حفرة كبيرة مضلمة، عمال أنزل فيها بصيت لتحت
لقتني بنزل لنار الجحيم، وعمال أقرب منها وبدأت أسمع صرخات
بتعل من حواليا وشوفت منظر مش غريب عليا، ناس عريانة بتتحرق
على جوانب الحفرة ولكنهم بيصرخوا وييمدوا أيديهم كلهم ناحيتي،
عاوزين يمسكوني لكن سقوطي كان سريع فمش لاحقين لكن كنت
بخبط في أيديهم...

مجرد الخبطات دي كانت بتتحرق جسمي وتألمني جداً.

فجأة ارتطمت بحاجة غير صلبه مش أرض....

لأ دي تحديداً حاجة ماثلة تماماً لشبكة العنكبوت.. شبكة كبيرة
وقعت عليها...

هقولكم المشهد حواليا بتفاصيله:

أنا في حفرة واضح أن ملهاش نهاية. في جوانبها كلها فعلاً ناس
بتتحرق وبيصرخوا من الألم..

الشبكة بتتحرك، في الأول كانت اهتزازات خفيفة، بعد كده حركتها
زادت. ببساطه لأن الناس المحروقة دي بتنزل على الشبكة ويزحفوا
ناحيتي من كل الاتجاهات، دلوقتي مفيش أي مفر؛ العشرات منهم
بيقعوا فوق بعض وكلهم بيزحفوا للوصول ليا...

حركتهم كانت بطيئة جداً، وكل ما حد يقرب مني يشده الباقين يرجعوه ويحاول غيره فيشدوه هو كمان، وكأنه سباق وصراع للوصول ليا، المشهد والصراع ده أخطر وصولهم ليا لكن تأتي الرياح بما لا تشتهي السفن،

وقع فوقى واحد وبمجرد ما وقع فوقى كلهم دبت فيهم القوة وهجموا هم كمان...

لأصبح فريسة فوقها عشرات الأسود بتلتهم فيها..

لما وقع أول واحد حسيت بألم ارتطامه فوقى لكن سرعان ما تبدل الشعور ده لألم من نوع تاني (حرارة شديدة لا تحتمل) مع تزايد أعدادهم.

احترق ممزوج بسكاكين بتقطع فيا، لكن حركتهم خلت الشبكة تتهز بعنف مما أدى لقطعها.. أيوه اتقطعت ولقتني أنا وهم ينسقط إلى الهاوية.

هم نطوا على جدران الحفرة وأنا الشبكة اتلفت عليا وكتفتني وكمّلت رحلة سقوطي للقاع....

القاع إلي معرفش هوصله إمتى.. ده لو كان موجود!

ووقفت فجأة... اتعلقت الشبكة في ركن من الحفرة. حاولت أخلص نفسي منها بس لمحت جسم إنسان بيزحف طالع من تحت زي السحليه وبيقرب مني... فضل الشيء ده يطلع لحد ما وصل لي واتعلق في رجلي وفي الشبكة، وتسلق جسمي لحد ما بقا وشه في وشي..



نادر: «مين؟ انتي مين؟»

.....: «أنا حفيظة، نستني ولا إيه؟»

نادر: «انتي ميتة.»

حفيظة: «طب ما كل اللي هنا ميتين.»

نادر: «أنا فين؟»

حفيظة: «أنا نبهتك وحذرتك من (كساب) وأبوه.»

نادر: «يعني هو (كساب) إالي جابنا هنا؟»

حفيظة: «لأ.. أبوه (الوقاد).»

نادر: «طب هو فين؟»

حفيظة: «بص فوقك.»

- ملحقش أبص لأن حاجة وقعت من فوق مسكت فيا، ووقعت

علي (حفيظة) اللي اختفت وحل محلها (الوقاد)..

الوقاد: «لسه الانتقام مخلصش يا فضولي.»

قالها وطلع فوقي وفك الشبكة اللي كانت متعلقة ورجعت اقع

تاني.. وسمعت صوت ضحكته بيبعد وانا بقع معرفش مر عليا وقت

أد إيه لكنني بدأت أشوف حاجة زي همم بركانية في القاع بقرب منها..

وعرفت أن دي خلاص النهاية..

وزي أي كابوس بنشوفه، قبل الارتطام الأخير بنصحى..

صرخت والدنيا ضلمت وحسيت بالارتطام؛ غمضت من شدة
الأم وفتحت عينيا لقتني قدام العمارة مرمي ع الرصيف... حاولت
أقوم ماقدرتش.. تحاملت على نفسي وقومت بالعافية وطلعت شقتي..
لاقيت بابها مفتوح، دخلت وقفلت الباب وروحت الحمام
قلعت هدومي، ووقفت قدام المراية أشوف كمية الحروق البشعة
في جسمي.. جبت مطهر ومضاد حيوي وعالجتها، غيرت هدومي
المحروقة ودخلت أوضتي ولقيت موبايلي عليه فوق الثلاثين مكالمة،
كلمت أمي؛ اكتشفت إني سايبهم من ثلاث أيام كاملة عدوا ازاوي
وفين!!... معرفش.

كنت جعان جداً لدرجة إني أكلت بقايا أكل كانت موجودة.
قعدت على سريري لقيت الجواب اللي كنت بفتححه وحصل الي
حصل... فتحته تاني لاقيت ورقة بيضا لكن كان مكتوب فيها أكثر
جملة بكرهها:

«انتهى الدرس يا غبي»

رميت الجواب ونمت...

مع دقائق الساعة صباحاً؛ رن المنبه صحيت غيرت على الجروح
والحروق وانطلقت لشغلي وخذت معايا الجواب الباقي عشان أقرأه
هناك، ووصلت الشغل الكل قابلني وعزوني من جديد، والبعض
سأل عن سبب شحوب وجهي فاتحججت بأي كلام، دخلت المكتب
لقيت عم (مدبولي) الساعي جايلي كوباية الشاي الصباحيه بتاعتي..

وبعد حوارات كثير مع زميلي... أخيراً حلوا عني وسابوني عشان
أبدأ أشوف هعمل إيه.

وفتحت الجواب أخيراً...

«السلام عليكم أستاذ نادر..»

معاك المهندس (.....) بشتغل في حقل استخراج غاز طبيعي من
الصحراء الغربية..

بقالنا مده في المكان وكل شيء ماشي عادي جدًّا لحد من شهر
فات...

بطبيعة شغلنا بيبقى في أعمال حفر وتنقيب ليل نهار،

بنتي (....) طالبة في كلية هندسة بترول وكان عندها بحث عملي..

فاستأذنت تيجي تاخذ شوية صور وتسجل مع إيلي شغالين عشان

البحث بتاعها..

جبتها وصادف يوم حضورها إن الحفر كان كثير فصورت كل

الصور الي عاوزاها..

لكن حصل شيء مش هقدر أكتب عنه في جوابات..

حصل إيلي خلى بنتي إنسانة تانية ومعرفش إيه الحل أو العلاج...

أنا سمعت عنك منها قبل ما يحصل لها الي حصل..

كانت جايه جورنال وبشكر فيك جدًّا وبتقول نفسها تقابلك

وإنها معجبة بكتاباتك جدًّا... أنا بروجوك تيجي يمكن تفهمني اعمل

إيه لأنني عمري ما مريت بتجارب خاصة بعالم الجن، والعفراريت قبل
كده..

ده لو افترضنا إن اللي فيها ده سببه الجن، لو انت موافق ابعت لي
رسالة على رقم التليفون اللي كاتبهولك فيها عنوانك عشان ابعتلك
سواق الموقع..

مرفق مع الجواب صورة لوضع بنتي، أعتقد هي معبرة أكثر من أي
كلام ممكن أحكيه...

شكرًا وخالص تحياتي

المهندس ...



تليفون : ٠١

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا



السلام عليكم امتان نادر
 معك لتتدبر ~~السلام~~ - نصحك في جعل المستطوح غار طبيعي في
 الصحراء الفرجات
 بقالنا مرة في اركان ده و كل شرة ما يقى على جذا لحد ما متفرقا و
 بطبيعة مختلفة فيبقى في اعال حفر وتنقيب ليل نهار
 عندنا بنت و صبية اسمها ~~السلام~~ طاللة في كلبه الهدية قسم
 بفرول و صديق وكان عندها بحتف على فطاليت من عيني واحد مفرقة
 مفرول و تتصل مع اللي تتقالل عطت البنت ده
 و افقت و ربيتها و صادف يوم حضورها ان امال الحو كانت كحوة
 حيا فصورت سجل الصور اللي محتاجها
 لكن حصل بقره غريب من حضر الكتب على في حوالت و حصل
 اللي حان بقى انطاسة نانبوت نتاقا
 انما صحت عنك منها قبل ما حصلها ابي حصل كانت جايبة حوالت انت
 بيكتب فيها و يتفكر في كتاباتك حيا
 انما بروجك تبين بيكن تقضى اعمل ايه لان مري ما صرت بتترب مع
 الحزن و التلاوة و السلام ده لو افترضنا ان في جنت معاها
 لو انت موافق ابنتي رسالت على مواليين فيها عنوانك محتاج انطاس
 سوات الموقع

صرفت مع الجواب صورة لوضع بنت حاليا اعدت لها معبرة اكثر من
 ابي سلام
 شكر آخرا
 معندي ~~السلام~~
 تليفون ~~السلام~~



خلصت الجواب.. أما عن الصورة فهي صورة لبقايا بنت شاردة
حزينة، وشها شاحب شحوب الموتى، قرئت الجواب أكثر من مرة
وكل شوية أبص على الصورة ومش عارف أقرر..
لحد ما تليفوني رن لاقيت أمي بتطلب مني إني لازم أروح لهم البلد
عشان هيروحوا التراب كلهم.

- تقولش طالعين رحلة للقرافة.. رديت عليها بكل حزم: «عندي
شغل ومسافر الصبح، سلام يا أمي.»
وهنا كان القرار..

طلعت الرقم وبعث له رسالة: «أنا نادر فوده، أنا منتظر السواق
بكرة الضهر في العنوان الآتي...»
معداش عشر دقائق ولاقيت الرد جالي: «تمام يا أستاذ نادر..
في انتظار حضرتك بكرة.»

دخلت لمديري وبلغته، في الأول استغرب لأني هرجع شغلي
بسرعة كده وبعدها قالي: «كده أفضل عشان تتجاوز الأزمة.. عدي
على الحسابات خد بدل انتقالاتك وإقامتك وخليني معاك دايمًا على
التليفون ولو عوزت أي حاجة كلمني... ربنا معاك يا (نادر)، روح
دلوقتي عشان تلحق ترتاح عشان مشوار الصبح.»

بالفعل مشيت ووصلت البيت، ومر اليوم ما بين تجهيز شنطتي
ومستلزماتي المعتادة؛ الكاسيت والشرايط وكشاف وورقي وأقلامي،
وتضميد باقي الكدمات والحروق اللي قلت بنسبة كبيرة.

دلوقتي إحنا داخلين على الساعة ستة مساءً وبكرة الظهر معادي مع المهندس (...)، بس موبايلي رن برقم (أمنية)..

نادر: «أيوه يا حبيبتى.»

أمنية: «أيوه يا نادر.»

نادر: «مال صوتك متغير ليه؟»

أمنية: «أنا مش هروح الترب معاهم لو انت مجتش.»

نادر: «أنا عندي مشوار مهم بكرة.»

أمنية: «كفاية أنانية بقاء، فكر في ناس برا دايرة (نادر) الخاصة دي

شويه.»

نادر: «إيه؟»

أمنية: «إيه انت لسه معرفتش انك أناني ومبتفكرش غير في نفسك.»

نادر: «ده كلام مين إن شاء الله؟»

أمنية: «ده كلام أمك.»

نادر: «أمك!!»

أمنية: «أمك وأبوك وشيخك و(مروة) بنت خالتك اللي ضيعت

حياتها، حتى أختك (أمنية) بتقول عليك سبت الجمل بما حمل

وهربت!»

نادر: «مين اللي بيتكلم؟»



أمينة: «أنا (مروة) أنا عندكوف البيت وقولت أكلمك من تليفون
أختك عشان ترد وأعرفك بيقولوا إيه عليك.»

سمعت صوت أختي (أمينة) بتزعق: «إنتي ازاي تاخدي موبايلي
من غير استئذان؟ وبتكلمي مين؟»

مروة: «أخوكي الحيلة.»

أمينة: «الويا (نادر) قالت لك إيه الزفتة دي؟»

(مروة) ضاحكة: «قوليلو أبوك مش عارف يتنفس في تربته من اللي
عمله فيه.»

نادر: «ولا حاجة يا (أمينة).. ولا حاجة.. سلام.»

بعث رسالة ثانية للمهندس (...):

«أنا نادر فودة، أنا بعذر.. بكرة هيكون صعب إني آجي،

إن شاء الله بعد بكرة الضهر هكون مستني سواق حضرتك.»

شكرًا جزيلًا

نادر فودة

دلوقتي فيه مشوار لازم أعمله حالاً، ومش هترجع فيه... غيرت
هدومي ونزلت روحت موقف الميكروباص وطلعت على بلدنا، كنت في
البلد الساعة تسعة ونص بالليل، روحت على بيت عم (مختار) مباشرة،
فتح لي الباب بنفسه واتخض لما شافني..

الحاج (مختار): «نادر!! خير يا بني إنت جيت من مصر إمتى؟»

نادر: «حالاً.»

الحاج (مختار): «خير حصل حاجه؟»

نادر: «لأ أنا.....»

الحاج (مختار): «أمك كويسه؟ أختك (أمنية) بخير؟»

نادر: «عم (مختار) أمي متعرفش إني جيت أصلاً، أنا جيت عليك

علطول.»

الحاج (مختار): «طيب ادخل تعالى.. إفضل... يا ولاد... العشا

يا ولاد.»

نادر: «لأ، مش وقت أكل خالص يا عم (مختار).»

الحاج (مختار): «طيب أقعد بس وطمني عليك، انت جاي عشان

تطلع معنا القرافة الصبح أكيد.»

نادر: «آه الحقيقة أنا جاي عشان أروح تربة أبويا بس مش بكرة.»

الحاج (مختار): «أومال إمتى؟»

نادر: «دلوقتي.»

الحاج (مختار): «إيه!!»

نادر: «أيوه أنا عاوز مفتاح التربة، لازم أنزل التربة الليلة، من يوم

الوفاة وأبويا بيجيلي زعلان مني إني مدفتوش، وعاوز أرخي الكفن

عن وشه و(مروة) قالت لي إنه مش عارف يتنفس في تربته.»

الحاج (مختار): «نادر إيه الكلام ده، أبوك مات! و(مروة) مين اللي بتسمع لها، دي بقت تريقة الدنيا كلها.»

نادر: «ريخني أرجوك يا عم (مختار).»

مختار: «طيب مكلمتنيش ليه وأنا أبعت الواد (نزيه) يعمل ده.»

نادر: «بقولك زعلان إني مدفتوش.. افهم بقا.»

الحاج (مختار): «يا بني ما هو الكحك ما بيتفتلش بعد العيد!»

نادر: «كحك إيه وعيد إيه، أنا مش فاهم.»

الحاج (مختار): «يعني الميت محدش بيرجع يدخل عليه تربته، ويقول أنا داخل ادفنه من جديد.»

نادر: «أنا بقى هعمل كده.»

الحاج (مختار): «يا بني حرام.»

نادر: «حرام أدخل أحل الكفن عن وش أبويا، مش كان حرام بردو إني سبت وشه مكتف؟!»

الحاج (مختار): «روح البيت دلوقتي وليك عليا هعملك كل إيلي أنت عاوزه.»

نادر: «أنا مش همشي من هنا غير ومعايا المفتاح، ابعت لـ (نزيه) يجيب المفتاح حالاً لو سمحت.»

الحاج (مختار): «مش باعت جايب حد.»

نادر: «يعني كده... هو ده إيلي انا بفكرك بشبابك.»

- الحاج (مختار): «مش القصد!»
- نادر: «أومال إيه؟»
- الحاج (مختار): «أنا أقصد إني مش هبعث لـ (نزيه) لأن المفتاح معايا هنا من يوم الوفاة.»
- نادر: ولا أصدقك.. مين إليلي واثق فيك أوي كده وسايب معاك مفتاح ترب عيلة الحاج فودة؟»
- الحاج (مختار): «أنت شايفني قليل كده... الله يسامحك.»
- (نادر) بخبث: «مش القصد.. بس بصراحة مش مصدقك.»
- الحاج (مختار) ثائرًا: «استنى بقا.»
- دخل الحاج (مختار) وجايب معاه سلسلة فيها ثلاث مفاتيح: «أومال دول إيه!»
- نادر: «وريني كده.»
- الحاج (مختار): «ورحمة أبوك ده مفتاح تربته حتى أبوك دفناه في تربة غير تربة عمك.»
- مسكت المفاتيح في إيدي أتأمل فيها، وقلت له: «عشان نتأكد ملهاش غير حل واحد.»
- الحاج (مختار): «حل إيه؟»
- نادر: «إني أتأكد بنفسي.» وخذت سلسلة المفاتيح وطلعت أجري، الراجل يا عيني ملحقش ينطق من المفاجأة..

جريت شارع كامل لحد ما بعدت.. الشوارع في بلدنا عمومًا عندنا بتفضى بدري..

كملت مشي بسرعة لحد ما وصلت لمدخل الترب؛ شغلت كشاف موبايلى والكام كلمة اللي على حيطان المدخل بيستقبلوني:

«احترس.. الموت أقرب إليك مما تتخيل.»

«الموت قادم لا محالة.»

«اليوم زائر وغدًا مقيم.»

«لمثل هذا فأعدوا.....»

دخلت جوا شوارع الترب....

أنا إزاي نسيت مكان تربتنا!

فين ترب عيلتنا؟

فضلت ماشي، سمعت حاجة زي خطوات حد بيمشي...

وقفت.. صوت الخطوات سكت..

رجعت كملت مشي... الصوت رجع... بس زاد وتحول من

خطوات واحد بيمشي... لواحد بيهول.. والصوت بيقرّب، رفعت

الكشاف ورايا عشان أشوف.. مشوفتش أي حاجة..

الصوت قرب أكثر... جريت... الصوت بقا لأقدام ناس كثير

بتجري ورايا!



حاسس إن رجليا ثقيله ومش قادر أكمل... ووقت وسندت على تربة، ووقت مسلط النور ناحية الي جاي، وإذا بأكثر من عشرين كلب اسود جاين جري كلهم عليا... شكلهم بشع وشرس، فاتحين بوقهم ولسانهم طويل جدًّا عامل زي الحية الي عاوزه تنقض على فريستها وسنانهم أكبر من سنان الكلاب المعتادة..

وفجأة وقف واحد منهم فوقوا كلهم وكأنه هو القائد بتاعهم.

قعدت على الأرض ودعيت إن ربنا يفك كربى ويخرجني من المصيبة إلي حطيت نفسي فيها.

دقايق مرت عليا زي الساعات ويمكن أطول لحد لما القائد بتاعهم اتقدم ناحيتي، حطيت الموبايل جنبى عشان مستفزوش بنوره لكنه استمر وقرب وشه من وشي، وحسيت بأنفاسه الحارة فى وشي، كان يبشم وشي وهدومي كلها... طلع صوت غريب بعيد كل البعد عن صوت الكلاب إلي نعرفه..

فإذا بباقي القطيع يبجوا هم كمان وقربوا مني.

كوّنوا نص دايرة حواليا أنا وقائدهم وورايا حيطه الترب..

وفضلوا كلهم على الحال ده... بصيت ورايا علشان ألاقى أي مخرج مفيش.

نور الموبايل منعكس على تربة.. قريت مكتوب عليها: «مقابر

عائلة فودة!»



إيه ده! دي هي... مجرد ما شوفتها الكلاب كلها نبحت بصوت عالي لا يحتمل،

مديت إيدي بالراحه مسكت الموبايل وسلطت النور بتاعه على باب التربة، وطلعت من جيبي سلسلة المفاتيح... أول ما عملت كده سكتوازي ما يكونوا عاوزني أعمل ده!!

جربت أول مفتاح وأنا إيديا عماله تترعش منفعش، وقتها افتكرت كلام الحاج (مختار) إن أبويا ما اتدفنش مع عمي، فنورت التربة من بره كلها أتأكدت إن دي فعلاً مش تربة جدي ولا عمي دي التربة إلي جنبها علطول.. يبقى انا كده صح، جربت المفتاح التاني.. دخل جوا القفل المصدي القديم وفتحته بالراحة عشان الكلاب دي ماتثورش عليا لأي حركة غير محسوبة..

المفتاح بدأ يلف مع شعور تملكني إني بفتح قفل مصدي مصمم إنه من الأفضل يفضل مقفول للأبد. لكنه مع إصراري ومحاولاتي انفتح. شلت القفل بالمفتاح حطيتهم على الأرض، اتبقى ترباس كبير قديم.. بدأت أحرك الترباس ده لفوق ولتحت بصعوبة بالغة، وصوت صعوده وهبوطه في سكون الليل كان زي صوت مطارق من حديد، مسكت الموبايل ينور بإيدي اليمين ويحاول بإيدي الشمال أفتح الترباس وكل شويه أسلط الكشاف على الكلاب، أطمئن إنهم لسه مكانهم ألاقهم مركزين جداً في اللي بيحصل وساكتين وكأن على رؤوسهم الطير.



وبعد رحلة الصعود والهبوط اتفتح الترابس وطلع صوت طرقة
معرفش مصدره..

كنت فاكرباب التربة الصغير كده هيتفتح لكنه لسه مقفول..
- اسمحولي إالي مقراش الروايتين إالي فاتوا أوصف لكم مقابر البلد
عندنا، هي غير مقابر المدن، إحنا معندناش أوض تحت الأرض..

عندنا الأوضة فوق الأرض ولها باب بنفتحه وندخل الميت
ونوجهه للقبلة وبتبقى أرضيتها رمل لكنها على نفس مستوى الأرض
إالي برا أو منخفضة حاجة بسيطة، يعني لا سلم طالع ولا سلم نازل
هي أوضة واحدة، الكل يترص فيها جنب بعضه وشكرًا.

نرجع لكلامنا:

خبطت الباب بكوعي خبطتين فاتفتح وهب من جوا هوا سخن
جدًا وريحه وحشه..

تيار الهوا سكت.. سلطت الكشاف جوا.. الضلام ابتلع نور
الكشاف ومشوفتش حاجة..

رجعت أبص ورايا لقيت الكلاب كلها في وشي..

فهمت الرسالة: «لازم تنزل تربة أبوك دلوقتي.»

طب أنا خايف ليه مش أنا جاي عشان كده أصلًا؟

إيه إالي اتغير؟!!

أنا كده كده هدخل.

زقيت الباب للآخر ودخلت وأنا موطي عشان الباب يادوب
بيدخل واحد وهو محني ..

دخلت وبمجرد ما سلطت الكشاف؛ شوفت كفن أبويا بنفس
الشكل اللي كفتته به ...

مش هعرف أفك الكفن عن وشه بإيد واحدة، ثبت الموبايل في
الرملة ناحية رأس أبويا ومديت إيديا بالراحة تحت رأسه وجبت
طرف القماشة، وبدأت أفك ..

أقسم لكم إني فكيت القماشة من على رأس أبويا فوق العشرين مرة
عشان بس أوصل لوشه ..

كملت فك اللفات، هبت ريحه صعبة أوي، واضح إن القماش كان
كاتها ..

لحد ما وصلت لآخر طبقة سبتها .. هو كده خلاص أنا مش هكشفه
تمامًا، كده أنا أرخيت الكفن عن وجهه ..

لكن الفضول عقدتي وذنبي إلي مبيفارقنيش أبدًا، فكشفت الكفن
عن وش أبويا وأنا مش ناسي شكله قبل ما يتكفن ..

«إيه ده ... الوقاد!!!»

لأ لأ لأ مش ممكن مش ممكن.»

فتح عينيه وقام قعد وصرخ بصوت جاي من الجحيم!:

«إنت مدفتنيش لبيبيبييه؟!»

لساني اتشل وأنا قاعد و(الوقاد) قاعد في وشي.. وجهًا لوجه..
وبعدها نور الموبايل بدأ يقل ببص عليه لاقيته بيغوص جوا الرمل
لحد ما اختفى وعم الظلام المكان.

مديت إيدي مكان الموبايل وحفرت لحد ما وصلت له وطلعته
وكان لسه منور..

سلطته قدامي لقيت (الوقاد) في وشي أقرب من الأول
وزعق بأعلى صوت: «كساب»
وبص بره التربة..

بصيت شوفت كفن أبيض بيتسحب برا التربة، وكان إليي يسحبه
(كساب) مكنتش محتاج ذكاء خارق عشان أتأكد إن دي جثة ابويا
ورماها برا التربة، وبدأ يصرخ:

«من الابن... يستمر الثأر للأب الكبير.

من الابن... يستمر الانتقام من الفضولي الحقير.

اهجموا يا حراس ومزقوا الأسير.

من الابن... يستمر الثأر للأب الكبير.

من الابن... يستمر الانتقام من الفضولي الحقير.

اهجموا يا حراس ومزقوا الأسير.»

الكلاب كلها هجمت على كفن أبويا.. اتنفضت من مكاني لكن
رجليا غرست في رمل التربة، بصيت ورايا لقيت (الوقاد) اختفى لكن
في إيدين تحت الأرض بتشدني انزل انزل انزل..

بشسحب وبغرق تحت الأرض والكفن برا اتقطع وفيه جثة
بتشرح.. جثة أبويا...

ابويا اللي اتسببت في موته والتمثيل بجثته كان..

عشان كده استسلمت ومقاومتش وانا بتسحب لتحت الأرض...
مبقاش باقي مني غير دراعاتي وراسي... رميت الموبايل عشان اللي
يجي يعرف إني كنت هنا..

واتسحبت والتراب بدأ يدخل بوقي وسد مناخيري وغمضت
عيني ونزلت بالكامل تحت الأرض..



للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا



الفصل الرابع

تحت الأرض
«الخطيئة الكبرى»

للمزيد من الروايات والكتب الحصرية
انضموا لجروب ساحر الكتب

sa.7eralkutub.com

او زيارة موقعنا



للمزيد من الروايات والكتب الحصرية
انضموا لجروب ساحر الكتب



لحظات .. دقائق .. ساعات .. يمكن أقل، يمكن أكثر ..

كل اللي بيحصل قدامي مش قادر أستوعبه .

مشاهد متداخلة وأنا بغوص جوا الأرض، الوضع مش زي ما
انت أو أنا متخيلين ..

الوضع مش قصة واحد اتشد تحت الأرض فنفسه اتكتم وبدأ
يموت ..

فقدت الشعور بالزمان والمكان ومبقتش مدرك أنا عارف أتنفس
ولا مش عارف ...

مشاهد كثير جداً عماله تجري ورا بعضها من أول دخولي قبر عمي
(شحاتة) .. لدخولي القبر بالشكل إلي (كساب) كان مرتبه .. لدخولي
قبر ابويا .

بعدها صوت (أمنية) أختي بتصرخ وتلومني إني سايبهم ..

وصورة لـ (مروة) بفستان الفرح وهي بتضحك وبتقولي: «كتمت
نفس أبوك.»

وصورة لمديري المباشر بيلومني على تأخيري في تسليم الشغل ..

وصورة لأمي بتلومني أن أنا السبب في موت أبويا ..

وبعدها ظهرت صورة واضحة لو شوش عم (مختار) والشيخ
(لظفي) وكانوا ماسكين والدي وكأنهم ييمنعوه من الهجوم عليا ...

لكنه صرخ بصوت لا يحتمل:

«انت مدفتيش لبيبيبيبييه؟!»



صرخة خلت الثلاثة يدوبوا قدامي ويتلاشوا لأجد نفسي في مكان
زي بهو أو حوش كبير حيطانه حجريه عليها نقوش وكتابات بلغة لا
أفهمها معلق عليها مشاعل ...

وقفت أبص حواليا وأنا مش فاهم إيه المكان ده، لقيت باب أوضة
معمول من خشب قديم جدًّا زي اللي بنشوفه في المتاحف الأثرية،
وبعده بشويه باب تاني اتجهت للباب الأولاني ودخلت، الأوضة
مختلفتش كتير عن برا لأنها بردو فيها مشاعل متعلقة والحيطان عليها
نقوش وحروف..

المشاعل كانت منورة تلات أركان من الأوضة أما الركن الرابع
كان مظلم تمامًا وشكله غامض ومخيف، قربت منه شويه سمعت
صوت زي ما يكون حد بيتنفس.. قلقت ورجعت لورا خطوة، فإذا
بصوت أجش يتكلم:

الصوت: «من أنت؟»

نادر: «أنا... أنا... أنا فين؟»

الصوت: «من أنت؟»

نادر: أنا اسمي نادر... أنت مين؟ أنا مش شايفك.

الصوت: «كيف تجرؤ على السؤال وأنت من اقتحم بيتي؟!»

نادر: «أنا مجتث هنا بمزاجي، أنا إتشديت تحت الأرض.»

الصوت: «ماذا تريد؟»

(نادر) مرتبكًا: «لا أريد شيئًا.. أنا أريد الرجوع.»

الصوت: «اقتحامك لعالمنا هو الخطيئة الكبرى، وستدفع ثمنها باهظًا.»

نادر: «بقولك مجتث بمزاجي... (الوقاد) و(كساب) هم إلي شدونى.»

ملحقتش أكمل الجملة، سمعت صرخة غضب طالعة من الضلمة خلت جسمي كله يتنفض وشعر رأسي يقف، بعدها الركن المظلم اشتعل فيه ييجي عشر مشاعل وشوفت الصوت كان جاي من مين أو تحديداً من إيه؟!!

كان فيه كرسي كبير وقاعد عليه شخص يعتبر كده ضعف حجمنا كبني آدمين، بشرته لونها مزيج ما بين البني المحروق والأحمر.. عينيه مستديرة وسودا تماماً مفياش نقطة بيضا، أسنانه أكبر حجماً بكثير من أسناننا كبشر ونازله من تحت كده مدببة زي الدبابيس، شعره مجعد أسود وكثيف جداً، لكن رقبتة داخل وخارج منها جنزير أو سلسلة مخليها عاملة زي المتخيطة بغرز..

زقق الصوت: «ألا تعلم من أنا؟»

نادر: «لأ معرفش.»

الصوت: «أنا (قادش).. صاحب هذا البيت.»

نادر: «انت جن؟»

قادش: «ملك يا جاهل... ملك.»

نادر: «طيب أنا أقسم لك إني جيت رغماً عني بسبب (كساب) وأبوه.»

قادش: «الوقاد وكساب خالفوا العهد برغم التزامنا معاهم.»

نادر: «عهد إيه؟»

قادش: «عهد التسخير.»

نادر: «أنا مالي طيب، أنا عاوز أطلع فوق الأرض تاني.»

قادش: «ليس الأمر سهلاً كما تظن.»

نادر: «يعني إيه؟»

قادش: «لقد اخترقت عالمنا دون إذن منا، ونزول البشر تحت الأرض يجب أن يكون بموافقتنا، وإن لم يكن فعليك ما عليك من المحكمة.»

نادر: «يعني إيه؟»

قادش: «سيتم محاكمتك!»

نادر: «إيه؟ محاكمتي؟»

قادش: «نعم، ستعقد محاكمة عاجلة لك الآن.»

نادر: «لكن كده مش عدل أبداً، بقولك مليش ذنب فازاي أتحاكم على حاجة معملتهاش ولا أنتوا عندكو القضاء يحتاج لقضاء.»

قادش: «كثرة جدالك ستهلكك.»

نادر: «لأ مش هسكت لأني صاحب حق، هو مش ممكن صاحب الحق دلوقتي بقا مذنب والبريء يحاكم، والمجرم طليق والجلاد بينفذ أوامر وخلص.»

(قادش) بصوتٍ أعلى: «تعتقد محاكمة للإنسان الذي نزل أرضنا،
واقترح عالمنا، أدعوكم لعقد المحاكمة الآن.»

وزي ما يكون فيلم خيال علمي.. اتفتحت الحيطه إلي وراه وخرج
منها كرسيين قاعد عليهم اتنين شبهه، الكراسي اترصت جنب بعضها،
أول ما حضروا قام (قادش) ده وانحنى لكل واحد فيهم..

في اللحظة دي لقيت على يميني وشالي اتنين طوال لا ملامح لهم
أشبه بالظلال السوداء..

فهمت إني فعلاً خلاص بتحاكم وحواليا الحرس..
ورجع (قادش) لمكانه وبدأ يسرد إلي حصل، كنت مستنيه يحرف
في الحكاية زي ما احنا بنعمل في بعض.. كنت مستني إنه يستعين
بشهود زور أو يجيب محامي يتلاعب في القضية أو هو يضيف ما يجعله
صاحب حق أو يزيد من إدانتي..

لكن الحقيقة هو حكي إلي حصل بالضبط من غير ولا حرف
زيادة..

وحكى كمان إلي أنا قولته بمنتهى الدقة..
لدرجة أنهم لما خلص بصوالي بصة معناها، هل كلامه صح؟..
فشاورت بدماعي إنه صح..

فاتكلم واحد منهم:
«أيها الإنسان لقد تجاوزت حاجزاً غير مسموح لك باختراقه!..
من اخترق عالمنا احترق بنارنا...»

لقد حجب الله عنكم رؤيتنا لحكمة له سبحانه وتعالى، ولكن هناك في كل طائفة من يعصون الله ويمهلهم سبحانه وتعالى لعلهم يرجعون، مثلما لدينا نحن من يتجاوزون ويتعاملون معكم لسبب أو لآخر.. وتجري لهم محاكمات ربما يعودوا فيستتابوا أو يرفضوا فيعاقبوا! إذا نزلتم لعالمنا تحت الأرض، فيحق لنا أن نحافظ على حقوقنا ونطبق عليكم أحكامنا.»

نادر: «ولكن ده ظلم.. ظلم.»

القاضي الثاني: «صمتًا وإلا ندمت، برغم كل ما حدث من اختراق وتجاوز يستحق العقوبة إلا أنك كنت ضحية دفع بها ملعون من عالمك كي يطبق عليك الأحكام.»
قادش: «الوقاد وولده.»

نادر: «الوقاد مات، ابنه هو إلي ورا كل المصايب.»

القاضي: «لم يمت بعد!»

نادر: «مامتش!! يعني ده مش عفريته؟»

القاضي الثالث: «دون الخوض في تفاصيل جانبية.. ترى المحكمة أنك غير مذنب وقررنا عودتك إلى دارك.»
بدون وعي قلت: «يجيا العدل.. الله أكبر.. ياريت الكل يتعلم منكم.»

قادش: «وأنا أوافق على قرار قضائنا دون جدال أو نقاش.»

كنت واقف أتفرج على حالة رغم رعبها لكنها تستحق التأمل والتدبير..

اتكلم القاضي تاني وقال: «لكن إذا عدت بمحض إرادتك ستعاقب عقابًا مضاعفًا إلا إذا شفع لك ذو سلطة. يا (قادش) ارجع الإنسان إلى سطح الأرض.»

وانسحب الكرسيين لورا واتفحت الأوضة ودخلوا جوا الحيطه واختفوا..

قادش: «علينا الآن إرجاعك لوطنك.»

نادر: «طيب ممكن أسأل على حاجة؟»

قادش: «ما هي؟»

نادر: «الوقاد وكساب هتعملوا فيهم إيه؟»

قادش: «لا شأن لك.»

نادر: «طيب هيعملوا لي حاجة تاني؟ يعني هم عرفوا بأمر المحكمة دي؟»

قادش: «هما خالفا العهد معي ومع غيري، ولا أعلم عنهما شيئًا، ولكن لديهما من يخبرهما.»

نادر: «إزاي؟»

قادش: «أنتم أهل الوشاية يا بني الإنسان!! وتعلمنا منكم!»

نادر: «طب آخر سؤال... الأوضة الثانية فيها إيه؟»

قادش: «ثلاثة من أبنائي.»

نادر: «آه طيب.»

قادش: «وهم معاقبون بالحبس داخل الغرفة.»

نادر: «أنا آسف للتدخل.»

قادش: «ليس تدخلًا لأن الموضوع له علاقة بك.»

نادر: «علاقة بيا!»

قادش: «هم معاقبون بسبيك.»

نادر: «بسببي أنا! ممكن تفهمني.»

قادش: «أبنائي هم العارف والحارس والكامن.»

شريط مر عليا بكل إيلي حصل وإيلي عملوه فيا بتفاصيل التفاصيل،
وأنا حكيته في روايتي السابقة «نادر فوده ٢ كساب»..

قادش: «أتريد أن تراهم؟»

نادر: «سؤال يخوف.»

قادش: «أتريد أن تراهم وهم سجناء.»

نادر: «آه.»

قام وقف من على الكرسي... كان عملاق بمعنى الكلمة أكثر من
إيلي أنا وصفته لكم، وهو قاعد على الكرسي...

اتحرك وشاور لي استنى وراه؛ خرجنا من الأوضة دي ووقف
قدام الأوضة الثانية، كان مرسوم عليها من برا حاجة شبه كف الإيد
مكتش متوقع إنها حاجة زي البصمة عندنا...

حط إيدته على الرسمة... لكن صوابه كانت غيرنا خالص رفيعة
وضوافره عبارة عن حوافر حيوانية..

بعد ما حط إيدته سمعت صوت أقفال كتير بتفتح... بعدها زيّق
الباب وافتتح، بصيت وانا واقف وراه لاقيت قفص حديدي كبير،
بين كل عامود وعامود طلاسمة متعلقة في الهوا، أكيد هي دي إلي مانعة
خروجهم مش القضبان المعدنية، وشوفتهم.. الثلاثة كانوا قاعدين في
أرضية القفص مستكينين وساكتين جدًّا..

وأول ما دخل والدهم بدأوا يبكوا ويقولوا كلام مش فاهم منه
حاجة، بس كان واضح جدًّا من الأسلوب إنه توسل بالعبو والرحمة.
ظهرت من خلف (قادش) فتحولت أصوات التوسل لأصوات
مرعبة مخيفة؛ الثلاثة كسروا ووشوشهم اسودت وبقت نظراتهم كلها
غضب، وبدأ يخرج منهم دخان كتير بعد ما كل واحد منهم مد إيديه
بين القضبان محاولا الوصول ليا، بس كان بيسحب إيدته علطول لأن
فعلاً الطلاسمة المتعلقة مانعاهم، وأصوات صرخاتهم الغاضبة ملأت
المكان.

انسحبت وخرجت من الغرفة خالص، ووقفت برا وسمعت
(قادش) صرخ فيهم صرخة واحدة... سكتوا تمامًا بعدها وخرج هو
كمان، والباب اتقفل وأغلقت كل الأقفال... الواحد تلو الآخر.

وأنا واقف أفكر اللي عملوه فيا في المقابر والسحلة إلي سحلوهالي
بين كل قبر والثاني عشان ينفذوا أوامر (كساب)!

اقرب (قادش) مني وقال: «الآن تعود إلى أرضك، إلى أين تريد أن
أرسلك؟ إلى منزلك أم إلى أين؟»



نادر: «لقبر أبويا أعمل حاجة، عاوز أفك تكتيفته.»

قادش: «لك كل ما طلبت.»

وقرب مني أكثر وخط إيدته على كتفي الشمال؛ حسيت بألم.. فجأة المكان اشتعل وفجأة بردو النار اختفت ولقيت نفسي نايم في الأرض، والمكان مضلم جدًا بس عرفته، أنا رجعت تربة أبويا تاني..

بس واضح إن (قادش) كذب لأن التربة كان فيها صوت حد بينبش... بينبش في جثة أبويا.

في اللحظة دي من غير ما أفكر اتحركت بسرعة ناحية جثة أبويا و(كساب) إلي بيأذي أبويا في نومته الأخيرة وهجمت عليه.. صرخة مدوية منه شقت الضلام، وخلعت قلبي أنا كمان مش بس من الخوف، لأده من الصدمة..

لأن إلي كان بيمد إيدته على جثة أبويا كان عم (مختار)...
الراجل أول ما شافني صرخ وركد جنب أبويا، فضلت أفوق واصحي فيه فوق الربع ساعة لدرجة إني شديته برا التربة للهوا..

أول ما فاق انفجر في البكاء.

عم مختار: «حرام عليك أنا عملت فيك إيه؟»

نادر: «أنت كنت بتهبب إيه؟»

مختار: «أنا إلي كنت بهيب! إنت إلي كنت بتعمل إيه وطلعت لي

مينين؟»

نادر: «عم مختار جاوبني.»



عم (مختار): «أنت لما خدت المفاتيح وجريت؛ أنا خرجت وراك بس مقدرتش أجري عشان أنا راجل كبير في السن وخوفت حد يلمحنى بجري؛ هياخدوا بالهم إن في حاجة وهيجروا كلهم ورايا لحد هنا يشوفوا فيه إيه!..»

فمديت خطوتي وجيت لقيت القبر مفتوح دخلته ملقتكش؛ قوت هعمل إالي انت كنت جاي تعمله، فكيت الكفن وحليته عن وش أبوك وكنت لسه هخرج لقيت حاجة بتنط عليا مادرتش بحاجة بعدها»

نادر: «أنا آسف يا عم مختار.»

عم (مختار): «أنت كنت فين؟»

نادر: «كنت مغمى عليا لما شوفت بابا.»

عم (مختار): «لا انت مكنتش في التربة، أنا لاقيت تليفونك خدو اهوه، بعدين عاوز أقولك على حاجة.»

نادر: «إيه؟»

عم (مختار): «أبوك لما كشفت وشه لاقيته زي البدر وإيديه كانت مفرودة عادي جنبه.»

نادر: «بجد!!»

وقتها افتكرت آخر جملة لـ (قادش): «لك كل ما طلبت.»

عم (مختار): «آه والله يا ابني أبوك راجل صالح ووشه كان منور.»



خدت عم (مختار) ووصلته بيته، وقررت أسافر برغم إلحاحه الشديد إني أفضل معاه أو أروح لأسرتي لكنني رفضت وأصرت إني أسافر، وطلبت منه مي جييش سيرة لأمي أو أختي إني جيت البلد.

فضل مصر إني أبات وأروح مع أمي وأختي المقابر عشان البلد متاكلش وشهم، افتكرت كلام (مروة) إني أناني وإني سبب كل المصايب فاتفقت معاه إني أستنى عنده للصبح، وبعدها أروح البيت عند أمي كآني لسه جاي من السفر وبعدها أسافر...

وبالفعل جهز والي أوضة في بيت عم (مختار) ودخلت نمت فيها، وبمجرد ما حطيت راسي على المخدة نمت وشوفت أبويا، بس المرة دي كان الوضع مختلف، أبويا كان جاي هو وعمي الله يرحمهم وكان مبسوط ويضحك وخدني في حضنه، وأنا حضنته وفضلت أعيط وأقول له: «سأحني، أنا آسف يا بابا سأحني.» صحيت من النوم لقيت دموعي مغرقة المخدة، بس كنت لأول مرة أرتاح بعد ما والدي مات.

طبعا مكانش ينفع أخرج من معتقل عم (مختار) من غير ما أفطر..

ففطرت وخرجت وروحت البيت عندنا، أمي فرحت جدّا وبدأت تتفاخر قدام الناس إني ابنها الصحفي الكبير اللي ميقدرش يفوت زيارة أبوه أبداً برغم إنهم في الجورنال ميستغنوش عنه، وكلام أمهات مبالغ فيه من اللي انتوا عارفينه ده..

وابتسامة بسيطة من أختي (أمنية) ليا فهمت إنها وصل لها اللي وصل لي؛ ماما طالما بدأت تنفشخربيا قدام الستات يبقى الحمد لله بدأت تتجاوز المحنة بشكل كبير..

وعلى الساعة تسعة كنا متحركين من البيت في وفدين؛ وفد رجالي يتقدمه أنا وعم (مختار) والشيخ (لطفي) وبعض أقاربي، ووفد نسائي متشح بالسواد متقدمه أمي وأختي وباقي الستات شايلين على رأسهم اسبته ومغطينها بقماش أبيض.. لولا أنهم لابسين أسود كنت عمرك ما هتقدر تفرق الناس دي رايحة الترب ولا رايحة صباحية عروسة!

وصلنا مقابر عيلة (فودة) اللي لسه كنت فيها من ساعات قليلة. الستات كشفوا عن الاسبته إلي كان فيها (الرحمة والنور) عبارة عن قرص مخبوزة طازجة..

وبدأ فقراء القرية ينهالوا علينا من كل حدب وصوب لأخذ الرحمة والنور..

أما الرجالة فقعدنا في ركن صغير لأن الستات كانوا أكثر وكان معنا (فقي) يقرأ سورة يس.

عم (مختار) كان متعهد العيدية -أقصد الصدقة- لأي حد غلبان يبجي يدعي لبابا دعوة بأجر ويمشي،

وكل شوية واحدة ترقع بالصوت من باب المجاملة فيجري حد من الرجالة يزعم لها فتسكت..



لحد ما جت واحدة، أول ما الشيخ (لطفي) شافها بص لعم
 (مختار) بغضب وقاله: «ايه الي جابها دي؟!»

عم (مختار): «ملكش دعوة بها يا شيخ (لطفي) ماتزعلش المرحوم،
 ده كان بيعطف عليها.»

الشيخ (لطفي): «يعني موافق على إيلي هتعمله.»

عم (مختار): «متحبكهاش يا شيخ لطفي.»

فتدخلت في الحوار...

نادر: «هي مين دي وإيه حكايتها؟»

الشيخ (لطفي): «أنت تسكت خالص.»

نادر: «إيه في إيه يا شيخ لطفي؟»

الشيخ (لطفي): «أنت عارف كويس في إيه؟»

بصيت علطول لعم (مختار) الي قام باصص في الأرض، ففهمت إنه
 كالعادة حكى كل حاجة للشيخ (لطفي) وكده الشيخ (لطفي) عرف أنا
 عملت إيه إمبراح..

نادر: «طبعا هو حكى لك... بس لازم تسمع الحكاية من وجهة
 نظري.»

الشيخ (لطفي): «حكاية إيه وهباب إيه.. هي حصلت؟! تنبش
 قبر أبوك يا نادر... هو ده إيلي علمهولك (كساب) وأبوه... حسبي
 الله ونعم الوكيل فيهم وفيك.. وفيك أنت كمان يا مختار.»

عم (مختار): «ده دي.. وانا مالي يا لطفي.»

الشيخ (لطفي) ساب المكان كله ومشي..

نادر: «هو أنت مفيش حاجة تحتفظ بها لنفسك أبدًا؟»

عم (مختار): «يا ابني أنا خايف عليك والشيخ (لطفي) عنده دايمًا تفسير يا (نادر) لكل حاجة وبعدين تعالى هنا الشيخ (لطفي) مش غريب، ده أستاذك بردو ولا الصحافة نستك أصولك يا أستاذ نادر.»

نادر: «معلش يا عم (مختار) أنا اللي غلطان من الأول.»

مختار: «يا ابني مش غلطان بس على قول الشيخ (لطفي) أنت الفترة إلي فاتت لسه مأثرة عليك ولازم كلنا نقف جنبك لحد ما تبقى كويس.»

نادر: «طب فهمني الشيخ (لطفي) إيه مضايقه من الست دي؟»

عم (مختار): «تقصد حوسنة!»

نادر: «معرفش اسمها بس ليه اتضايق منها ومشي؟»

ملحقناش نكمل حوارنا وانطلقت الصرخات من كل الستات مع دخول حوووسنة -زي ما بينطقوها-

وبدأت (حوسنة) تقود فريق السيدات بعبارات مرعبة:

«من يوم فراقك يا سي مصطفى والفرح فارق دارنا

لا أخ نافع ولا ابن ولا حتى جارنا..

يا نايحة نوحى علينا نوحى..

مصطفى اتمدد على الخشبة ملا جروحي.

لا تزقزق يا عصفور.. ازعق يا غراب..

مصطفى راح وساب البيت خراب.



يا عامود البيت .. البيت هدوه ..

الصوان والمرار في بيتنا نصبوه.

يا عمود بيتي والبيت رخام ..

البيت اتهد وعمره ما راح يتجام.»

كلامها كان زي الشرارة اللي أشعلت النار في كل الموجودين، الكل انهار وعلي صوت النحيب والعيول، وأنا نفسي قلبي اتوجع من كلامها وبصيت لعم (مختار) إيلي قالي: «عرفت مين دي!..»

دي (حوسنة) النايحة المعددة يعني، دي بيتدفع لها فلوس عشان تقول الكلام ده.

بس أبوك بالذات كان بيعطف عليها وكان عمك بيتخانق معاه، ويقول له انت بتساعدنا تكمل اللي بتنيهله ده؟ فأبوك يقول له؛ لأ أنا بديها فلوس عشان تقلل موضوع الندب والنواح ده لحد ما ربنا يهديها وتبطله. عشان كده هي مجتش في موت عمك ومعظم الناس بطلوا يجيبوها... لكن هي جايه من نفسها عشان أبوك.. هي المرة دي زعلانة بجد عليه وجايه من غير مقابل.»

نادر: «إيه التخلف ده؟ يعني بابا كان بيديها فلوس عشان متعددش وتنوح على الناس تقوموا تسيبوها تيجي تنوح عليه هو، دي المكافأة يعني؟!»

عم (مختار): «يا نادر بقولك محدش جابها ومش واخدة فلوس،
جايه من نفسها مجاملة وحزينة على أبوك.»

نادر: «أنا دلوقتي فهمت الشيخ (لطفي) طلع مشي واتخانق معاك
ليه أول ما جت.»

لقيت أختي (أمنية) جايه تجري عليا وهي بتعيط واستخبت فيا،
ورجعت (حوسنة) تكمل مهمتها بمنتهى الاحترافية، كنت عاوز
أسكتها بس في حاجة جوايا منعاني أعمل كده..

أختي (أمنية) عماله تخطب فيا وتقولي: «سكتها يا نادر.»
وأنا أقولها: «حاضر.» وأنا مش معاها.. أنا مركز مع كل حرف
(حوسنة) بتقوله..

مركز بكل جوارحي لأنني دلوقتي (نادر فودة) الصحفي بجريدة
عمق الحدث، باب ما وراء الطبيعة... وليس (نادر فودة) ابن المتوفي.

«يا عود أخضر واتلوى.. القلب اتحرق لفراقك واتكوى.
يا قبر جايلك أبو العريس.. زعل عليه الشيخ والقسيس.
يا قبر جايلك أبو العروسة.. ملحقش يفرح بها، فرحتها مغموسة.
ياما قعدنا ع الفرشة معاك.. الفرشة دابت والفرح راح وياك.
أخونا كان مليح وزين... دفنوك يا غالي مع الغالين.
ريح يا أخويا وسيب الديوان... واحنا نتلطم من بعدك ونتهان.

جبت الطبل ودقيته.. الفرخ خاصم أهل بيته.. وفي الآخر لا شوفته ولا رأيته.»

قاطع السيمفونية إلي أنا مستمتع بها دي صوت (أمنية) بتصرخ:
«كفاية... كفاية... حرام عليكى.. امشي من هنا.»

لقيت الرجالة مذهولة من تجرؤ (أمنية) على مقاطعة (حوسنة) الكل نزل عليه سهم الله بما فيهم أمي..
مبدهاش بقا، تدخلت وطلبت من (حوسنة) بالراحة أنها تبطل، فاستجابت وعطت وقالت لي:

«ده أنا جايه عشان المرحوم كان بيعطف عليا.»

الحقيقة هي كانت صادقة جدًا في كلامها ومشاعرها، يمكن دي أول مرة في حياتها حزنها يكون مش مفتعل مقابل أجر.. لكن للأسف الجهل والفقر مزيج مرعب جدًا نتیجته بتكون (حوسنة) والي زياها.

بدأت الناس تتسرب واحد ورا الثاني والستات أنهت توزيع الرحمة على الفقرا الأفقر منهم، وكل واحدة سابت في السبب إلي معاها كام قرصة بعد كده خبتهم في طرحتها السودا عشان تروح بهم لعيالها، وأهو تكون وفرت فلوس غدا النهارده... إنها حقًا حياة بائسة بكل المقاييس.

أد إيه منظر بائس يبعب عن مجتمع عنده انفصام في الشخصية..

أمي المصلية إلي بتديني دروس في الأخلاق موافقة على إلي
بيحصل ده، صرفت مبالغ مش قليلة على حاجات ملهاش أي لازمة
عبارة عن خزعبلات مش أكثر..

في حين أن كان فيه مليون سكة تطلع فيها الفلوس على روح بابا في
أي صورة لكنها اختارت إن الموروثات تتحكم فيها وتمحي عقلها تمامًا!
صلت وقرت قرآن ودعت وتضرعت وجت هنا سمحت لندابة
تيجي تقول كلام كله اعتراض على قضاء ربنا سبحانه وتعالى..

خلاص كله مشي ومفضلش غيري قدام قبر أبويا ولاقيت (حوسنة)
المعددة جايه وفتت قدامي وقالت لي: «أبوك كان...» قاطعتها: «هديك
إلي كان بيد هولك بس بشرط تبطل الشغلانة دي كرامة له.»
وافقت أو عملت إنها موافقة لحد ما تاخذ مني الخمسين جنيه
ومشيت.

وسمعتها وهي ماشيه بتقول: «ربنا يسترك زي ما أبوك سترني.»

رجعت أبص لقبر والدي وهو مغلق وانا بسترجع كل إلي حصل
جواه.. قرأت له الفاتحة وروحت البيت عشان أستعد للسفر..
دخلت البيت لاقيت خالتي (صفية) قاعدة: «إيه ده انتي مجتيش
ليه معانا عند بابا؟»

خالتي (صفية): «مروة يا نادر، الحقني.»

نادر: «لأ... خلاص.. مروة لأ... مش عاوز أسمع اسمها تاني.»

خالتي (صفية): «يا ابني إحنا ملناش غيرك بعد أبوك الله يرحمه.»

نادر: «قولتلك لأ، بعد إذذك.»

دخلت أوضتي ورزعت الباب وسمعتها بتعيط لأمي وبتقولها أنا مليش حد غيركو.. وكلام كثير من النوع ده..

غيرت هدومي ولبست هدوم خروج تانية، وفتحت باب الأوضة وسلمت على أمي وبوست رأسها وإيديها وسلمت على (أمنية) أختي وبوست رأس خالتي (صفية) وقولتلهم: «سلاموا عليكم» ومشيت وسط نظرات حب أمي وأختي ونظرات ذهول خالتي (صفية) وسافرت لشقتي في القاهرة استعدادًا لنوع آخر من المواجهة...
... في صحراء مصر الغربية...

وصلت البيت وأكلت ومر اليوم ما بين تجهيز شنطتي من تاني ومستلزمات المعتادة ونمت..

الساعة عشرة صباحًا كنت صاحي وبستعد للسفر..

استنيت لحد الساعة واحدة الضهر لاقيت رقم غريب بيكلمني، رديت طلع السواق بيقولي إنه موجود تحت البيت؛ أخذت حاجتي ونزلت له، وانطلقنا في طريقنا للموقع زي ما هو بيقول عليه.
حاولت اسحب منه أي معلومات معرفتش نهائي.



الفصل الخامس

بدون ذكر أسماء

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا



للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا

وصلنا والمهندس (...). رحب بيا، كان في أوائل الخمسينات من عمره، شعره معظمه أبيض، شفافته سودا من كثر التدخين.. خدني ودخلت عنده مكان إقامته اللي عبارة عن كرفان، وكل المكان كرفانات منفصلة عن بعضها، دخلت معاه، المكان أشبه بشقة استوديو صغيرة، عمل لي كوباية شاي وقالي: «تحب تترتاح شويه؟» قولت له: «أحب اسمع منك كل حاجة إذا سمحت.. الجواب مكنش فيه تفاصيل غير إن بنتك جت وحصل لها مشكلة حتى معرفش إيه اللي حصل وازاي!»

المهندس (...):

بعد ما (...) بنتي جت؛ بدأت تجمع معلومات من المهندسين والعمال وكنا تقريباً في آخر يوم لها هنا والمفترض أن العربية هتاخذها الصبح تروحها لكن وإحنا قاعدين في المكتب لاقينا المهندس (ويليام) جاي يقولي: «أبشر يا بشمهندس شكلنا هنلاقي كنز أثري..»

المهندس (...): «اشمعني!»

ويليام: «واحنا بنحفر لقينا دي.» وكان معاه شنطة فتحها وطلع حاجة زي عملة كبيرة أو قلادة مش باين منها حاجة من الطين إلي مغطيتها.

بنتي: «الله! إيه ده؟»

ويليام: «مش عارف يا (...) شكلها عملة فرعونية مثلاً.»

بنتي: «وريني كده.»



وخذت (...). القلادة ودخلت فتحت عليها الميه وجابت فرشاة
سنان ومحلول بنستعمله هنا في التنضيف الآمن، ورجعت بعد ما
نصفتها تمامًا.

بنتي: «الكتابة دي مش فرعوني.»

ويليام: «أومال ايه؟»

بنتي: «معرفش بس أنا عارفه شكل الهير وغليني كويس، وده مش
هير وغليني.»

المهندس...: «احنا هنضيع الوقت يا بشمهندسين في الكتابة
فرعوني ولا إغريقي ولا إيه؟»

ويليام: «لا يا عم أبدًا، أنا راجع الشغل أهوه.»

بنتي...: «ممكن أخليها معايا؟»

ويليام: «خديها ليكي دي تذكاري من المكان بس لو هتبعي بالنص.»
وضحك ومشى.

المهندس...: «ياللا يا ستي هتمشي معاكي هدية كمان.»

(بنتي) ضاحكة: «أحلى تذكاري من أحلى بشمهندس ويليام.»

ومر اليوم يا (نادر) وكان وقت العشاء، كنا مخصصين لـ (بنتي) كرفان
لوحدها فروحت أخبط عليها عشان تيجي تتعشى معانا زي كل يوم،
خبطت مردتش عليا... خبطت تاني وتالت مفيش ردد..

فتحت الباب ودخلت ملقتهاش استغربت ولاقيت مكتبها عليه
حاجات هقولك عليها كمان شويه..



وخرجت أسأل عليها الكل بره بردو مش موجودة، القلق تسلل
إلى قلبي؛ لفيت حوالين الموقع بردو مش موجودة، الكل خرج قلب
عليها الدنيا واتصلت بها كذا مرة تليفونها مغلق...

اترعبت على بنتي راحت فين!

تليفوني رن لقيتها بتتصل... رديت سمعت صوت وش وخروشه
وصوت بنتي بتقول:

«مشوني من هنا، أنا معرفكوش.. أنا معرفش حد هنا.»

قلبي اتخلع، صرخت: «انتي فين يا بنتي!» لكن الخط اتقطع...

رجعت كلمتها تاني؛ الموبايل اداني مغلق من جديد...

فكرت أبلغ الشرطة، بس الكل قالي استنى احنا مش عارفين في
إيه، أول ما النهار يطلع ندور تاني عليها زي الناس، فضلت طول
الليل ألف عليها ولكن مفيش أي أثر لها، مع بزوغ نور الفجر سمعت
(ويليام) يبصرخ، خرجنا كلنا نجري وكانت الصدمة..

لقيت (بنتي) مرمية على الأرض فاقدة الوعي، كل الظنون
والهواجس عندي اتجهت ناحية حاجة واحدة، بنتي اتخطفت، والي
خطفوها جابوها رموها ورا الموقع!

فوقناها وحاولت أستفهم منها بدل المرة ألف مرة، إيه اللي حصل
لكن (بنتي) فضلت ساكنة مابتنطقش يومين كاملين.. لحد ما أخيراً
نطقت، وقالت لي: «أنا محدش عمل فيا حاجة يا بابا، ماتخفش.»

قولتلها: «انتي كتتي فين طيب؟»

بنتي: «كنت عندهم.»



المهندس (...): «هم مين؟»

بنتي: «أصحاب القلادة.»

المهندس (...): «هم مين دول؟»

بنتي: «أهل الأرض.. أهل المملكة.»

المهندس (...): «مين دول وروحيلهم فين؟»

بنتي: «هم إيلي جم خدوني، ونزلوني معاهم تحت الأرض لما أنا

قرت الرسايل.»

ومن وقتها يا (نادر) وبنتي رافضة تتكلم في الموضوع تاني وعلطول
حزينة وبتعيط، ورافضة ترجع القاهرة، لحد من أسبوعين لقيت عدد
من جورنال في دولابها اسمه (عمق الحدث) و(بنتي) كاتبة عنك
(الراجل ده نفسي أقابله).

فبصراحة عندي أمل تتكلم معاك وتفضفض خصوصاً إني فهمت
إنك ليك علاقة بشيوخ ومعالجين..

والي ممكن يعالجوها ويخرجوها من الحزن اللي بقت علطول فيه.

نادر: «طيب أنا بس عاوز أعرف يعالجوها من إيه؟»

المهندس: «من اللي هتشوفه.»

نادر: «طيب فهمني.»

المهندس: «بنتي بالبلدي كده، بتدبل يوم ورا التاني.»

نادر: «بشمهندس (...). أنا بس بفكرك أنا صحفي يعني هكتب

وهحكي كل إيلي هشوفه.»



المهندس: «موافق بس زي ما قلت لك بدون ذكر أسماء.»

نادر: «طيب البتاعة إالي لقيتها دي فين؟»

المهندس: «مش لاقينها خالص.. (هالة) أكيد نخيهاها.»

نادر: «طيب ممكن نروحلها؟»

المهندس: «تعالى معايا.»

اتحركنا ناحية كرفان أبيض، طلعتنا أول ثلاث درجات وخبط

البشمهندس (...). أكثر من مرة لحد ما رد صوت ضعيف من جوا،

فرد والدها: «أنا بابا يا حبييتي ومعايا زميلي عاوزين نظمن عليكى.»

فقال الصوت: «اتفضل يا بابا.» فتحنا الباب ودخلنا...

لقيت بنت قاعدة ساكتة وشاردة تمامًا..

مهندس (...): «عارفه مين ده؟»

(...). بمنتهى البرود: «وهعرف مينين!»

مهندس (...): «ده نادر فودة الي انت بتقري له.»

ابتسمت (...). ومعرفتش تخبي ابتسامتها: «بجد؟»

نادر: «أيوه يا آنسة هالة.»

مهندس (...): «أعتقد بقا إنه أفضل واحد ممكن تحكي له، إيه إالي

حصلك.»

....: «وبعدين؟»

نادر: «متخافيش، مش هنشر اسمك نهائي.»

هي: «يعني حضرتك أي حاجة هقولها لك مش هتقول إني حصلت لي أنا تحديدًا؟»

نادر: «أقسم لك ما هكتب اسمك ولا اسم أي حد، مش هكتب اسمك الحقيقي (ع) ده أبدًا في التحقيق، إيه رأيك نسميكي هالة؟»

مهندس (...): «وأنا هتسميني إيه؟»

نادر: «تج اسمك إيه؟»

هي: «عادل.. بابا بيحب اسم عادل.»

نادر: «اتفقنا.»

- أعتقد كده وصلكم إن هي مش (هالة) ولا هو اسمه (عادل) وكل الأسامي دي أسامي بديله احترامًا لخصوصية أصحاب القصة.

هالة: «بابا من فضلك، سبني مع أستاذ (نادر) شويه.»

مهندس (عادل): «طيب هنجهاز العشا ونتعشى كلنا في الخيمة..»

اتفقنا؟»

نادر: «اتفقنا.»

مهندس (عادل): «بالله عليك قولها مفيش حاجة تستاهل سكوتها

وحزنها ده.»

وخرج مهندس (عادل) وسابنا... فضلنا ساكتين شويه لحد ما

(هالة) قطعت الصمت قائلة:

«تج أبدأ منين؟»

نادر: «من مكان ووقت ما تحبني.»

هالة: «هي الحكاية مش طويلة لكنها بشعة، بدأت لما فضلت أحاول أفك طلاسم القلادة بأي شكل، وأدخل أدور على النت عشان أفهم إيه اللغة المكتوبة بها لكنني معرفتش... لغة كلها مثلثات ومربعات وخطوط متداخلة ومتعرجة ورسومات غريبة، بس أكيد بتدل على حاجة ومش محفورة على القلادة بشكل اعتباطي..»

لحد ما كنت بقلب في موقع غريب جداً؛ لقيت جواه لينك دخلت منه على موقع أغرب؛ فضلت أقرأ فيه بعدها لاقيت طريقة التحضير وفك الطلاسم الغريبة!

ووصلت للمطلوب، إنك لو لقيت تعويذة أو طلسم ما ومحتاج تفكه ففيه طريقة واحدة لكن عواقبها مش سهلة ومش أي حد يقدر يتحملها...

الطريقة تشترط توفير سبع شمعات، ولوحة بردي، ولو حتى مقلدة عادي، وخصلة شعر لبنت بكر، وبعد كده أضلم الأوضة تماماً وأقرأ مجموعة جمل مكتوبة ورا بعضها...

واكتب الجمل دي على ورقة البردي ويكون قدامي الطلسم إلي محتاجة أفكه..

بعدها هيترجم الطلسم للغتي أنا.

الحاجات كلها مش صعب تنفيذها..

كتبت الجمل في ورقة بيضا وخطيتها مع القلادة في درج المكتب،
وطلبت من بابا يتصرف لي في ورقة بردي محتاجها للبحث، قالي؛
فيه تابلوه قديم عند (ويليام) فيه لفافة بردي قديمة يقول إنها أصلية
هجيها لك منه، وجاهلي فعلاً وخطيتها في الدرج مع باقي الحاجات
وقررت ما أقدمش على الخطوة دي دلوقتي.»



للمزيد من الروايات والكتب الحصرية
انضموا لجرؤب ساحر الكتب

sa7eralkutub.com

او زيارة موقعنا




الفصل السادس

المخلوق

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا



للمزيد من الروايات والكتب الحصرية
انضموا لجروب ساحر الكتب

هالة: الفضول كان مسيطر على كل تفكيري... كل شويه أطلع
القلادة وابص عليها وأحاول أفهم منها أي حاجة... مفيش أمل..
فتحت الدرج... طلعت ورقة البردي والورقة البيض الي فيها
الجميل إلي نقلتها من الموقع وكتبت..

موراحين حاضرين مأمورين
موراحين حاضرين مأمورين
موراحين حاضرين مأمورين
أنيروا بصائرنا بقوة اليقين
فكوا طلاس هذه المخطوطة في التو والحين.

وأنا بكتب حسيت بحركة في الكرفان... بطلت كتابة.. بصيت ورايا
مشوفتش حاجة..

شيلت الورقة والقلم في الدرج، وقفلته كويس، بس كنت لسه
حاسه إن في حد في الكرفان..

قومت أتجول معرفش بدور على إيه لكن بدور... عيني جت على
المكتب؛ لقيت درج المكتب مفتوح!

مع إني متأكد إني قفلته.. مديت إيدي قفلته تاني..

ووقفت شويه لقيت الدرج بيتفتح بمنتهى الهدوء..

بصراحة اترعبت لأنه كان كأن في حد يفتحه ببطء شديد..



سبته من الخوف وروحت نمت، فضلت أحاول أهرب في النوم بأي شكل لكن باب الكرفان خبط، قمت فتحت لقيت بابا ومعاه سبع شمعات وييقولي: «أي خدمة.»

هالة: «بس أنا مطلبتش منك شمع يابابا!»

مهندس (عادل): «أومال أنا جايهم من دماغي.»

هالة: «لأ يا بابا، أنا طلبت من حضرتك البردي بس.»

مهندس (عادل): «لا هو الحقيقة انتي مطلبتيش، انتي بعتي لي رسالة في منتهى الذوق الحقيقة.»

وبابا فتح الرسائل عنده لاقيت رسالة مني:

«أمرك بإحضار سبع شموع الآن.»

فتحت تليفوني وبصيت في الرسائل المرسلة من عندي ملقتش الرسالة دي موجودة!

خدت الشمع من بابا، مشي وضحك وقال لي: «لما تعوزي حاجة، اطلبها بشياكة شويه عن كده.»

الساعة كانت واحدة بليل، قعدت على المكتب وطلعت البردي والشموع والقلادة، وولعت الشمع حوالين القلادة... ورجعت أكمل كتابة التعويذة إالي جبتها من على الإنترنت..

موراحين حاضرين مأمورين

موراحين حاضرين مأمورين



موراحين حاضرين مأمورين
أنيروا بصائرنا بقوة اليقين
فكوا طلاسـم هذه المخطوطة في التو والحين

بحق خادم العهد من الجن الخادمين
بحق مارد الأرض من الجن المخلصين
بحق محكمة الأرض من الجن الحاكمين
فكوا طلاسـم هذه القلادة..

بس مفيش أي حاجة حصلت!
بصيت على المكتوب؛ لقيته كله صح، الشمع متولع حوالين
القلادة وكتبت المطلوب على ورقة البردي ولكن بدون فايـدة... في
حاجة ناقصة، أنا معملتهاش!

فجأة حسيت بإيد بتتمد وبتملس على شعري، ولاقيت خصلة
بتخرج بره شعري وبتتحرك وكأن في إيد خفية مسكاها!!
جسمي اترعش من الخوف، وفضلت فاقدة النطق والحركة...
الخصلة رجعت دخلت جوا شعري تاني...
وبعد ثواني رجعت تاني خرجت مع شدة خفيفة من جزور رأسي،
آه افتكرت وفهمت،

مطلوب خصلة شعر من بنت بكر!!

إزاي نسيت ده مجرد ما افكرت؛ طلعت مقص من دولابي ومسكت
الخصلة اللي بتخرج بره شعري وقصيتها وخطيتها على المكتب..

بقا في سبع شموع مشتعلة حول ورقة بردي مكتوب عليها
الطلاسم والتعاويذ! وعليها القلادة... وجنبها خصلة الشعر من
البت البكر (أنا)...

كده كل حاجة اتعملت... استنيت شويه أشوف هيحصل إيه...
الانتظار مطولش لأنى سمعت انفجار بره..

غالبًا محول الكهرباء إلي بيغذي كل الكرفانات ضرب والنور
اتقطع، وأصبحت السبع شموع هي مصدر النور الوحيد في الكرفان..
قربت من المكتب.. لقيت الشمع بينط منه شرارات خفيفة متتابعة
على خصلة الشعر لحد ما النار مسكت فيها وولعت بلهب عالي غير
متناسب مع حجم الخصلة نهائي لكن ورقة البردي متأثرتش.. وبدأت
الشموع تنظفي واحدة ورا الثانية...

السابعة

السادسة

الخامسة

الرابعة

الثالثة

الثانية

الأخيرة

ومع آخر شمعة اتطففت... لقيت نقوش القلادة نورت بنور أبيض قوي براق كأن جواها مصدر ضوء ساطع.. لكن الطلاسم المكتوبة عليها كلها اتغيرت تمامًا من اللغة الغير مفهومة للغة عربية واضحة ومفهومة جدًا..

نادر: «كان مكتوب إيه؟»

سكتت (هالة) شويه وبعدها ردت: «مش فاكروه..»

نادر: «نعم!!»

(هالة) متجاهلة السؤال:

«المهم قريت المكتوب على القلادة، وفضلت أكرر فيه والكلام يتردد جوا عقلي.»

حسيت تاني بحاجة ورايا اتلفت وشوفت.. شوفت لأن النور إالي كان خارج من القلادة انعكس عليه..

شوفت كل ملامحه... جسمه صغير وهزيل... أقرع بدون ولا شعره، أسنانه معظمها متكسر..

عينيه مستديرة وسودا تمامًا، معندوش حواجب، وشه منقوش عليه حاجة قريبة من النقوش الأولى اللي كانت على القلادة، كان يبصدر منه صوت أشبه بفحيح التعابين.. لابس حاجة شبه لبس إنسان الغاب زمان، قطعة جلد مغطيه أحد أكتافه ونازلة لتحت لحد بعد ركبته، برغم صغر جسمه لكن شكله كان يخوف، فضلت واقفة متخشبة مكاني لحد ما رفع إيده بإشارة معناها إني أمشي وراه..

اتحرك ناحية باب الكرفان.. وفتحه.. خدت القلادة معايا لما شاور لي عليها، وبمجرد ما مسكتها.. نورها اتطفى فمبقتش شايفاه، لكن لما طلعت بره نور القمر كان منور الصحرا..
شاوري أمشي وراه.. مكنتش عارفه أقرر أمشي وراه ولا أصرخ واتراجع عن اللي أنا عملته!

المكان برازي ما يكون كل اللي فيه ماتوا.. صمت مخيف.. بعدها وقفت من التردد، اتلفت شاوري إني أتحرك واكمل مشي وراه تاني، فكرت جدياً في التراجع عن الخطوة دي وعن الموضوع كله..

رجع وقف تاني واتلفت، لكنه لما اتلفت لقيته في وشي، أيوه في وشي.. في ثانية كان بقا في وشي، وطوله بقا مماثل لطولي بالظبط، أنفاسه وصوت فحيحه بيخترق وداني، وفتح بوقه وخرج لسانه إلي أشبه بلسان التعبان، كان طويل ومشقوق نصين..

بعدها خبط سنانه في بعض بشكل متتالي يخوف جداً زي ما تكون صوت آله كاتبة بيكتب عليها حد بسرعة منتظمة، لقتني بدون تفكير بقوله: «هكمل.. هكمل.»

في لمحة لقيته رجع لمكانه بعيد عني، ولحجمه الصغير تاني، وكمل ومشني وأنا وراه..

ما مشيناش كثير..

وصلنا مكان ورا الموقع، وقف شويه لقيت الأرض بتتحرك وتبظهر حفرة كبيرة، لما ركزت لقيت فيها سلام نازلة لتحت الأرض،

تقدمني المخلوق.. نزل ونزلت وراه درجات السلم، مكش عندي حرية الاختيار..

السلام كانت في بدايتها باينه من نور القمر، لكن تحت كان واضح إن فيه نور أو نار مشتعلة مبينة الدرجات ومنورة الحفرة بشكل واضح، درجات السلم فكرتني بالمعابد الفرعونية القديمة وحجارة الأهرامات، درجات كثيرة وحواليا من الناحيتين مشاعل نار مبينة إالي مرسوم على الحيطان، وكانت كلها نقوش مماثلة لي كانت موجودة على القلادة قبل ما افك طلاسمها، ولكن كنت كل ما انزل درجة القلادة تنور نور ضعيف، وألاقي إالي مكتوب على الحيطه يتغير ويتحول للغة العربية..

نادر: «كان مكتوب إيه؟»

هالة: «نفس الي كان مكتوب على القلادة.»

نادر: «الي هو إيه يعني؟»

هالة: «مش فاكراه، ومش عاوزه أفتكر، أرجوك ماتضعطش على أعصابي أكثر من كده!»

نادر: «خلاص طيب كمي.»

هالة: كملت نزول وراه لحد ما نزلت لحاجة زي صالة كبيرة فيها مجموعة صناديق خشب قديمة، وتابوت حجري، غطاه من الخشب.. حاولت أفتحه معرفتش، أما عن الصناديق، فكانت كلها بردو عليها أقفال..

وقفت مش فاهمة أعمل إيه، فبصيت للمخلوق وقولت له، وأنا عارفه أنه لا هيرد ولا بتاع:

«طيب أنا جيت وراك!! إيه المطلوب مني دلوقتي؟!»

صوته تسلل لعقلي من غير ما يفتح حتى بوقه، وكأنه اخترق دماغى، طلب مني أستعمل القلادة في فتح التابوت وتحرير روح الأميرة كي أكمل المسيرة، وفي المقابل الصناديق دي هتكون مكافأة لمن أريد...

رديت قولت له: «مش عاوزه حاجة، خد القلادة واعمل بها إالي انت عاوزه وسبني أمشي.» رفض وقالي ميقدرش يعمل ده، لازم الي فك طلاسم القلادة...

رجعت سألته: «طب لو عملت كده تسبني أمشي؟»

ماردش..

تفحصت التابوت؛ لقيت فعلاً في جنب منه مكان مدور محفور يا دوب على مقاس القلادة، حطيتها وحاولت أثبتها فيه، كانت مش بتثبت لأنه واضح إنها متشاله من زمان ومكانها إتملا تراب، شيلتها ونضفت مكانها بإيدي ورجعت ثبتها بنجاح المرة دي، فنورت بقوة، بصيت ورا للمخلوق، لاقيته ساجد قدام التابوت وبدأ صوت فحيحه يعلو عما كان الأول، وظهر صوته بكلمات غير مفهومة.

حصل فرقة من التابوت جنبي، فتراجعت لورا بسرعة.. حاجة كده زي تفرغ الهواء..

وطلع دخان و تراب كثيف عماني، ومبقتش شايفة قدامي واتخنت
لحد ما شبورة الدخان والتراب تلاشت واحدة واحدة، ولكن ايه ده!!
أنا شايفه جسم تاني واقف قدام المخلوق الساجد...

ومع إنقشاع الدخان اختفى... ولقيت المخلوق واقف، وعلى وشه
ابتسامة انتصار مخيفة، بصيت بعيني بسرعة على التابوت؛ لقيت الغطا
على الأرض والتابوت فاضي، رجعت بصيت له وقولتله: «أنا نفذت
لك طلبك، عاوزه أمشي!»

ابتسم وصوته طلع وقال: «أمر مولاتي.»

ومن العدم لقيت الجسم التاني ظهر بس المرة دي كان أوضح، عبارة
عن هيكل عظمي متغطي بطبقة جلد رقيقه جدًا زي اللي متحظين في
المتاحف، كانت ست ولا بسه فستان شبه دايب وبعض السلاسل على
رقابتها، وعلى رأسها تاج واكله الصدى، ومن تحت التاج في بعض
خصل شعر متبقية..

وقفت تصرخ والمخلوق يصدر فحيحه، أصواتهم وهي ممزوجة
ببعض كانت بتقضي عليا، فصرخت أنا كمان:

«ارحموني.. كفاية.. كفاية.. كفاية.» وغطيت إيديا على وداني،
قامت المخلوقة بمتتهى السرعة جت تجري ناحيتي وخطت فيا بمتتهى
العنف، اصطدمت بيا وجهًا لوجه؛ وقعت أنا وهي على الأرض..
حسيت إنها بتغرس حاجات في كل حته في جسمي، دراعاتي ورجليا
اتشلوا عن الحركة وشعور إن في مليون إبرة مغروسة في لحمك هو اللي
كنت حاسه بيه!

توقفت هي عن الحركة وأنا كما..

فضلنا على الحال ده شويه، لكن المخلوق كان عمال يبرطم
بحاجات أنا مش فاهماها..

بصيت بعيني لمحت إيديها بتتحرك بحذر وببطء وبدون أي رحمة؛
غرست أطراف إيديها إلي عامله زي الحوافر في جنابي وبدأت أحس
إن في حاجة بتخترق جسمي، شيء بيتنقل لي من أصابعها... شيء أكبر
بكتير من درجة تحملي...

حسيت إني غيب عن الدنيا واحدة واحدة، وفي عقلي سمعت جملة
بتردد: «تم النقل..»

وغبت عن الوعي تمامًا..

نادر: «وبعدين؟»

هاله: الجزء إلي هحكيهولك معرفش، هل هو حلم ولا حصل فعلاً
لكني أنا شوفته وعيشته بالكامل، فتحت عيني لقتني نايمه في غرفة أشبه
بغرف الملوك وحواليا خدم كثير، إلي بتساعدني أقوم وإلي بتسرح لي
شعري وكلهم بيقولوا بالعربي: «مرحباً أميرتنا.»

باب الأوضه اتفتح ودخل المخلوق، ولكن كان بشكل وهيئة
مختلفة تمامًا، شكله وسيم مش زي ما شوفته، عرفته بإحساسي وقولت
له: «أنت عملت فيا إيه؟»

رد: «أنا نفذت العهد يا أميرتنا، بضعة أيام أخرى للانتقال التام
وتأتي إلى قصرك.»

هاله: «انتقال إيه؟! وقصر إيه أنا عاوزه أرجع مكاني.»

المخلوق: «ستعودين لوداعهم الأخير وُحْدامك في انتظار جلالتك.»

هالة: «بقولك رجعيني.»

قرب المخلوق مني ومسكني من أيدي؛ لقيت الدنيا ضلمت وصحيت لقتني في الحفرة تاني، ولقيت هيكل الأميرة مرمي جنبي على الأرض ومبتتحركش، قمت قعدت بصيت حواليا مفيش حد والمخلوق مش موجود..

وقفت وروحت ناحية السلم، كانت رجلي اليمين فيها ألم كبير لكني تحاملت على نفسي وطلعت الدرجات، كنت كل ما أسيب درجة.. الأرض تبلعها وكأنها مكانتش موجودة، لحد ما خرجت بره الحفرة لقيت الحفرة كلها اتقفلت..

حاولت أمشي لحد الكرفان لكنني مقدرتش؛ وقعت في الأرض والدنيا عماله تلف بيا وفقدت الوعي. ده كل اللي حصل..

نادر: محصلش أي حاجة تاني بعدها؟

هالة: لأ حصل.

نادر: إيه؟

هالة: «أحلام كلها حاجة زي ناس بتجهز لحفلة أو لفرح، وأصوات كتير بتقولي في انتظارك يا أميرة.»

نادر: «بعيدًا عن الأحلام، حصل حاجة تاني؟!«

هالة: «لأ.»

نادر: «المخلوق جالك تاني؟»

هالة: «جالي مرة واحدة في الحلم، ومن وقتها وانا في انتظار نهايتي.»
نادر: «شيلي الموضوع ده من دماغك وسافري وارجعي لدراستك،
وانسي إيلي حصل وأنا هشوف طريقه أفهم بها.»

هالة: «تفهم!! ده انت غبي بقا! مفيش أكثر من إيلي قولتهولك.»
(نادر) متجاهل تجاوزها: «أنا عاوز طريقه أنزل بها الحفرة دي،
القلادة طبعًا مش معاكي؟»

هالة: «لأ مخدتهاش.»

نادر: «وطبعًا مينفعش أنزل من غيرها!»

هالة: «لأ ينفع.»

نادر: «إزاي؟»

هالة: «المخلوق كان قالي لما جالي في الحلم إني لو عاوزه أسبق
الأحداث قبل تمام الانتقال، إنه طبع لي نسخة من القلادة ممكن تقوم
بنفس دورها، مكنتش فاهمه يقصد إيه، بس بعدها ربطت الأحداث
وفهمت.»

نادر: «فهمتي إيه؟ وفيين النسخة دي؟»

كشفت (هالة) عن رجلها من تحت، فلقيت صورة القلادة مطبوعة
زي الوشم بالظبط.

وقالت لي: «كده فهمت؟!»

استأذنتها وطلعت الموبايل وصورت الوشم وقولت لها: «كده انا
ممكن أنزل.»

هالة: «مش هتلاقي أي حاجة.»

نادر: «يعني إيه؟»

هالة: «يعني أنا المطلوبة وعملت المهمة وروح الأميرة اللي كانت محبوسة دي كانت لازم تتنقل لبنت تكمل مكانها، وده غالبًا بيحصل حاليًا ومعتقدش المخلوق هيهتم أنه يظهر لأي شخص يفكر ينزل، ومش بعيد تتأذي يا نادر.. أنا خايفة عليك منهم.»

نادر: «خليني بس أجرب.. أنا بحب أعيش التجارب دي بنفسي وصدقيني انتي كمان هترتاحي.»

هالة: «مش عارفه حاسه إنها خطوة غير محسوبة.»

نادر: «طيب أنا هطلب منك طلب.»

هالة: «اتفضل.»

نادر: «هنخرج سوا دلوقتي نتعشى معاهم، وهنقول انك أفضل بكثير عشان الناس تثق فيا وتسمح لي إني أكمل هنا، ويسيبوني أعمل اللي عاوزه.»

هالة: «أنا مش هكذب عليك، أنا أرتحت كثير جدًا إني حكيت وخصوصًا ليك أنت تحديدًا.»

بالفعل خرجنا والكل قابلنا بحفاوة وترحاب، وانهاالت عليا عبارات الشكر والمديح، والحقيقة إن (هالة) نفسها فعلاً التحسنت عن ماشوفتها من ساعات قليلة وبشهادة الجميع، كان واضح جدًا إنها كانت محتاجة تتكلم وتحكي اللي مرت به.

أكلنا كلنا في جو أسري جميل جدًّا، قربت منها أكثر واتعرفنا على بعض أكثر، وشدني لها حاجة مش مفهومة والجميع كان شايفني حلال العقد (الساحر نادر فودة)..

كده الخطوة الجايه إني لازم أمر بكل إيلي (هالة) مرت به برغم أنها نهتني أكثر من مرة إني منزلش

لكن فضولي المريض خلاني مصمم، أنا بردو مش هخبي عليكو أنا مش فاهم حكاية الانتقال إيلي خلال بضعة أيام إيلي المخلوق قالها عليها دي ايه؟

وبعدين مملكتها الي شافتها تحت دي.. هل هي موجودة فعلاً وهتروح لها ولا مجرد هلاوس؟ محتاج الأقي تفسير للموضوع مش من تكهناتي الشخصية!

المهندس (عادل) بقى حرفيًّا بيحبني زي ما أكون أخوه الصغير أو ابنه، وساب لي الكرفان بتاعه وقال: «هروح الليله أنام في كرفان زمابلي عشان تنام براحتك، بس بالله عليك هي كده خلاص بقت كويسه؟»
نادر: «حضرتك شايف ايه؟»

عادل: «شايف بس كنت بسأل لو نجيب لها شيخ مثلاً؟»

نادر: «لو أنا شايف انها محتاجه هجيبهولها بنفسي.»

عادل: «طيب الورقة دي فيها عنواني في القاهرة ياريت تيجي تزورني، احنا مسافرين بعد أربع أيام إن شاء الله وتليفوني معاك..»

وبكرة الضهر العربية هتكون مستنياك عشان ترجعك القاهرة بألف سلامة، هستنى اشوفك هناك.»

نادر: «يشرفني طبعًا.»

دخلت الكرفان واترمت على السرير محاولاً النوم لكن بعد اللي عرفته إن العربية إلي هتروحني جايه بكرة الضهر، يبقى مفيش وقت لازم الليله أنزل الحفرة دي بأي شكل وبأي تمن.

طب الساعة دلوقتي حوالي عشرة بالليل، لو نزلت مثلاً وصورتي لي كام صورة ومشوفتش أي حد زي ما هي مصره، الموضوع مش هياخد أكثر من ساعتين...

ده على فرض اني مش هشوف حاجة وده مستبعده الحقيقة!

ملهاش حل تاني، أنا هقوم أروح لـ (هالة) لكن الأول أكتب وأوثق كل إلي حصل من أول ما وصلت هنا لحد دلوقتي.

استغرقت ساعة ونص في كتابة سريعة غير مفصلة عشان أنجز ولما أسافر هبقى أكتب باسترسال، روحت الكرفان إلي فيه المهندس (عادل) وقولت له: «عاوز اطبع صورة القلادة عشان التحقيق.»

قالي: «تمام ابعتالي.» بعته صورة القلادة وخدني وراح مكتبه وأول ما فتحها وشه قلب، وقال: «يا ساتر.» قولتله: «لازم أرفقها مع التحقيق زي ما حضرتك عارف.» قالي: «فاهم.. فاهم.»

بصيت فيها شويه بعد ما اتطبعت على أساس أفهم حاجة مفهمتش.. خدتها وروحت الكرفان عندي قعدت فيه شويه وبعدها

خرجت، وروحت كرفان (هالة) خببت عليها فتحت لي، ورحبت بيا وكانت أفضل حالاً، ابتسمت وقالت: «انت ماشي خلاص الصبح يا نادر؟»

نادر: «وباقى لي حاجة واحدة بس لازم اعملها قبل ما امشي.»

هالة: «حاجة إيه؟»

نادر: «انتي فاهمه قصدي يا هالة.»

هالة: «بردو مصمم يا نادر؟»

نادر: «أنا قررت خلاص لازم أنزل.»

هالة: «أقسملك ما هتشفو حاجة.»

نادر: «يعني حتى مش هشفو التابوت والصناديق؟»

هالة: «معرفش، انا حاولت أفتحها أول ما شوفتها، كانت مقفولة باقفال وصعب تتفتح.»

نادر: «طيب لما فوقتي مشوفتيهاش قبل ما تخرجي من الحفرة؟»

هالة: «أنا كنت في حالة متسمحلش إني أدور على صناديق يا نادر!»

نادر: «خلاص أنا هنزل وهعرف فيها إيه وهقولك.»

هالة: «واضح إني مهما اتكلمت مفيش فائدة.»

نادر: «طيب ساعديني.»

هالة: «استنى هجبلك إلی أنت عاوزه.»

فتحت (هالة) الدرج بتاع مكتبها وطلعت السبع شمعات ولفافة البردي، وبصت في ورقة ورجعتها وقالت لي: «مش هتحتاج الورقة لأن لفاة البردي فيها كل حاجة.»

نادر: «طيب وخصلة الشعر.»

هالة: «اتحرق.»

نادر: «طيب ممكن؟»

(هالة) مقاطعة: «فاهمة فاهمة، المهم القلادة.. طبعت الصورة؟»

نادر: «آه أهيه.»

(هالة) قصت خصلة من شعرها وادتهالي مع الشمع ولفافة البردي.

نادر: «طب هعمل إيه بالترتيب.»

هالة: «هتولع الشمع وحتطه حوالين خصلة الشعر والورقة إلي عليها القلادة وبما إنك مش هتكتب الجمل خلاص تاني اقراها وركز فيها.. ولو الموضوع كده صح، الخصله هتولع وحتلاقي الشمع بينظفي وبعدها هتخوض التجربة، بس معرفش شكلها هيكون عامل معاك إزاي!

وان كنت أعتقد إن مفيش أي حاجة هتحصل معاك.»

نادر: «تمام يا (هالة) هخلص وأرجع أحكيك.»

هالة: «طب وانت كتبت اللي أنا قولته كله في المقالات؟»

نادر: «أيوه متقلقيش وأنا عند اتفاقي اسمك مش هيتذكر، وأول

ما العدد ينزل هبعتهولك على عنوانكم في القاهرة هدية.»

هالة: «مش ده إذا كنت عايشة، أنا حاسه أنه الانتقال ده معناه إنه هيموتني وهياخد روحي عندهم.»

نادر: «مش اتفقنا منركزش؟»

هالة: «يا نادر أنا حاسه إني بتغير.. حاجات كتير كنت بحبها بقيت بكرهها، طباعي كلها بقت غريبة حاسه اني بودع الدنيا، زي ما تكون واحدة تانية بتسيطر عليا وبتسحب روحي مني بهدوء وأنا مستسلمه لها تمامًا.»

نادر: «هالة متمشيش ورا الشعور ده أرجوكي.»

هالة: «روح يا (نادر) ولما ترجع نكمل كلامنا، بس أرجوك لو حصل لك أي حاجة لازم تكون متأكد أنها مش بإيدي.»

خرجت من عند (هالة) وأنا كل تفكيري في التجربة إالي هقوم بها، عندي شعور غريب.. مزيج من الترقب والقلق والفرح والخوف.. أما عن (هالة) فمش هقدر أحكم على أي حاجة غير لما أشوف بعيني وأتأكد من صحة روايتها..

بعدها هلجأ للشيخ (لظفي) ولو هي فعلاً اتلبست من الأميرة دي، هو هيقدر إن شاء الله يخلصها منها.




الفصل السابع

من اخترق اخترق

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا



للمزيد من الروايات والكتب الحصرية
انضموا لجرّوب ساحر الكتب



دخلت الكرفان وقعدت على المكتب وخطيت ورقة البردي،
وجبت مقص وقصيت صورة القلادة بالضبط عشان تكون كأنها
حقيقية وخطيت خصلة شعر (هالة) وحاوطت كل ده بالشموع
وولعتها..

قومت طفيت النور عشان أسهل على الجن أو المخلوق القادم
مهمته، ما أنا قديم وخبرة وفاهم بقا...
بصيت على ورقة البردي، وقرت الجمل المكتوبة بصوت عالي:

موراحين حاضرين مأمورين
موراحين حاضرين مأمورين
موراحين حاضرين مأمورين
أنيروا بصائرنا بقوة اليقين
فكوا طلاسم هذه المخطوطة في التو والحين

بحق خادم العهد من الجن الخادمين
بحق ماردا الأرض من الجن المخلصين
بحق محكمة الأرض من الجن الحاكمين

فكوا طلاسم هذه القلادة
فكوا طلاسم هذه القلادة

وفضلت أكرر بصوت حازم جدًا وبصيغة أمر...



لحد ما بدأ الشمع يطلق الشرارة على خصلة الشعر وبدأت فعلاً
تتحرق، نار احتراق الخصلة كانت فعلاً أكبر بكثير من حجمها، لهب
عالي جداً والغريب إن الورق محصلوش أي حاجة.

رجعت بالكرسي لورا من قوة النار، وفضلت مستنيها تتظفي
لكن جوا النار دي شوفت وش اتكون، وش مرعب مفتح عينيه على
الأخر وصرخ بصوت اخترق كل جوارحي خلاني وقعت بالكرسي..
هديت النار واحدة واحدة لحد ما اتظفت..

خصلة الشعر اختفت، والورق سليم والشموع اتظفت واحدة ورا
التانية زي ما (هالة) قالت بالضبط..

ضلمة تامة.. صمت مخيف.. لحظات انتظار عدت كأنها ساعات
وعيني على المكتب مستني الخطوة الجاية، نور انبعث من صورة القلادة،
نور أبيض صافي جداً لا يؤذي العين، نور يجذبك إنك تبص له وانت
عينيك مستمتعة ومرتاحة من النظر له، وبدأت الكتابة زي ما (هالة)
قالت تتبدل تماماً للغة العربية الواضحة.

وعرفت ليه (هالة) قالت لي إنها مش فاكهه لما سألتها إيه اتكتب:

يا من وصلت..

إذا كنت الأول نجوت

وإذا كنت التالي هلكت

يأتيك المارد الآن.



يعني إيه الكلام ده؟؟؟

بدأ النور الأبيض يتلاشى واحدة واحدة، وأنا غارق في حيرتي لحد
ما الكرفان عاد للضلام من جديد..

الباب خبط، قولت: «مين؟»... محدش رد

خبط تاني قولت: «ادخل».

اتفتح الباب ولقيت المخلوق.. نور الكرفانات إلي بره منعكس
عليه.. شكله دميم وبشع.. قصير القامة.. أصلع، نفس الوصف إلي
(هالة) قالته..

(هالة) قالت أن محدش هيوصل غيرها، لكن غالباً أنا كمان هوصل
يا (هالة).. شاوري بإيده اني أمشي وراه، خرجت الدنيا كانت ساكتة،
ومشي بهدوء وثبات وأنا وراه لحد ما خرجنا بره الموقع؛ لقيت بالفعل
في حفرة موجودة، طلعت موبايلي نورت الكشاف اتلفت لي، وطلع منه
صوت فحيح قوي قومت طفيفته بسرعة.

نزل درجات السلم؛ نزلت وراه لحد ما وصلنا للغرفة اللي تحت
الأرض، المشاعل كانت منوره المكان..

وقف شويه وبعدها طلع على السلم واختفى، طلعت موبايلي
وبدأت أصور زي المجنون، صورت النقوش إلي على الحيطه، لقيت
التابوت أهوه مفتوح وغطاه على الأرض... صورته...

وصورت الغطا الخشبي بتاعه، المشاعل إلي مولعة كانت منوره
معظم أرجاء الغرفة ما عدا ركن واحد هروح أشوف فيه إيه..

لأ بس استنى الصناديق فين؟

بصيت حواليا؛ شوفتها مجموعة صناديق خشبية قديمة من بتاعة
زمان إالي كنا بنشوفها في الحواديت بتاعة علي بابا والأربعين حرامي،
صناديق بتاعة الكنوز الملكية..

لقتهم آه لكن كلهم مفتوحين وفاضيين.. الكنوز اتشالت منهم،
(هالة) قالت إنهم مقفولين بإقفال، أنا مش شايف أي أقفال!!

طيب الركن المضلم ده فيه إيه؟

اتحركت بحذر ناحيته، شغلت كشاف الموبايل لقيت في وشي
هيكل عظمي..

نفس الوصف بتاع (هالة)... هيكل عظمي متغطي بطبقة جلد
رقيقة بالية، وصوت خبط أسنانه في بعض بسرعة خلى جسمي
يقشعر وفي لحظة لقيته فتح بوقه أو بوقها -على اعتبار إن دي الأميرة-
وصرخت.. الصرخة تقريباً أصابتني بالصمم...

فقدت السمع من حدة وقوة الصرخة، وحسيت بحاجة بتنزّل من
وداني، غالباً ده دم!

صرخت مسمعتش صوتي؛ شالتي زي الطفل ورمتني بمنتهي
العنف الناحية الثانية، اترزعت في الحيطه ووقعت على الصناديق...
حاولت أقوم مقدرتش؛ لقتها هي جايه ووراها المخلوق القصير..
ظهر من جديد واتكلم:

«هي أصبحت أميرتنا، أما أنت فأضحيتنا.»



سمعته برغم شعوري أنني أصبحت أصم.

فجأة الأرض اهتزت بعنف خلاهم هم الاتنين يقعوا على الأرض..
فواضح أن الهزة دي ملهمش دخل بها، ومن الظلام اللي كانت المخلوقة
فيه؛ ظهر اتنين طوال جدًّا، جسمهم ضخم، لابسين أفنعه ممسوحة ما
عليهاش أي حاجة، وكل واحد فيهم معاه درع كبير منقوش عليه نقوش
كالعادة غريبة...

اتقدموا ناحيتنا احنا التلاتة، المخلوق والأميرة زحفوا على الأرض
زي الحشرات من الخوف وهربوا في ركن من الغرفة، وبقيت أنا في
مواجهة العملاقين دول، واحد منهم وطى في الأرض وشالني وقفني
بينهم الاتنين ومشياوا بيا ناحية الضلمة، اخترقناها ووقفنا قدام حيطه
سد اتفتحت على مكان فيه إضاءة ومشاعل كثير.. دخلوني فيه؛ لقيت
فيه حاجة زي كرسي من الحجر قعدوني عليه، وأنا مش عارف ده ايه..
لأن (هالة) مقالتش حاجة بخصوص ده، ومن قدامي ظهر من العدم؛
ثلاثة كراسي قاعد عليها ثلاثة أشخاص!

أو بمعنى أدق تلات عمالقة!

شوفتهم قبل كده، وعمري ما هنسى شكلهم.

كان الغضب مرسوم على ملامحهم!

واتكلموا وسمعت.. سمعت رغم أنني كنت فقدت السمع من

دقايق..

لقد حذرناك

لقد أمهلناك

لم تلتزم

لم تكثرث

منعنا عنك العقاب من قبل

والآن أتيت مخيراً لا مجبراً

الآن تعاقب

نادر: «بس أنا مجتث عندكم.»

قادش: «لقد حذرناك من النزول تحت الأرض، ونزلت برغبتك.»

نادر: «مكتثس جاي عندكم.»

أحد الثلاثة: «تحت الأرض كله لنا، وكل كائناته خدامنا، لا يهمننا

كيف نزلت ولمن نزلت، أنت الآن مذنب بإجماع المحكمة.»

نادر: «قادش أنا عارف إنك مش طايقني، بس انت عارف إني

مكتثس نازل لكم، وانتوا ولا في دماغي أصلاً.»

قادش: «رفع القلم وجفت الصحف، وستلقى نفس مصير

العارف والكامن والحارس.»

نادر: «إيه؟ لأ أنتوا مش من حقكم تحاكموا إنسان.»

قادش: «إذا إخترت عالمتا؛ وجب علينا محاكمتك.»

نادر: «إشمعنا أنا يعني؟»

قادش: «سبق وحذرناك.» مذنب. مذنب. مذنب.



نادر: «لأمش موافق.»

بدأت الكراسي تتراجع ويختفوا واحد وراء الثاني، وجه الحرس مسكوني ومشيووا بيا ناحية أوضة أنا عارفها كويس ووقفت قدام بابها..

وأنا سامع صوت صراخ جوا... بابها اتفتح لقيت (قادش) خارج منها، الحراس دخلوني لقيت في قفص جنب قفص ولاد (قادش) الثلاثة، غالبًا أتعلم لي مخصوص!

اترميت فيه واتقفل عليا! وخرجوا ولقيت (قادش) بيقولي:

«قفص لك وحدك لكنكم سيطلق سراحكم ساعة كل يوم.»

نادر: «إيه؟ أنت قاصد تخليهم ياكلوني، سراح إيه إالي تطلقه؟!»

فضلت اصرخ وازعق، سابني وخرج!

قعدت في القفص وهم الثلاثة واقفين وراء قضبان قفصهم يبصوا لي نظرات ما بين شماتة وتحفز وغل، وفضلت قاعد في الأرض مستني يا ترى الساعة دي هتبدأ امتي؟ وفاضل عليها أد إيه؟

فضلوا كل شويه حد منهم يمد إيد بره القفص ناحيتي، فتتحرق

بسبب الطلاسم المعلقة فيسحبها تاني.

سكتوا تمامًا، وأنا من الإجهاد نمت في القفص.. نمت وأنا قاعد..



سمعت وأنا نايم صوت خبط؛ فتحت عنيا بصعوبة عشان أشوف
في إيه لقيت الثلاثة؛ العارف والكامن والحارس بره القفص بتاعهم
والصوت ده طلع كان صوت أفقال قفصهم وهي بتتفتح...

وغالبًا صوت قفل قفصي كمان لأنهم كانوا واقفين قدام القفص
بتاعي زي الذئب إلي مستنية الفريسة..

وفتحوا الباب وفضلوا يتشاجروا، مين هيقتمم القفص الأول،
كل ما حد منهم يحاول يدخل الثاني يشده ويدخل غيره، لكن في الآخر
دخل اتنين منهم مع بعض والتالت وراهم...

الثلاثة واقفين وأنا قاعد في الأرض لا حول لي ولا قوة، مستني
أبشع مصير ممكن بني آدم يواجهه..

محستش غير وأنا بتسحل في أرض الغرفة زي ما سحلوني قبل كده،
وعمال أنخبط في كل أرجاء المكان...

عاوز أفكر آيه من القرآن أقولها... نحي اتمسح... فقدت الذاكرة،
نحي بقا أبيض..

كل إلي في مخيلتي أشكال الثلاثة... وإذا بالمشهد يتحول كله
وأرجع لمقابر بلدنا، والمشهد القديم يتكرر كله ثاني فلاش باك لكنه
حقيقي لدرجة إنني حاسس بكل قبر بتخبط فيه..

بيجر جروني على الأرض في الضلام قدام مقابرنا وبنقرب من قبر
عمي...

لأ أنا معنديش استعداد اعيش ده ثاني..
حتى لو عارف إنه كان وهم... لأ مش هدخل القبر ثاني..



يا رب انجديني.

يا رب أفوق من الكابوس ده.

يا رب.

أعوذ بكلمات الله التامات من شر ما خلق.

أعوذ بالله من الشيطان الرجيم.

أعوذ بكلمات الله التامات من شر ما خلق.

صوت مدوي انطلق من ورانا؛ رجعني تاني للأوضة، لقيت (قادش) واقف وحواليه الاتنين الحراس..

وزعق: «انتهت فترة الخروج.» لقيت التلاته سابوني ورجعوا يجروا ودخلوا القفص واتقفلت كل الأفعال، وأنا قومت بصعوبة عشان أدخل القفص أنا كمان.

قادش: «انتهت فترة العقاب أعيدوه.»

خرج وهو ماشي قال: «شفع لك أحدهم.»

وجم الاتنين الحرس سحبوني وفتحوا باب جانبي وخرجوني منه... خرجت منه لاقطني في الشارع إلي فيه شقتي في القاهرة، وقفت زي التايه أبص حواليا!

اتحركت، اتكعبلت في شنطتي، شيلتها من الأرض، فتحتها لقيت ورقي وأقلامي ومفتاح الشقة، طلعت دخلت الشقة، اترميت على السرير ودماغني مدركة تمامًا إن ربنا خلصني من المحاكمة الثانية لما

استغثت به ولجأت له، وشفاعة أحدهم زي ما قال لي (قادش) لكن قبل ما انام أنا لازم أتواصل مع المهندس (عادل) و(هالة) تاني، زمانهم بيقولوا اني هربت وسبتهم، طلعت موبايلي واتصلت به رد عليا..

نادر: «أستاذ عادل أنا نادر فودة.»

عادل: «ياااه أنت لسه فاكرنا.»

نادر: «ياااه ايه.. حضرتك هتنزل القاهرة امتي؟»

عادل: «أنا نزلت من أسبوعين.»

نادر: «أسبوعين ايه؟»

عادل: «حضرتك لو ينفع تيجي يكون أفضل.»

نادر: «طب وهالة؟»

عادل: «ما أنا عاوزك تيجي عشان هالة.»

نادر: «طيب الصبح هكون عند حضرتك.. سلام.»

قفلت السكة وبصيت في الأجنحة بتاعت الموبايل؛ لقيت ان مر عليا

١٧ يوم، مروا امتي! معرفش!

فتحت الشنطة اطمنت إن كل الورق إلي كتبتة موجود، افتكرت

الصور إلي صورتها بالموبايل لقيتها موجودة الحمد لله..

استسلمت للنوم وعلى الساعة العاشرة صباحًا كنت في

مكتب مديري المباشر بسمع وصلة من التويخ على اختفائي

وإغلاق تليفوني، أقسمت له بالله إني معرفش ده حصل إزاي..

مفيش فايده!

قرر يخصمهم من مرتبي، وطلب مني سرعة كتابة التحقيق اليي أنا
راجع به عشان العدد بكرة فاضي، والعدد إلي فات كان آخر جزء من
تحقيق العودة للأختين إلي كتبتة قبل ما اسافر..

كان الحل إني أقسم رحلتي الأخيرة دي على أكثر من جزء عشان أنا
لسه معرفش الدنيا انتهت على إيه..

كتبت باستفاضة إلي حصل من أول وصولي لموقع الشغل في
الصحرا لحد قعدتي مع (هالة) وطبعًا زي ما وعدتهم كتبت الأسامي
الوهمية وأنهيت الجزء الأول من التحقيق عند جزء مشوق جدًا من
كلام (هالة) ليا، كعادتي في السرد..



للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا




الفصل الثامن

الجواب الأخير

للمزيد من الروايات والكتب الحصرية
انضموا لجروب ساحر الكتب

sa.7eralkutub.com

او زيارة موقعنا



للمزيد من الروايات والكتب الحصرية
انضموا لجرور ساحر الكتب

الساعة اتنين ونص الظهر كنت سلمت الجزء الأول من التحقيق، وخرجت من الجورنال رايح بيت المهندس (عادل) عشان أقفل الباب ده تمامًا، وصلت، خبطت.. فتح لي باب الشقة، كان شكله لسه صاحي من النوم أو داخل ينام، رحب بيا ودخلت، أصر يعمل لي شاي وجابه وقعدنا ودار الحوار..

نادر: «أنا لحد دلوقتي مش عارف إزاي عدت المدة دي، أنا كنت متوقع إنه مر عليا ساعات أو بالكثير يوم واحد، إنها ١٧ يوم مستحيل!»
عادل: «كل اللي حصل لنا كلنا مستحيل يا نادر.»

نادر: «هو ايه إالي حصل؟»

عادل: اللي حصل إنك اختفيت، والكل دور عليك ولكن لما لاقينا حاجتك مش موجودة؛ اتأكدنا إنك قررت فجأة تمشي مع إنك كنت ماشي يومها الظهر، كلنا دورنا عليك فيما عدا (هالة) كانت ساكته ورجعت للحالة إالي كانت عليها قبل ما انت تيجي بل يمكن أسوأ!
ولما نطقت ماقالتش غير: «نادر اختار.»

زهقنا من التدوير عليك يومين كاملين، وأقنعنا نفسنا إنك مشيت وقررنا نتجاوز الموضوع ده
لكن من الواضح إن اختفاءك كان مجرد بدايه!

بعدها بيومين بالليل؛ لقيت (هالة) جايا لي الكرفان وادتني ظرف وقالت لي أوصلهولك، وقالت كلام غريب من عينة إنها لها دور ثاني لازم تعمله، وإنها حكّت لك كل ده وإنها لو مراحتش بمزاجها هتتعاقب وإنها هتتذك، حاولت أفهم منها يا (نادر) لكنها سابتنني.. باستني

وسلمت عليا ورجعت الكرفان بتاعها، ليلتها قلبي اتقبض بس مكتش
عارف أبداً إن دي النهاية.

نادر: «النهايه!»

مهندس (عادل): «الصبح كانت (هالة) اختفت، حصلتك هي
كمان وبدأنا رحلة البحث من جديد عنها،
وكان عندي أمل الأقي (ويليام) جاي يقولي إنه لقاها زي المرة الي
فاتت لكن مجاش وعدا يوم وراه الثاني والثالث وأسبوع كامل وبتتي
مرجعتش!

مكنش قدامي حل غير إني أفتح الظرف لعلي أفهم حاجة، وفعلاً
فهمت وقررت أرجع هنا وأسبب كل حاجة ورايا هناك..
أنا آسف إني فتحت الجواب ساحني، أنا بحاول أتصل بيك من
وقت ما رجعت لكن تليفونك كان مغلق طول الوقت.. اتفضل يا
(نادر) آدي الأمانة.»

إداني الظرف كان مفتوح فعلاً، وقالي هسيبك تقراه لوحدك
وهرجع لك ودخل جوا وسابني...

سابني مع الجواب الأول والأخير من (هالة) إلي وأنا بفتحه كنت
بتمنى الأقي إجابات تريح عقلي من كل الغموض ده..

نادر

أكتب إليك هذا الخطاب وأنا كلي أمل أن تعود من تحت الأرض كي تقرأه بنفسك، وأنا على يقين تام أن والدي سيقراه هو الآخر، ولكن مثلما كشفت لك القصة من البداية سأكملها معك للنهاية..

حينما حذرتك من النزول تحت الأرض، كان كل تفكيري في أنك لن تحصل على مرادك أبدًا..

ولم أكن أعلم أبدًا أن لديك خصومة مع أهل الأرض من الجن الحاكم..

علمت ذلك بعد اختفائك، فقامت بالدخول إلى غرفتك وحصلت على كل أدوات التحضير وأعدت التجربة بالكامل...

وبالفعل حضر المخلوق وأخذني إلى باطن الأرض وجسدي كل ما حدث وشاهدت محاكمتك وشاهدت عقوبتك، ورجوته أن يساعدك على الخلاص فأخبرني أنه لا حول له ولا قوة أمام جبروت وقوة محكمة الجن.. ولكن إذا عجلت بنزولي إلى باطن الأرض لأستلم مكاني ونفذت ما طلب مني سابقًا سأكون أميرة متوجهة مكان الأميرة التي هاجمتني وهاجمتك، وفي هذه الحالة سيكون لي الحق في طلب الشفاعة والعفو عنك. لذا فيتحتم عليا التعجيل في اتخاذ القرار لأنك ستموت في فترة خروج أبناء (قادش) من محبسهم.. فكان القرار....

الليلة سأكون تحت الأرض للأبد... كنت على أي حال سأنزل شئت أم أبيت..

فلم لا أعجل بذلك كي أنقذك؟...



شكرًا لاهتمامك بأمرى وأعتذر لإحمامك في كل هذا
وآخر ما سأخبرك به.. أنى دومًا سأكون موجودة تحت الأرض إذا
حدثت وقررت يومًا أن تأتي وتترك الأرض ومن عليها، ولا تقلق لقد
أصبح لك هنا سندًا.

تركت لك بداخل الظرف ورقة البردي وخصلات من شعري،
وأنت تعلم بقية الأمر، لن أعيد شرحها..
كي لا ينفذها أبى..

يا نادر بابا مش هينفع ينزل...

بابا مش هينفع ينزل يا نادر...

إوعى تحليه حتى يحاول.

وختامًا أبى العزيز: نادر ليس بمذنب، ابق على علاقتك الطيبة به
فهو إنسان بمعنى الكلمة.

وتركت لك هدية يا والدى الطيب، أرجو أن تعينك على فراقى.

ابتتك ع

..... أو هالة مثلها أسمانى نادر

لقد أصبح لك حنا نداء .. للتعلم ..

تركته لك برافض الظرف ورتبه البردق وخصلات مشعري
وأنت تعلم يقيا - الثمر ... لم يحيد شرحه كي لا يفقدنا أيت
يانادر ...
بابا صه هانفع يزل بابا صه هانفع يزل يانادر ..
أوعى أظلي حنه يحاول ..

وخداة .. أيت العزير :
نادر ليس لهنسب .. رابعه على علاقتك إيطيه
به نورا انه بعض الكلام ..
تركته لك هديه يا والدي الطيب أجزوا ته تفيدك
على قرأتك

الينسك
أوهالك
أصحات نادر

خلصت الجواب وبصيت في الظرف؛ لقيت فعلاً الحاجات، قفلت
الظرف وبيبص قدامي، لقيت المهندس (عادل) واقف قدامي وماسك
مسدس!!

نادر: «إيه ده؟»

عادل: «أنزل لها إزاي؟»

نادر: «معرفش.»

عادل: «كداب، أنا حاولت أفك الطلسم مفهمتش ومعرفتش.»

نادر: «هي مش عاوزاك تنزل.»

عادل: ده شيء ميخصكش.»

نادر: «لأ يخلصني لأن دي أمانة، وأنا مش هخون الأمانة.»

- (عادل) ضرب طلقة رصاصة في السقف وبص لي وقال: «الجايه

في رأسك.»

نادر: «موتي مش هيحل حاجة.»

عادل: «لأ هيحل، على الأقل مبقاش عايش وعارف إن في طريقة

أنزل بها لبنتي، وأخذها في حضني وواحد زيك عارفها ومانعها

عني!»

نادر: «يا عادل افهم، هاله مش هتتسبط بده.»

عادل: «أبوس إيدك... أنا أب... كده كده أنا بموت وأنت آخر

أمل عندي، هديلك كل اللي انت عاوزه بس وديني عندها.»

نادر: «تديني إيه بس؟ انت إزاي شايفني كده؟!»

عادل: «تعالى معايا.» وشدني من إيدي ودخلت أوضة نومه وفتح شنطة سفر كبيرة، وكانت المفاجأة، الشنطة فيها كنز بالمعنى الحرفي، كنز من كنوز الجن.. كده أنا فهمت (هالة) كانت تقصد إيه بأنها سابت لوالدها هدية، (هالة) خدت إليي كان في الصناديق وسابته لوالدها!

عادل: «سرحت في إيه؟.. خد كل إليي انت عاوزه من الشنطة، أقولك اقل الشنطة وخدها كلها وانت مروح بس وديني عندها... بالله عليك، أنا وهي ملناش غير بعض، طول عمري بخاف عليها من الهوا ولما ببقى في شعلي وهي هنا لوحدها ببقى مرعوب.

نادر: «أنا مش عاوز حاجة، ده كنز مرصود ليك وأي حد هياخده هيجيب له الغم والفقر، وغير كده أنا مش عاوز كنوز.»

عادل: «يعني مش هتساعدني؟!»

نادر: «أنا بس أضمن منين إنك لو روحت هتشوفها، انت ممكن تتأذي ومتشوفهاش في الآخر بردو..»

يا (عادل) تحت الأرض مش رحلة هو!!

عادل: «خلاص يبقى عملت إليي عليك، وأنا مستعد أواجه أي مصير غير إني أعيش هنا من غير بنتي!»

انهار (عادل) باكياً ورمى المسدس وفضل يعيط زي الطفل إليي فقد والديه، وأصبح يتيمًا وحيدًا..

.. فكان القرار ..

نادر: «بشمهندس أنا هخليك تروح لها وزى ما يحصل يحصل.»

الراجل أخذني بالحضن وباس إيدي، بدأت أشرح له كل إلي هيعمله بالتفصيل وهيشوف إيه وهيقابل مين، ولما ينزل تحت يعمل إيه، وبعث له الصورة بتاعة القلادة اللي معايا. حفظ كل حاجة وسمعها لي.

نادر: «طيب هتعمل ده امتى؟»

عادل: «الليلة إن شاء الله.»

نادر: «طيب أنا هطلب منك طلب تسيب هنا لفافة البردي، متاخذهاش معاك عشان لو فكرت آجي لكم في يوم من الأيام.»

عادل: «حاضر.. خد آدي مفتاح الشقة، تعالى الصبح هتلاقيني سايب لك كل حاجة في أوضتي على الكومودينو، والشنطة هسيبها لك خد إلي انت عاوزه منها والباقي عمل به أي مشروع خيرى باسم بنتي.»

خذت المفتاح ومشيت وخذت جواب (هالة)، وسبت لـ (عادل) كل حاجة وعرفته إزاي يكون عند بنته، وبكرة هكون في الشقة بشوف يا ترى إيه إلي حصل...

الساعة تسعة بالليل كنت بتعشى في مطعم مع زمايلي -عازميني بمناسبة رجوعي- لقيت رسالة من (عادل):

«أشكرك يا نادر لمساعدتك.. أنا هبدأ دلوقتي.»

ردت عليه: «سلم لي على هالة.»

اتعشنا وقعدنا على القهوة ونسيت الموضوع والساعة ١٢ بليل
افتكرت..

اتصلت به أكثر من مرة، لقيت تليفونه بيدي جرس ومحدث ييرد..
اترسم على وشي ابتسامة واضحة لكل إلي قاعدين، ابتسامة واحد
حاسس أنه قدر يلم شمل أب مكوم على بنته ولو حتى لم الشمل ده
كان.....

تحت الأرض!

روحت البيت وبدأت أكمل كتابة لكل حاجة، وأنا متحمس وسعيد
جدًا باللي حصل..

كتبت.. كتبت.. كتبت لحد الفجر... خلصت كل حاجة وبينت
جدًا أد إيه أنا بطل هذه القصة...

أد إيه أنا إنسان في الأول قبل ما أكون صحفي..

أد إيه في مواقف لازم عواطفك هي إلي تحكمك مش عقلك..

أد إيه.. وأد إيه.. وأد إيه..

أنهيت التحقيق على ثلاثه أجزاء، جزء نازل النهارده وجزء
الأسبوع القادم، وجزء الأسبوع الي بعده، وكله هنشره عندي على
صفحتي على الفيس بوك (نادر فودة الصحفي بجريدة عمق الحدث)
بعد نزوله في الجريدة وانتهاء مبيعاتها، وبدء عودة المرتجع منها كمان.

صليت الفجر ودخلت نمت، وضبطت منبه تليفوني على سبعة صباحًا عشان يا دوب آخد دش وأنزل على الجورنال علطول أسلم باقي التحقيق، وأطلب من مديري إلغاء الخصم بقلب جامد..

نمت وشوفت حلم مزعج ومتعب للأعصاب، بس مش فاكر منه حاجة، عارف الحلم إلي بتصحى منه تعبان وجسمك كله واجعك وتحاول تفكر منه أي حاجة ولكن دون جدوى... هو ده إلي حصل لي.

المنبه رن وأنا في الحلم لدرجة إنه اخترق أحداث الحلم، وكان المنقذ ليا من الكابوس والتخاريف دي كلها.. فقومت، والساعة سبعة ونص الصبح كنت في الشارع رايح الجورنال.

دخلت على المدير، قابلني بالأحضان وقالني: «التحقيق مذهل، هو ده الشغل، هتكتب الباقي امتي؟»

طلعت له الباقي وقولت له: «آدي شغل الأسبوع الجاي واللي بعده، محتاج بس يتبيض على الكمبيوتر.» تهللت أسارير المدير، وكنت حاسس إنه هيغمى عليه من الفرحة، قاللي: «أنا اتسرعت إني خصمت لك، وطلعت قرار بإلغاء الخصم وقرار تاني بصرف مكافأة ألف جنيه ليك، اعتبرها بدل عفاريت.» وضحك.

بعدها جاله تليفون غالبًا من صاحب الجورنال... فاستأذنت وخرجت من مكتبه وأنا سامع كلامه اللي كان عني غالبًا، وقفت ورا الباب وفضلت واقف أسمع المكالمة كلها...



مكانتش صادمة خالص لأنني عارف ومتأكد إن ده العادي بتاعه:

- ألو يا أفندم، بجد حضرتك قريرته وعجبك؟

- استنى بقا الجزء الجاي هعدل فيه بدماعي كالعادة وهنزله مقسم

على العديدين الجايين.

- أيوه يا أفندم، ده ولد واعد أنا تعبت معاه جدًا لحد ما بقا

بالاحتراف ده، هو لسه بس عضمه طري وده دوري إني أنشفه...

- أنا بيعته لأماكن عارف إن وراها قصص مشوقة.

- أيوه يا أفندم طبعًا صرفت له مكافأة.

- لأ يا أفندم كده كتير طبعًا.. مش عاوزين ندلعهم كده ونطمعهم

فينا.

- ألف جنيه حلوين أوي عليه.. هو فرح بهم جدًا

- أيوه فاهم طبعًا، بس لو اتعود على كده مش هنخلص، دول
صنف بي فهم التقدير غلط ولو كافئناه مرة هيعتبر إن ده حقه ويطلع
فينا حضرتك.

- لا مش القصد طبعًا، بس هو فرحان بيهم والله.

- يمشي يروح فين يا أفندم، ميقدرش!!

- لا لا.... ثلاث آلاف مين... ألف جنيه رضا أوي.

- وليا أنا كمان؟!!

- والله عاجزين عن شكر سيادتك.

- خلاص هعدلهم وهبيضمهم وهيكونوا عند حضرتك النهاره.

- المدام كمان هي اللي عاوزه تقراهم.. وعاوزه تعرف عنوانهم؟
طلبات الهانم أوامر.



- تحت أمر سيادتك.

- مع السلامة سيادتك.

- مع السلامة سيادتك.

- ألف سلامة.

- ألف سلامة.

- ألف سلامة.

مشيت بسرعة من قدام الباب لأنه كان خارج وعملت إني بتمشى..

ناداني وقال: «نادر عاوزك تبيض لي الجزئين الباقيين النهارده

ضروري.»

نادر: «لأ النهارده صعب.»

مدير (نادر) المباشر: «لأ مفيش حاجة اسمها صعب، أنت لسه

واخد مكافأة.»

نادر: «يا أفندم بدري أوي تبيضهم، وبعدين هياخدوا وقت.»

المدير: «اسهر للصبح يا أخي.»

نادر: «لأصعب، أنا ورايا مشوار مهم هروجه دلوقتي.»

المدير: «بيضهم في البيت وهاخدهم منك بكره.»

نادر: «معنديش لاب توب.»

المدير: «يا آنسة سمر، طلعي لأستاذ نادر لاب توب من المخزن ومضيه بس على استلام العهدة.»

نادر: «ياااه.»

المدير: «أهو ملكش حجة، لاب توب جديد وويندوز ١٠ وآخر دلع.»

نادر: «طبعا ومكافاه ٣٠٠٠ جنيه.»

المدير: «نعم؟»

نادر: «مكافاة ٣٠٠٠ جنيه زي ما الراجل الكبير قالك يا حاتم!»

المدير: «حاتم! حاف كده؟»

نادر: «خلاص يا تومه.. كده كويس؟»

حاتم: «أنت بتتجسس عليا!»

نادر: «وايه يعني ما أنت بتتجسس علينا كلنا، والأستاذة الفاضلة (سمر) بتنقلك اتفنسنا كام مرة في اليوم..»

بص يا حاتم، أنا معنديش مشكلة أنك تنسب الليلة كلها لنفسك قدام الراجل الكبير.. لكن كله إلا المجاملة على حساب حقي.»

حاتم: «نادر انت اتحولت كده ليه؟ هي العفاريت خربت دماغك!»

نادر: «لا وانت الصادق، كذبك هو اللي فوقني .. وبالمناسبة أنا مش همضي على عهدة..»

واللاب توب ده تنساه لأنني هاخده وإلا....»

حاتم: «وإلا إيه يا نادر بيه؟!»

نادر: «وإلا هعمل زي ما الراجل الكبير قالك..»

حاتم: «هتعمل إيه؟»

نادر: «هخلع يا توومي!»

خلصت كل حواراي معاه، وأنا مش مصدق نفسي... أنا عمري ما كنت مادي، بس أسلوبه القذر خلاني أرد عليه بالمثل..

أنا عارف إنه بيعمل كده من أول سطر كتبته في الجورنال ده، ومكبر دماغني لأنني عارف أن بلدنا للأسف مليانة كده والضمير في التلاجة.. بس آن الأوان إني أستغل نجاحي لمصلحتي شويه.

قاللي: «بص أنا هعمل كل اللي أنت عاوزه بشرط تديني عنوان العيلة دي!»

نادر: «لأ طبعًا وليه؟»

حاتم: «الراجل الكبير مراته عاوزه تروح تزورهم في بيتهم أو موقع الشغل.»

نادر: «وهي عاوزه تروح تحضر عفاريت نادي الصيد هناك؟ ده إيه الفراغ ده!!»



نادر: «وبعدين يا مدير هتروح مش هتلاقي حد!»

حاتم: «خلاص يبقى عملنا إلكي علينا يا نادر.»

اديته عنوان البيت... دخل وحطه في درج مكتبه، واستلمت اللاب توب ومضيتش على حاجة وخذت ٣٠٠٠ جنيه، وانفقت مع زمايلي إني عازمهم على سهرة صباحي الخميس الجاي.

وانطلقت لبيت (عادل) عشان أرضي غروري، ويزيد يقيني إني لميت شمل أسرة (عادل) وبتته (هالة)، وصلت وطلعت المفتاح، فتحت الباب، دخلت لقيت الصالة نورها والع، كل الشواهد بتقول إن العملية تمت بنجاح..

دخلت أوضة (عادل) لقيته سايب لي كل حاجة زي ما اتفقنا... لأ مش كل حاجة...

ورقة البردي موجودة بس فاضية، كل حاجة اتمسحت من عليها.. صورة القلادة موجودة بس متشخبط عليها بقلم أحمر عريض.. الشموع واضح أنها ولعت لحد ما خلصت..

قولت في بالي: «عملتها يا عادل ال.....»

مسحت كل حاجة قبل ما تمشي!

بس التعاويذ معايا كتبتها في التحقيق مع شوية تحريف، هفضل أحاول لحد ما افتكرها كلها والقلادة صورتها على الموبايل معايا..

يا غبي كل ده عشان موصلش لها تاني..



مش هسيها وهاجي لها غضب عنك..
كنت هتتعب في إيه لو سبت الحاجات وسبتني آجي أشوف (هالة)
وأظمن عليها، وحشتني زيك بالضبط أنا عاوز أشوفها زيك!
الله هو إيه إلي أنا بقوله ده!!

ليه عاوز أشوفها أوي كده، هو انت اتعلقت بها ولا إيه يا عم نادر!
فووووق فوووووق دي خلاص بقت مش في العالم بتاعنا..

وبعدين لما انت كده مصارحتهاش ليه؟؟
أنا.. أنا معرفش حقيقة شعوري ده إيه؟

بتضحك على نفسك!!

آه صح.... خلاص هي في عالم وأنا في عالم.

ولو... كنت ناوي أنزلها.

خلاص.... خلاص..... اسكت.

ده كان حوار داير بيني وبين نفسي، وواجهت نفسي فيه بحقيقة
مشاعري ناحية (هالة) بس للأسف بعد فوات الأوان.... بس مش
يمكن (عادل) اتجبر يعمل كده؟
لأ... مظنش..

دلوقتي أنا همشي بس إيه ده!! الشنطة فين؟

شالها من على السرير!!

كذاب ومخادع، خد الي عاوزه وعلم عليا، مش بعيد يكون خد
الكنز معاه..

أو وزعه على قرايبه الكذاب!!

فتحت دولابه مفيش حاجة!

بصيت تحت السرير لقيتها... لقيتها الحمد لله.

شدتها مكانتش خفيفة.. شكلي ظلمتك يا (عادل)
وسبت لي الكنز فعلاً.. أنا مش عاوزه ولا فارق معايا
أنا عاوز أنفذ وصيته في المشروع الخيري (ع) وميمنعش إني آخذ نصيبي
بردو... ولا إيه!

شدت الشنطة بكل عزمي، وفتحتها كلها عشان أشوف الكنز، وإذا
بي أجد جثة (عادل) متقطعة ومرصوفة جوا الشنطة!!!!!!!!!!!!!!
دراعات ورجلين وأحشاء ورأس، وعينيه مفتحة على الآخر، وبوقه
على وضع الصراخ...

رجعت لورا من هول المنظر، الدم كان بينزل من الشنطة زي
الفيضان...

أنا قدامي شنطة كان فيها كنز، بقدرة قادر بقا فيها جثة متقطعة..

إيه العمل؟! ... حصل إيه؟! ... هعمل إيه؟! ... هروح فين؟

يا سنه سوخه، ده العنوان مع (حاتم)... يا نهار أسود وملحوس، أنا
هلبس جريمة قتل، وتمثيل بالجثة كمان!! إعدام إعدام يعني....

صوت قطع تفكيري جاي من الشنطة.. من رأس (عادل) صوت
أنين مخيف..

وفجأة عينيه لفت ناحيتي.. انتظرت من مكاني لورا، وخرجت بره
الشقة أجري زي المجنون ورزعت الباب ورايا عشان أشوف هخرج
من المصيبة دي ازاى!

و(هالة) هتعمل إيه، بعد ما خالفت طلبها وأبوها اتقطع بالشكل
ده بسبب إني مشيت ورا مشاعري الغبية..

لغيت عقلي ولغيت حسي الصحفي عشان حبيتها وكنت عاوز
أفرحها بعودة أبوها لها..

حبيتها وبسبب حبي ده أبوها اتقتل، ويا عالم هي جراها إيه دلوقتي!
أعمل إيه؟!.. أعمل إيه?!

غبي... فعلاً (كساب) مغلطش لما قالها:

«انتهى الدرس يا غبي.»

خرجت لقيت الدنيا ضلمت، كالعادة الوقت مسروق في المأساة
الأخيرة اللي بمر بها..

ويا ترى بقا مر كام يوم المرة دي؟؟!

كنت بجري عشان أروح مكان معين في دماغي.. الجورنال!

ركبت تاكسي، وصلني هناك.. سألته: «النهارده إيه؟» فاطمنت
إني مغبتش غير ساعات الحمد لله، وصلت مقر الجورنال -عموماً



الشيفت بتاع ليلة صدور الجورنال هو بس الي بيكون فيه ناس، لكن النهارده وبما إنه مش ليلة صدور العدد فأكيد هيكون فاضي مفيش غير ساعي بالكثير وموظف أمن-

دخلت لقيت موظف الأمن مشغل برنامج (محمود سعد) وغالبًا صوته نيم الراجل.. عدت من جنبه ولا حس بيا، دخلت لقيت عم (مدبولي) الساعي، رحب بيا وقاللي:

«خير يا أستاذ نادر؟» قولتله: «هقفل الموضوع بتاعي بدري عشان هسافر البلد، بس عاوز منك طلب.»

عم (مدبولي): «خير يا بني؟»

نادر: «أنا ماتعشتش.»

عم (مدبولي): «عينيا.. فيه عندي هنا باقي الغدا، استنى هجيبهولك.»

نادر: «لأ باقي إيه بس، أنا عازمك على كباب.»

عم (مدبولي) مهللًا: «كباب؟! بجد؟»

(نادر) ضاحكًا: «أيوه انزل ياللا هاتلنا أنا وانت ولبتاع الأمن كمان عشان يبقى عيش وكباب.»

عم (مدبولي): «ياااه انت عارف أنا آخر مرة كلت كباب امتي؟»

نادر: «كمان ساعة إن شاء الله.. خد الفلوس أهى وانجز بس عشان أنا جعان جدًّا.»

عم (مدبولي): «تمام، ممكن نجيب نص كوفته؟»

نادر: «عم مدبولي هات اللي انت عاوزه... لخص!»

عم (مدبولي): «الله عليك.»

نادر: «اوعى تصحي بتاع الأمن، خليها لما تيجي هو يتفاجئ.»

عم (مدبولي): «ربنا يبارك لك يا بني، بس قولي أخبار الناس اللي

بتكتب عنهم إيه؟»

نادر: «كويسين بيسلموا عليك.»

عم (مدبولي): «طب ما تكتب عني.» هههههه.

نادر: «حاضر هطلب من (حاتم) ينقلني لقسم الوفيات.»

عم (مدبولي): «الله يسامحك يا بني، بس بكرة تكتشف إني كنز

وتحلف بعمك مدبولي.»

ونزل عم (مدبولي) بعد وصلة الرغي اللطيفة دي، أما أنا فما استنتش

لازم أنجز، أنا عارف إن الجورنال فيه كاميرات مراقبة لكن محدش

هيشوف لأن موظف الأمن بياكل رز بلين مع الملائكة، وبعدين مفيش

حاجة هتسرق عشان يفرغوا الكاميرات.

دخلت مكتب (حاتم) وفتحت الدرج، ولقيت الورقة اللي فيها

العنوان الحمد لله!

الورقة اللي هتعلق رقبتى في جبل المشنقة، شيلتها وخطيتها في جيبى وقومت من على المكتب.. لقيت (هالة) قدام الباب واقفة تتفرج عليا..

هالة: «خلصت؟»

اتكعبلت ووقعت على وشي، قومت بسرعة، لقيتها اختفت، عدلت الكرسي اللي وقع ولمحت ظرف..

مكتوب عليه: «يسلم لنادر باكر ضروري».. إيه ده؟ فتحته، كان مفتوح أصلاً.. قريت في عجالة الجواب وقفلته وخطيته مكانه وخرجت من المكتب.. وقعدت في صالة التحرير عمال ابص حواليا مستني ظهور (هالة) بين لحظة والتانية..

شويه وعم (مدبولي) جه، كان داخل يغني بصوت أعوذ بالله:

وحياة اللي جرابي وياه من غير معاد

لا اسهره الليالي واحرمه البعاد

واطفي بناره ناري واخلص منه تاري

ولا يهملك يا عين هيروح من قلبي فين؟

ده القلب يجب مرة ما يجبش مرتين

عم (مدبولي): «لا مؤاخذه بقا، أصلي بحب اغني للست نجاة أوي.»

نادر: «نجاة!»

عم (مدبولي): «الله؟ هي مش نجاة؟!»



(نادر) ساخرًا: «لا طبعًا، دي جائزة أحمد.»

عم (مدبولي): «آه والله تصدق! صوتها فعلاً.» الله يرحمه.

يالايأ أستاذ (نادر) أنا صحيت (فايز) بتاع الأمن، يالايأ بينا نتعشى،
وقعدنا احنا الثلاثة وأكلنا، خلصت وخذت بعضي وروحت، أنا كده
الحمد لله محيت آثار جريمة لم أرتكبتها... لكن أنا مش هنسى أبدًا إني
كنت سبب رئيسي في حدوثها.

- حياة غريبة اخترتها لنفسي ومش ندمان.. العفاريث فيها أكثر من
البنى آدمين..

الشر فيها للأسف يسبق الخير، ومش متضايق ولا عاوز أتراجع.
بالكلمات دي ختمت الجزء الثالث من تحقيقي الأخير إلي نشر أول
أجزائه في الجورنال بعنوان:

«لعنة الصحراء الجزء الأول» وأنهيت التحقيق بدون أي تفاصيل
تلبسني في حيلة من قريب أو من بعيد...

ثلاثية مليئة بتفاصيل مرعبة ومثيرة، أكيد هتحقق نسب قراءة عالية
إن شاء الله ومبيعات أكثر للجورنال، ومكافآت جديدة من (حاتم)...
والأكيد كمان إنه منها لدوامه جديدة بأبطال جداد وهكذا...

فضلت دماغى تروح وتيجي لحد ما نمت من التفكير والتعب،
بس صوت تخلل عقلي خلاني أبدأ أصحى.. صوت بينادي عليا أو
بمعنى أصح بيهمس باسمي...

نادر: «أنا مكتتش أعرف أنهم هيعملوا فيه كده.»

هالة: «أنا حذرتك!»

نادر: «أنا آسف.. أرجوكي ماتغضبيش... مكانش قصدي.»

هالة: «انت اتسببت في عداء بيني وبينهم لأنني مش هسيب حق

أبويا.»

نادر: «طيب أساعدك بإيه عشان تنتقمي منهم.»

هالة) ضحكت ضحكة عالية: «ده على اعتبار إنك مش زيهم!»

نادر: «لأ يا هالة، هم غيري وأنا غيرهم!»

هالة: «أنا هنتقم منهم... ومنك بعدهم.. وانت عقابك هيكون

شديد أوي... العين بالعين يا نادر.»

نادر: «أبويا أصلاً مات... ومفيش حاجة بقت تفرق عندي!»

هالة: «بس (أمنية) تفرق.»

نادر: «لأ أرجوكي أختي لأ... لأ يا هالة.»

هالة: «شوفت إن في حاجات لسه بتفرق.»

نادر: «طيب أنا اللي غلطت... انتقمي مني أنا.»

اتحركت ناحية الكومودينو، وشدت بعنف خصلة من شعرها ورميتها على الشمع، اتحرقت والورق كله اتحرق وشالت القلادة والأوضة كلها ضلمت، جريت نورت الأباجورة ملقتهاش...

اختفت (هالة) وفضلت مستنيها للصبح ترجع مرجعتش...

حاجة قالت لي في عقل بالي إني أفتح موبايلي عشان أدور على صورة القلادة.. لقيتها اتمسحت!

أول حاجة عملتها بعد كده، اتصلت بـ (أمنية) لقيتها كويسه، قررت أكلمها كل يوم... وأعيد هيكله حياتي الأسرية، للأسف كنت نسيت دوري ناحيتها، أنا المفروض أكون مكان بابا، وفوقت لما حسيت إنها ممكن تضيع مني.. (أمنية) اترجتني أكلم خالتي (صفية) لأن (مروة) طفشت وملهاش أثر، وعدتها أعمل ده حاضر لما أفضي..

لبست وروحت الجورنال وقابلت (حاتم) وسلمته باقي التحقيق، وحسنت جداً من أسلوبه معاه، لدرجة إنه قال لي إني عندي انفصام في الشخصية..

وسألني على عنوان (هالة) ووالدها لأن اللي كان معاه ضاع مع إنه حاظه بإيده في مكتبه، قولتله: «نسيته!»

معرفش فوتها ازاي، بس اهوه فوتها وخلص.. الحمد لله.

ده حتى معرفش إني كنت هنا بالليل، واضح إن الرجالة أكلت ونامت وخلص، ده المهم بالنسبة لهم..

استأذنت عشان أروح مكتبي، قالي: «استنى خد جايلك مهمة جديدة.» ودخل مكتبه وجاب لي الظرف اللي شوفته امبارح وقال لي: «شوف عاوز تروح امتي؟ هحكيلك اللي قريته، أنا اضطريت أفتحه عشان انت مكنتش موجود.»

قولته بغبائي: «عارف.. عارف الموضوع بتاع العيال الصغيرة.»

حاتم: «إيه؟!... وانت عرفت مينين؟!»

- أنا تنحت وحسيت إني عكيت الدنيا!

نادر: «أصل أصل.. الجواب ده جالي قبل كده بتاع ثلاث نسخ منه

قبل كده، وحفظت شكله.»

(حاتم) فوت دي كمان، بس كان واضح عليه أنه مش مطمئن لي

خالص، وانا حاولت أقول أي كلام عشان أخليه يتلخبط وأنسيه أي

شكوك فيا، وخذت الجواب وروحت المكتب وطلبت من عم (مدبولي)

كوباية الشاي بتاعتي المعتادة، قالي: «اصبر بس يا أستاذ (نادر) بعتنا

نجيب سكر وزمانه على وصول، مش هتكتب عني بقا؟»

نادر: «عم (مدبولي) أنا مش فايق لك خالص، من فضلك اعمل

شغلك وانت ساكت.»

خرج (مدبولي) يجز أذيال الخيبة بعد ما أحبطته.

فتحت الجواب:

السلام عليكم أستاذ نادر فودة..

شهرتكم وقصصكم هي ما دفعيني أن أرسل إليكم هذا الخطاب

اليائس..

المشكلة ليست مشكلتي الحقيقية، ولكنها مشكلة بيت الجيران..

كانوا في بداية الأمر رافضين تمامًا تصرفي هذا لكن بمحاولات كثيرة وسرد مستمر لأعمالك المميزة اقتنعوا أخيرًا بأنه من الممكن أن يكون لديك الحل..

أرجو أن أكون قد وفقت في اختياري لك في هذه المهمة وتحميلك تلك المسؤولية.

حقيقي الوضع هنا مفرج وخصوصًا إذا تعلق الأمر بأطفال صغار لا حول لهم ولا قوة....

أصحاب المشكلة اشترطوا ألا أخبرك بأكثر من هذا...

وحينما تذهب للقائهم سيخبرونك بكافة التفاصيل...

عنوان المنزل:

في انتظار حضرتك..

أدعو الله ألا تتأخر عن تلك الأسرة الحزينة..

تحياتي..

فاعلة خير

السلاطه عليم / استاذ نادر صوده

شهرتكم وقصصكم هي ما دفعتني ان ارسل اليكم هذا الطاب الياس ...
 العسله ليست عسلتي الحقيقه ولانني حسنه بيت الصيران
 كانا في بدايه الامر راغبتين فلما تصرف ده لكلي بداوات لثوره وسره
 لادعالك العميره اتمتعوا اخيرا باثه من العسل ان يكون ذلك الدل
 ارجو ان الون قد وفقت في اختارك لوجه العظه وحميك تلك المسئوليه
 لذن الوضع حقا حفيص وخصوصا اذا تطلق بأهمال برسه لاحول لحم ولا قوه
 أمجاب المسطه أسرطوا أو أخرك بالقر عن هذا.
 وحينما تذهب لفقاركم سيخبروك ملافه النفاهيل
 عنوان المنزل :

الشرقيه الزقازقي شارع ~~المنصور~~

في انتظار حضرتك

فانلة خير

ادعو الله ان يتأخر عفا تلك الأسره الحزينه

نجات



العنوان كان في الشرقية، تحديدًا في الزقازيق... والبلد دي بحبها جدًا
وبحب أهلها لأنهم رقم واحد في قراءة أعداد جريدة (عمق الحدث)
ودائمي التعليق على باب (ما وراء الطبيعة) بتاعي.

كنت ناوي أنزل البلد عندي أشوف إيه حكاية (مروة) وأصالح
خالتي (صفية) مع إني عارف إنه مش هيحصل حاجة، (مروة) سواء
اتجوزت (كساب) أو لأ، علاقتي بها باظت للأبد... ونزولي البلد
وتقليبي في الموضوع هيجلي سي زفت ده يشتغل لي في الأزرق تاني أو
عاشر، أنا ما صدقت أنه نسيني الكام يوم اللي فاتوا دول...

على الله ينساني علطول ولا ربنا ياخده ويحصل أبوه ونخلص... أبوه
اللي معرفش ميت ازاي وعامل زي عفريت العلبه بيطلع لي وقت ما
يجب في كوايسي!

- كان القرار إني هأجل زيارة البلد لما أرجع من الشرقية لأن الموضوع
بتاع الشرقية شكله مش هيتحمل أي تأخير، وخاصة إن فيه أطفال، أنا
هقوم أبلغ (حاتم) وأسافر فورًا وربنا يقويني..

«الشاي يا أستاذ نادر.» قطع جبل تفكيري صوت عم (مدبولي)
ففوقت وقولته: «شكرًا»

بصيت لقيت (هالة) هي اللي واقفة ومعها صينية الشاي.. وعليها
آخر حاجة أتوقع أني أشوفها...

رأس (أمنية) أختي مقطوعة ومخطوطة على الصينية...

صرخة مدوية انطلقت مني باسم أختي (أمنية) وقومت طيرت
الصينية من إيدين (هالة) وهجمت عليها لدرجة إنها ملحقتش
تستوعب رد فعلي، ووقعت فوقها على الأرض وفضلت أضرب فيها
بالبوكس مع إني مش بتاع ضرب ولا غيره...

لكن منظر راس أختي المسكينة، وهي فاتحه عينها على الآخر
ولسانها خارج برا بوقها زي الدبيحة، ووشها الأزرق ممكن يخليني
أقتل أي حد حالاً بدون تفكير...

قاومتنى لكن مقاومتها كانت ضعيفة ومنهكة على غير المتوقع،
استغليت ده وخنقتها وسمعت صوت حشرة الموت... حشرة
غليظة مش صوت (هالة) ولا صوت أي أنثى، لقتني بتشد من فوقها
من شخص ما من ضهري، مش محتاج أبص عليه لأنني عارف هو مين
كويس !!!
.. المخلوق.

جذبه ليا خلاني أتشبث فيها أكثر وأخنقها أكثر... بس خبطه على
دماغي أسدلت ستارة سودا قدام عينا بسرعة، ووقعتني على الأرض
جنب (هالة)...

وقعت عشان اتنقل لمكان تاني...

كرفان (هالة) في الصحرا، أنا واقف وهي قاعدة على مكتبها عمالة
تضحك زي المجنونة..

صرخت وحاولت أهاجم عليها، لقتني متكثف في الأرض، بصيت
تحت رجليا لقيت أفعى ضخمة لافة حوالين رجليا الاتنين وراسها

شبيهه برأس طفل صغير.. حاولت أرفع رجلي من قبضتها عصرت رجليا، ومع كل محاوله تعصر رجليا أكثر ووش الطفل البشع يصرخ بشكل مخيف..

فاستسلمت وبطلت مقاومة أو محاولة للحركة.

هالة: «مش قولتلك العين بالعين.. أقرب الناس يا نادر.»

نادر: «يا مجرمة أختي لأ.»

هالة: «أختك وأمك وشيخك، كل دول قدام أبويا.»

نادر: «ماقتلتش أبوكي.»

هالة: «لأ قتلته وأنا كنت بحميك من الي عاوزين ينتقموا منك.. أعداءك القدام، بس اكتشفت إنك متخصص في قتل الآباء يا نادر، ومش خسارة الي اتعمل فيك منهم والي أنا عملته وِالي لسه هعمله.»

نادر: «منك لله... منك لله.»

هالة: «وأبويا يا مجرم... أبويا إلي سلمته لهم.»

نادر: «محصلش، أنا كنت عاوزك تفرحي لما تشوفيه.»

هاله: «أفرح! وانت مالك أفرح ولا مفرحش.»

نادر: «الله يسامحك... أنا عملت كل ده عشان حبيتك.»

هالة (ساخرة): «حبتني؟! وده من إيه ومن إمتي?!»

نادر: «آه وأنا آسف إني حبيتك.. وعملت كل ده لأني اتعلقت بيكي، وما اكتشفتش ده غير بعد ما فقدتك... وانتي بتدفعيني تمن ده غل وكره



وانتقام... انتقام على حاجة عملتها علشانك قبل ما يكون عشان (عادل)
الله يرحمه.»

هالة: «اسكت.»

نادر: «لأ مش هسكت... أختي ذنبها إيه في كل ده؟
خلاص يا هالة انتي قضيتي على حياتي.»

هالة: «قولتلك اسكت.»

(هالة) فتحت باب الكرفان وخرجت غاضبة، والتعبان فك من على
رجليا وزحف بسرعة رهيبه وراها، خرجت وراها جري ملقتهاش،
كملت جري يمكن الأقي الحفرة موجودة، لقيتها فعلاً بس كانت
بتقفل، وطيت أحفر فيها لكن بدون أي فايده!

سمعت صوت بينادي عليا من بعيد: «نادر... نادر... يا نادر.»

صوت من الموقع لكن صوت عارفه كويس.. مش صوت عادل..
ده صوت مين؟

صوت مين؟ إيه ده... ده صوت حاتم!!

بصيت ورايا لقيته في وشي... المكان كله اتبدل و(حاتم) قدامي،
لقتني رجعت المكتب ولقيتني نايم على الأرض و(حاتم) وباقي زمالي
بيفوقوا فيا وتقريباً صاين فوقي يبجي عشر أزايمه عشان أفوق،
قومت قعدت وأنا عمال أتلفت حواليا بدور عليها... شوفت الصينية
بتاعة الشاي مقلوبة على الأرض وراس أختي على الأرض وحواليها
بركة دم، صرخت وخبيت وشي بين إيديا وانهرت باكياً..

و(حاتم) عمال يهز فيا ويقول: «في إيه يا نادر؟ في إيه؟ مالك خايف من إيه؟»

السؤال ده في حد ذاته له مدلول من اتنين: «يا إما أنا الوحيد إالي شايف رأس أختي، أو أصلاً مفيش راس من أساسه... بصيت بحذر لقيت فعلاً مفيش أي حاجة.. الراس اختفت والدم كمان!

مجرد كوباية شاي مقلوبة في الأرض وكوباية ميه متكسره! دخل (أشرف) زميلي في الجورنال وقال لـ (حاتم): «خلاص يا فندم، اتعمل له جلسة تنفس وهو كويس جدًّا، وابنه جه خده.»
نادر: «هو مين ده يا حاتم؟»

حاتم: «عم مدبولي الغلبان الي كنت خلاص بتفطسه يا نادر.»
نادر: «أنا؟»

حاتم: «احمد ربنا إننا لحقناك، ده انت كنت متبت فيه زي ما يكون قتل لك قتيل، بقا الراجل المسكين جايب لك كوباية شاي تهجم عليه وتفضل تخنق فيه! ولو كان مات بقا يا فالح؟! ربنا يستر! هنشوف هيعملوا فينا إيه.»

أشرف: «متقلقش، عم مدبولي قال لابنه إنه جاله ضيق تنفس بدون سبب.»

حاتم: «والله كتر ألف خيره، طمرت فيه العشرة.»

أشرف: «وقالي عاوزك يا نادر تروح له.»

نادر: «ليه؟!»

أشرف: «معرفش!!»

حاتم: «هو إيه اللي ليه!! يعني كنت هتموته ومش عاوز تروح له
تعذر له كمان.»

نادر: «مش قصدي بس هو أكيد مش عاوزني كزيارة مريض، ده
اللي أقصده.»

أشرف: «نادر صح يا أستاذ حاتم، عم مدبولي في عز تعبته طلب
الطلب ده، وهو مش وقته ولا مجاله، وفضل يكرر الطلب أكثر من مرة.»

حاتم: «خلاص تعالى بليل نروح له.»

نادر: «هروح له.... ولو حدي!!»

كده هأجل سفرية الشرقية شويه لحد ما أروح لعم (مدبولي) بيته،
أكيد في حاجة...

شاف حاجة... سمع حاجة.. ما هو مش معقول جايبني عشان
يعاتبني.

سألت (أشرف) على عنوان عم (مدبولي) وعرفت إنه ساكن في
الإمام الشافعي بالسيدة عيشه..

تحديدًا جنب منطقة المقابر هناك... يالا كملت، ما هو أنا مينفحش
أروح جاردن سيتي ولا الزمالك، لازم أقابل الناس في أحواش وترب
وخرابات، ما أنا أصلي اتكتب عليا الغلب..

وأرجع وأقول أنا برده اللي اخترت السكه دي...

جايلك يا عم (مدبولي)... جايلك في مقابر الإمام الشافعي.




الفصل التاسع

«مولانا أبو جاكيتته»

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا



للمزيد من الروايات والكتب الحصرية
انضموا لجروب ساهر الكتب

النهار مش صاحبي ولا حليفي ومهما حاولت أنجز أموري
ومهامي نهارًا لازم يدخل عليا الليل...

تحس أن الليل غول ووحش بيطاردني، كل ما أهرب منه لازم
الاقيه طالع لي!

المهم على ما خلصت الي ورايا، واتحركت لبيت عم (مدبولي)
كانت الساعة تسعة ونص بالليل.

خليني أو صفلكم المنطقة... منطقة شعبية جميلة مصرية جدًّا، برغم
ضييق الحال، إلا أنك هتستغرب جدًّا من التناقض في البيوت وشكل
المباني.. بيت صغير متواضع جانبه عمارة كبيرة.. شوارع متلاصقة
ضيقة.

أعتقد إنني لو كنت جاي بالنهار كنت ممكن جدًّا أغير المجال وأكتب
مقاله عن جمال مصر في مناطقها البسيطة ودفئها..

عشان بس تكون الصورة أوضح، أنا مش في منطقة المقابر بالمعنى
الحرفي، هي المقابر شاغله جزء كبير وكل حاجة لكن أنا في منطقة سكنية
عادية... شوارعها بتستعد لاستقبال رمضان بالزينة الجميلة البسيطة
المتعلقة في الخيوط من بيت لبيت، والفوانيس بكل أشكالها وأحجامها
وشوادر لسه بتتجهز وقماش خيامية مغطي أجزاء كبيرة من المحلات..
وصوت قرآن شغال بصوت الشيخ محمد صديق المنشاوي، بيتسرب
لوداني ممزوج باللي أنا بتفرج عليه من استعدادات استقبال الشهر الكريم
مديني شعور بالراحه والطمأنينة.. تلقائيًا كل ده يدفعك إنك تقول:
«اللهم بلغنا رمضان»...



نسيت أنا جاي ليه.

وطلعت المفكرة بتاعتي الي بحب أكتب فيها ملاحظات جنب
العد التنازلي لقدم شهر رمضان.. لقيت خلاص ١٣ يوم ويهل
هلاله... فكتبت:

«محتاج رمضان عشان أفوق من الغيوبة الي دخلتها بمزاجي.

محتاج رمضان عشان أعذر لربنا عن بلاوي السنة كلها.

محتاج رمضان عشان أنا عارف إني مقصر طول السنة.

محتاج رمضان عشان حالة الضيق والاكئاب الي أنا فيها دي
تروح.»

أي نعم هو أول رمضان بدون أبويا لكن أنا محتاجه بييجي عشان بتحول
أنا وأنتم فيه لدر اويش ماشيين هايمين في ملكوت الله نسبح ونستغفر.

محتاجه عشان أحب شوارع مصر وناسها أكثر وأنسى الرعب والهـم
ده كله.

الله يكرمك يا عم (مدبولي) انت إلي خلتني أحس الشعور الحلو ده،
الراجل ده أصلاً غلبان وبتاع ربنا أوي، وكفايه إنه مبلغش عني، مشيت
على الوصف المكتوب في الورقة وسألت، ووصلت بعد ما كنت هتوه
لأن في ناس قالولي عنوان تاني مش ف الشارع الي انا فيه دلوقتي.

بيت بسيط من بره.. دورين، دخلته وخبطت على الشقة، فتح لي
شاب في أوائل العشرينات، عرفته بنفسي.. ابتسم ابتسامة مقتضبة
ودخلني.

قعدت على كنبه قديمة مستني لوحدي لحد ما طلع ساند أبوه عم (مدبولي) قومت بسرعة وخذت إيده وقعدته، كان موقفي بجد سييء ومحرج جدًّا.

عم (مدبولي): «إيه يا نادر زعلان ليه كده، خلاص يا ابني حصل خير.»

نادر: «أنا زعلان ومكسوف ومتضايق من نفسي جدًّا.»

عم (مدبولي): «أنا صاحب العلقه ومش زعلان وبضحك معاك أهوه يا بني.»

نادر: «أنا بجد آسف، بس والله مكتتش انت المقصود.»

عم (مدبولي): «عارف.»

نادر: «عارف؟»

عم (مدبولي): «عشان كده بعثلك.»

نادر: «ليه؟»

عم (مدبولي): «هحكيلك كل اللي حصل من طقطق لحد ما خنقتني وكنت هتموتني..»

أنا جيتلك وجايب لك كوباية الشاي اللي انت طلبتها مني، لقيتك قاعد مسهم كده ومش في الدنيا، ناديت عليك كذا مرة مردتش، فغلطت غلطة عمري وخبطت على كتفك عشان أفوقك وياريتني يا بني ما عملت كده.»

نادر: «إيه اللي حصل؟!»

عم (مدبولي): «قومت مبرق لي بشكل صعب أوي ووشك اتغير بقت شايف وش واحد تاني غيرك...»

الحقيقة أنا لسانى اتعقد وخوفت منك لقيتك قومت مطير الصينية من إيدي، وفضلت تصرخ ووقعتي على الأرض، وانت وقعت فوقى ونزلت ضرب فيا، حاولت أبعدك عنى لكن أنا راجل عجوز زي ما انت شايف..

خنقنتنى وكنت خلاص بفرفر فى إيدك... لحد ما الأستاذ (حاتم) والناس فى المكتب لحقونى وشالوك من فوقى بالعافية... انت كنت بتخنق وعمال تقولى؛ الا أختى يا بنت ال كذا وتشتم!..

أنا وقتها اتأكدت إنك ممسوس أو لابسك حاجة عشان كده مجييتش سيرتك ولا هجيبها...

أنا بحبك والله يا (نادر) يا بني وعارف إنك بتتعب فى شغلك... على فكرة أنا بقرا كل اللي انت بتكتبه، ولولاك كان الجورنال ده قفل، أنت اللي لحقته وأنقذته وده مش كلامي لوحدي، ده كلام الكل وانا عندي أمل تكتب عن عمك (مدبولي) بردو.. ولو انت اتحبست بقا الجورنال هياخر المرتبات زي الأول وبعدها هيقعدونا فى بيوتنا!!

نادر: «عاجباني صراحتك يا عم مدبولي الحقيقة.»

عم (مدبولي): «بس ده ميمنعش إني بحبك والله العظيم.»

نادر: «وأنا كمان والله... ده كفاية إني وأنا داخل الشوارع هنا، فضلت ادعى اللهم بلغنا رمضان..»

انت السبب على فكرة.»

- عم مدبولي وشه قلب واتضايق جداً بدون أي مقدمات.

نادر: «في إيه يا عم مدبولي، هو أنا قلت حاجة غلط!»

عم (مدبولي): «أنا مبحبش الكلام عن رمضان.»

نادر: «إيه! ده رمضان كل الناس بتحبه من كل ديانات ربنا يا

حجج.»

عم (مدبولي): «مبجوش وخلص ومانع هنا العيال في الشارع

تعلق على البيت أي زينة.»

نادر: «إيه الكلام الغريب ده؟! لأ بقا أنا لازم أعرف ليه؟»

عم (مدبولي) اتردد شويه وبعدها اتكلم: «لأن أنا عندي فشل

كلوي ومبصومش ولما بيجي رمضان بحس أن كل الناس عندها

فرصة للقرب من ربنا إلا أنا!»

نادر: «إيه الكلام ده.. انت معاك رخصة يا عم مدبولي... بالعكس

انت ممكن تعمل مليون حاجة في رمضان تقرب بها أكثر لربنا، طالما

حاجة مش بإيدك، بصراحة كلامك زعلني وحضرتك راجل مؤمن... وهو

بلاش تبص لها من الزاوية دي... ربنا هو اللي جاب المرض.. وهو

اللي اداك رخصة الفطار وربنا يجب أن تؤتى رخصة يا راجل يا طيب.»

عم (مدبولي): «والله كلامك أحسن من كلام شيوخ الجامع.»

نادر: «ولا شيوخ ولا حاجة.. أنا كلي ذنوب وانت أحسن مني

مليون مرة.»



عم (مدبولي): «طب ما أنا عارف!»
رده كان غريب.. فانفجرت في الضحك.

كان ابنه - اللي عرفت إنه اسمه عزيز - واقف يتابع الحوار ومش عاوز يقعد وعمال يرمقني بنظرات بايخه جداً مش فاهمها..

شكله متضايق مني وعاوزني أقوم أغور؟

ولا متضايق من عم (مدبولي) أنه مابلغش عني ولا إيه بالضبط؟!

حاولت أشركه معنا في الحوار أكثر من مرة فكل شويه أقوله؛ ولا إيه يا عزيز؟

ما يردش ويكتفي بالنظر لأبوه!

غالبًا عم (مدبولي) حس بالخرج وقالي:

«على فكره (عزيز) ابني في كلية إعلام قسم صحافة ومتخذك قدوة، ودايمًا يقولي إنه نفسه يبقى كاتب زيك، وهو اللي بيطلب مني أجيب له الأعداد من الجورنال من المرتجعات من المخزن.»

نادر: «والله يشرفني يا عم (مدبولي) وإن شاء الله يا (عزيز) تكون أحسن مني مليون مرة كمان.»

بردو (عزيز) ابتسم وماعلقش... حسيت إني غير مرغوب في وجودي حتي قولتها له:

«شكلك يا (عزيز) مش حابب وجودي هنا، طب أنا مضطر أقوم وآسف للإزعاج.»

عم (مدبولي): «تقوم إيه.. جرى إيه يا عزيز؟ إيه قلة الذوق بتاعتك دي!»

عزيز: «هو مش حضرتك قولتله اللي انت عاوزه وخلاص؟ سيبه يمشي.»

عم (مدبولي): «لأ مخلصتش وبطل أسلوبك ده، هو أنا عشان عجزت هتعمل فيا كده!»

- حسيت أن الجوا اتكهرب فقومت وقفت: «أنا هستأذن.»

عم (مدبولي): «كده يا نادر!»

نادر: «أنا مش عاوز أسبب مشكلة.»

عم (مدبولي): «ده بقا العادي من (عزيز) وبعدين استنى عشان عاوز آخذك معايا مشوار.»

نادر: «تحت أمرك.»

عم (مدبولي): «هروح بيتي الثاني.»

نادر) ضاحكًا: «تمام انت متجوز ولا إيه؟»

عم (مدبولي): «لأ أنا مش متجوز ثاني ولا حاجة، أنا عندي بيت ثاني لما بطهق من (عزيز) وقلة أدبه زي ما انت شايف، بسبب له الدنيا وبروح أقعد هناك وسط أهلي الغلابة اللي بيتحملوني.»

عزيز: «خلاص يا بابا مالوش لازمة.»

عم (مدبولي): «حسابك معايا هعيده ثاني زي المرة اللي فاتت يا (عزيز) خد بإيدي يا (نادر) ووصلني، البيت بعد شارعين من هنا.»

نادر: «عشان كده في ناس وصفوا لي عنوان ثاني ليك.»

لقيت (عزيز) جه وقف قدامي بشكل مستفز وبص لأبوه، بعدها
مشي ودخل جوا.

عم (مدبولي): «ياللا بينا يا بني ده العادي بتاعه بس متقلقش هو
مرعوب مني ومايقدرش يعمل حاجة،

هو آخره الكلمتين اللي قاهم دول.»

- خدت بإيد عم (مدبولي) وخرجنا، وطلب مني نمشي من شوارع
جانبية غير اللي أنا جاي منها عشان مش عاوز حد يشوفه وهو متسند
عليا، حسيت إنه كمان مش عاوز يشوف فوانيس وزينة رمضان للسبب
اللي حكاهولي من شويه، بس الشوارع الجانبية طلعتنا على المقابر...

عم (مدبولي): «معلش أنا عارف إني تعبتك، وأنا عارف المقابر بالليل
بتخوف بس أهلها في حالهم.. أحسن من اللي عايشين.»

نادر: «لأ خالص، المقابر دي صديقتي، لا تقلق.»

كملنا مشي لحد ما شوفت في وسط المقابر حرفيًا «بيته الثاني ده»،
وكان وراه حته أرض وراها ناس واقفة، سألته: «إيه دول؟»

عم (مدبولي): «هناترب يا (نادر) يعني الدفن ليل ونهار ملوش
مواعيد، هتلاقيهم مستنين جثة حد جاي في حادثة مثلاً عشان يتدفن
دلوقتي.»

- فتح الباب بمفتاح كان معاه ودخلنا وقعدنا وريح على الكنبه...

قولته: «أستاذن أنا؟»

ملحقتش أكمل الطلب، لقيت باب ثاني في الأوضة بيخبط، ودخل راجل في الأربعينات باس راس وإيد عم (مدبولي) وعرفه عليا، وقاله: «الأستاذ نادر أكبر صحفي في مصر، وأنا بشتغل معاه، عاوزك تعمل له أحلى كوباية سحلب عندك.»

الراجل ابتسم وقاللي: «منورنا يا أستاذ نادر، أي حد جاي مع مولانا.. يبقى هو كمان مولانا.»

نادر: «مولاكم!!!»

الراجل: «نبدأ يا مولانا؟»

عم (مدبولي): «أيوه يا ريت.»

خرج الراجل وأنا ساكت مبعلقش، عم (مدبولي) قام فتح دولاب طلع منه جاكيت قديم عليه رسوم غريبة، لبسه، وانا ساكت بردو وبص لي وقاللي: «فكرني اقولك على بركة الشاكته دي.»

نادر: «الشاكته؟ طيب.»

دقايق والباب خبط، ودخلت ست ومعاها بنتها.. وبدأت تحكي عن معاناة بنتها في المذاكرة..

عم (مدبولي): «متقلقش ده جن عاشق عاوزها تسقط عشان تبقى فاشله زيه، قومي يا بنتي.»

وقام وقف وجاب من درج في الأوضة كوبايه وقالها اشربي وشربت البنت وقالها: «بعد أسبوع أشوفك وهتبقي زي الفل وأنا هبعثلك بالليل جن من الخدام بتوعي يحرسك عشان لو قرب منك

يقف له، المهم تدفعي الهبة وانتي خارجة..» وقامت الست وباست إيد
(مدبولي) وأنا أصابني الخرس !!!

يا نهارك الي مش فايت يا عم (مدبولي)..
عم إيه بقا.. يا شيخ منصر مدبولي...

الست طلعت من الأوضة.

مدبولي: «إيه رأيك؟»

(نادر) ضاحكاً: «رأيي ف إيه؟ ده انت طلعت معلم كبير.»

مدبولي: «بلا فخر.»

نادر: «انت نصاب كبير يا مدبولي.»

مدبولي: «مدبولي حاف كده؟ لأ أنا معالج.»

نادر: «معالج مين؟! احنا هنستعبط.»

مدبولي: «أنا شيخ وليا تعامل مع الجن.»

نادر: «نصاب بردو يا شيخ إلا ربع.»

مدبولي: «احنا هنقضيهما تريقة ولا إيه؟ ده أنا كنت هاخذك تحضر

غسل العقيمة!»

نادر: «غسل مين؟!»

مدبولي: «ولا حاجة.. الشاكنه بقا يا سيدي مكتوب عليها نقوش

من العهود السليمانية بتحميني وبتقويني وتحليني أقوى من الجن لو

فكروا يغدروا بيا أو يقصروا في خدمتي، والنهارده بقا بالذات انت

موجود، لازم بيبضوا وشي قدامك!»



نادر: «والله وطلعت داهية كبيرة يا مدبولي.»
مدبولي: «أومال انت فاكر إنك الوحيد اللي شاطر، انت وسي
(كساب) بتاعك؟»

أنا من زمان والبيت ده، باجي أعالج فيه الغلابة.. وربنا بيقدرني
أساعدهم.»

نادر: «وإيه لازمة الوظيفة في الجورنال، ده انت برنس؟»
مدبولي: «كلها أبواب رزق، وكفاية إننا قابلناك.»
نادر: «هو أنا مش فاهم بردو انت جايبني هنا ليه؟!»

عم (مدبولي): «خليني أحكيك من قبل كده بشويه...» (الباب
خبط ودخلت واحدة ومعها أمها)

الأم: «جاهزين يا مولانا، نفذنا كل أوامر المرة اللي فاتت بتاعة
الأسياذ.»

مدبولي: «بتتك مستحمية بتراب الجن اللي ادتهولك؟»
الأم: «أيوه ومن وقتها جسمها ملتهب.»

مدبولي: «دفعتي الهبة؟»

الأم: «أيوه.»

مدبولي: «كلها؟»

الأم: «آه والله، الميه وخمسين جنيه كلهم يا مولانا.»
مدبولي: «اطلعي واستني مع بتتك عند مدخل الترب وعشر دقائق
وهكون عندك... اطلعي من الباب ده، بلاش اللي دخلتي منه.»
خرجت الست وبتتها.



ورجع (مدبولي) يكمل كلامه:

«لما انت هجمت عليا، اتأكدت إن عليك جن، ووالله من قبلها
كمان.. من وقت ما جيت بالليل الجورنال من غير سبب وعشان كده
مريضتش أقول لـ (حاتم) وكتلت الكباب وسكت!»
نادر: «ازاي؟»

مدبولي: «عينيك كانت علطول مغربة وعمال تبص ورايا وده معناه
إن في حد راصدك... وانا معايا أكثر من جن وظيفتهم يعرفوني الي
قدامي نضيف ولا ممسوس...

بعدها لما انت طلبت مني في اليوم إياه الشاي، قرئت على الميه بتاعة
الشاي وخطيت عليها زعفران وفك الأسحار... انت مجرد ما الكوباية
كانت قدامك حصل الي حصل وحاولت تموتني.. طبعًا مش انت...
الي عليك هي الي حاولت، وانا اتأكدت إنها واحدة.»
نادر: «اتأكدت إزاي؟»

مدبولي: «لأنها هنا معنا.»

نادر: «فين؟!»

مدبولي: «مش ظاهرة لكنها موجودة والغريبة إنها مش عاوزه
تأذيك زي ما أنا كنت متخيل..»

دي إيه حكايتها بقا؟ انت أكيد عارف!»

نادر: «معرفش حاجة.. انت جايبني هنا ليه؟»

مدبولي: «لأكثر من سبب:

أولاً: تشوف بعينك الي بيحصل وتكتب عني.»



نادر: «أفندم؟ أكتب عنك؟! انت بتهزر.»

مدبولي: «أيوه تكتب عني... أنا مش أقل من (كساب) و(الوقاد) ولازم اسمي يتعرف والناس تيجي بالآلاف وانت مكسبك محفوظ.»

نادر: «وثانيًا?!»

مدبولي: «خليها بعد ما نرجع من غسل العقيمة.»

نادر: «إيه ده كمان؟»

مدبولي: «تعالى هتشوف بعينك.»

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا




الفصل العاشر

غسل العقيمة

للمزيد من الروايات والكتب الحصرية
انضموا لجروب ساجر الكتب

sa7eralkutub.com

او زيارة موقعنا



للمزيد من الروايات والكتب الحصرية
انضموا لجروب ساحر الكتب

sa.7eralkutub.com

او زيارة موقعنا

- قام (مدبولي) ولا كأنه كان تعبان أصلاً، وخرج من الأوضة وأنا وراه ومشينا لحد ما وصلنا عند مدخل الترب، لاقيت الست وبنتها والراجل اللي استقبلني أول ما جيت كان واقف ومعه فانوس قديم، واتحركنا كلنا ورا (مدبولي) في الظلام الدامس ده...

مشينا في شوارع الترب المظلمة، شارع ورا شارع لحد ما وصلنا لتربة معينة، وطى (مدبولي) وفتح التربة، والراجل إلي معاه نزل فيها وفضل شويه تحت الست واقفة، وبنتها عماله تتحايل عليها يرجعوا، خرج الراجل ومعه كفن صغير وجواه جثة صغيرة... واضح جداً إنها جثة حديثة لطفل... بص للبنت اللي مع أمها..

مدبولي: «نامي في الأرض..»

البنت بمنتهى الرعب: «ليه؟»

مدبولي: «اسمعي الكلام ومش عاوز رغبي كثير.»

أمها: «اسمعي كلام مولانا ونامي.»

البنت نامت في استسلام...

الراجل الثاني حط الكفن جنبها... ولزقه فيها تماماً

(مدبولي) بدأ فعلياً يمارس طقوس تحضير:

«نقسم عليكم بحق الكاف والنون

نقسم عليكم بحق كن فيكون



نقسم عليكم بمساعدة أعواني إدريس ومأمون

أن تعالجوا ما بها من سقم وتهبوا مثل هذا الولد ذاهبون وعائدون.

نقسم عليكم بحق الكاف والنون

نقسم عليكم بحق كن فيكون

نقسم عليكم بمساعدة أعواني إدريس ومأمون

أن تعالجوا ما بها من سقم وتهبوا مثل هذا الولد ذاهبون وعائدون.

البت (الزوجة الصغيرة) فضلت ترعرش من الخوف وأنا واقف

أراقب المشهد مستني أشوف إيه هيحصل؟

في الوقت ده كان الرجل اختفى ورجع معاه جردل مليون ميه، وحطه

في الأرض..

مدبولي: «كده مية الجن وصلت، إيدك معنا ياللا يا نادر.»

نادر: «أعمل إيه؟»

مدبولي: «شيل مع (فرج) الجثة وارفعوها في الهواء، عاوزها تبقى

بالظبط فوق الي بعالجها..

بس المهم تبقى في الهواء والجثة متلمسش الست خالص يا نادر.»

نادر: «مش فاهم.»



مدبولي: «هتشيلوا الجثة قدام بعض وترفعوها وتبقى فوقها من غير ما تلمسها، صعبة دي!!»

- عملنا كده فعلاً... الجثة كانت طرية..

لاقيت (مدبولي) بيقولي: «أهو جبت لك قصة مكتتش تحلم بها وتسميها (غسل العاقر أو العقيمة).»

- (مدبولي) موجهًا الكلام للأم: «شيلي الجردل وصبي الميه على الجثة لما أقولك.»

الأم: «حاضر يا مولانا.»

(مدبولي) فك الكفن بالراحة عن الجثة، وبعدين قالها: «دلوقتي.»

صبت الأم الميه بالراحة وعملت زي ما كان بيوجهها بالضبط، بدأت من القدمين وبتتحرك ناحية رأس الجثة، أما (مدبولي) فكان تحت مكتف المسكينة اللي جالها حاجة أشبه بنوبات الصرع، والميه كانت بتتنزل عليها زي ما تكون بتحرقها وهي عمالة ترتجف في عنف.

فضلت الأم تصب الميه على الجثة والميه تقع منها على الابنة اللي فضلت في حالة الصرع والرعشة حتى بعد ما الأم خلصت الميه اللي في الجردل كلها..

نقسم عليكم بحق الكاف والنون

نقسم عليكم بحق كن فيكون



نقسم عليكم بمساعدة أعواني إدريس ومأمون

أن تعالجوا ما بها من سقم وتهبوها مثل هذا الولد ذاهبون وعائدون

الأم طلعت كوفرتة كانت جايهاها ولفت بنتها بيها... وسندتها

مدبولي: «حد مستنيكوا؟»

الأم: «آه التوك توك، على أول الشارع.»

مدبولي: «طيب يالا روحي حالاً، وجوزها ميقر بش منها خالص

زي ما اتفقنا، وبعد أسبوعين يحصل وبعدها تيجي وهبلغك البشارة،

وهتحمل بأمر الله.»

سندت الست بنتها بس كانت مش قادره تعمل ده لوحدها،

فمقدرتش أقف اتفرج، سندتها معاها ومشينا كلنا و(مدبولي) قالي:

«هستناك في البيت.»

مشيت مع الست وبنتها و(فرج) سابنا ومشي.. البنت وهي ماشيه

عماله تحرف بالكلام ده:

خلاص مش عاوزه أخلف.

ابعد عني.

يارب ساعمني.

النار لأ.



الميتين مش هيسبونى.

ابعد عنى.

الميتين هيصحوا كلهم.

حسبى الله ونعم الوكيل.

ركبتها مع أمها التوك توك... ومشىوا وأنا رجعت وأنا بفكر في الكارثة اللي اسمها (مدبولي) اللي كان لا على البال ولا على خاطر وغلب الكل... ويستغل جهل البعض من البسطاء في التأثير عليهم والسيطرة على عقولهم، فعلاً اللي تحسبه موسى يطلع فرعون..




الفصل الحادي عشر

هالة والدرويش

للمزيد من الروايات والكتب الحصرية
انضموا لجروب سحر الكتب

sa7eralkutub.com

او زيارة موقعنا



للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا



رجعت الأوضة لـ (مدبولي) لقيته قاعد ومبتسم ابتسامة النصر..
وفهمت إنه بيوصل لي إن كل اللي قابلتهم في حياتي ميحوش حاجة
جنبه.

مدبولي: «هتكتب عني إيه بقا؟»

نادر: «معقول انت جاييني عشان النرجسية اللي عندك وعاوز
الناس تعرفك بس؟»

مدبولي: «لأ.. مش أنا قولتلك أن في سبب هقولهولك بعد ما
نرجع.»

نادر: «إيه هو؟»

مدبولي: «القلادة.»

نادر: «أفندم؟!»

مدبولي: «الخدم بلغوني إن معاك صورة لها على تليفونك.»

نادر: «ومبلغوكش أنها اتمسحت؟»

مدبولي: «لأ... موجودة... دور كويس.»

نادر: «بقولك ضاعت.»

مدبولي: «اديني تليفونك.»

نادر: «لأ طبعًا.»

مدبولي: «أنا محتاج مدخل لمحاكم الجن اللي تحت الأرض.»

نادر: «وأنا مالي يا عم انت.»

مدبولي: «انت نزلت وجربت وبعدين انت خايف على إيه؟»

نادر: «أنا همشي.»

مدبولي: «انت فاكرها سايبية ولا سهلة؟ ده انا لو حضرتم عليك

هيفر موك.»

نادر: «ياااه كان غيرك أشطر.»

مدبولي: «كده... طيب.»

وقام وقف وفضل يرفع إيديه ويبرطم بكلام مش مفهوم، وآخر

جملة فضل يكرر فيها:

الحضور لتنفيذ الأمر

الحضور لتنفيذ الأمر

الحضور لتنفيذ الأمر

حسيت إني في دوامة.. من (الوقاد) لـ (كساب) لـ (مدبولي) يا قلبي

لا تخزن..

و(مدبولي) عمال يكلم عفاريتة عشان تحضر وأنا عمال اضحك..

أيوه بضحك لأن الموضوع بقا كوميدي وجتتي نحست، أنا فهمت

بنسبة كبيرة ليه ابن (مدبولي) اللي شايفني قدوة كان عاوزني أمشي،

واضح جدًا أنه فعلاً مش عاوزني أتأذي، وواضح كمان أنه مش راضي

عن اللي أبوه بيعمله.. لكن خوفه من أذية أبوه مانعاه إنه يتدخل أكثر

من اللي حصل...



مضحكتش كثير لأن المشهد اتغير فجأة..

لقت أشخاص صغيرة بتيجي جري من جوانب الأوضة أشبه بالأطفال، شعرهم طويل ومغطي وشوشهم بالكامل، بعضهم ييزحف والبعض الآخر بيمشي مشية غريبة زي ما يكونوا سكرانين، أصواتهم حادة ومع كترها بدأت أحس إن سمعي بيضعف تاني! أعدادهم كانت بالمئات، ووسطهم ظهرت قطط سودا كتيرة جدًا متجهة ناحيتي..

صرخ (مدبولي): «القلادة وإلا هيخلصوا عليك حالًا.»

مردتش عليه لأني بدأت أشعر بحرارة رهيبة بتحيط بيا من كل اتجاه، حسيت إنها بتصهر جسمي كله.. القطط هي أول من وصل لرجليا وحسيت بغرس ضوافرها وسنانها في لحمي وتوالت هجمات الكائنات الأخرى...

هتفضل لإمتي يا (نادر) تتخدع في الناس..

هتفضل لامتى تفترض حسن النوايا في البشر..

هتفضل لامتى ماشي ورا مشاعرك ولاغي عقلك..

كفاية غباء وسذاجة وطيبة وسط ناس كل واحد فيهم عاوز يستغلك بطريقة أو بأخرى!!

يا إما يستفيد منك... يا إما يقضي عليك..

فوقت من دايرة التفكير على صوت (مدبولي) وهو بيصرخ...

أيوه (مدبولي) يبصرخ ويستغيث كما ن بيا!!
ولاقيت الققط عمالة تجري هنا وهناك والأشخاص القصيرة
بتختفي في أركان الأوضة بسرعة..

و(مدبولي) اللي كان عاوز يقتلني ويسلط عليا خدامه بيقولي: «الحقني
يا نادر!!»

(مدبولي) كان في الأرض نايم على بطنه والمخلوق اللي طلغ لي
وطلغ لـ (هالة) وأبوها واقف وحاطط رجله على ظهره و(مدبولي)
يبصرخ وبيقوله: «سييني سييني.. عاوز مني إيه؟»

فين خدامي.....؟

فين أتباعي.....؟

فين خدامي.....؟

انتوا فين.....؟»

واضح إنهم باعوه

واضح إن المخلوق سلطته وقوته أعلى وأكبر!!

باب الأوضة اتفتح ودخلت (هالة) وجات لي...

هالة: «عاوز منك القلادة؟!»

نادر: «بس هي مش معايا ولو كانت معايا مكنتش هديهاله، كفاية

اللي حصل قبل كده.»

هالة: «عارفه.»

نادر: «هالة... أنا ما قصدتش الي حصل لعادل.»

هالة: «وانا ما قربتش من أمنية.. ما قدرتش.. أنا مش كده.»

(هالة) بصت للمخلوق الي في ثانية كان غارس حوافره في ظهر (مدبولي) وقالت لـ (مدبولي): «إوعى تكون فاكر إن كوباية الشاي بتاعتك دي أثرت فيا يا ولا حاجة انت.»

ظهر من الحيطه ظلال سودا كتير كلها بقت تخرج وتلف في الأوضه بسرعة رهيبه، وبمجرد ما تشوف (هالة) والمخلوق تراجع فوراً وتدخل الحيطه تاني، و(مدبولي) مستمر في استدعائهم لحد ما خرج ظل كبير عنهم كلهم، حسيت إن المخلوق نفسه قلق، في اللحظة دي (هالة) صرخت فيه: «اقضي على مدبولي حالاً.» وبعدها بصت لي وقالت لي: «امشي من هنا.»

فتحت الباب وطلعت أجري وسمعت صرخات (مدبولي) وانا برا بجري..

مشيت وانا مشاعري غريبه، أكذب لو قلت مش فرحان.. أنا فعلاً فرحان من بدري إن أختي (أمنية) بخير لكن في سبب تاني وراء سعادتني، (هالة) أنقذتني.. جت مخصوص من عالمها الجديد ومملكتها ومعها الحارس، وكل ده عشان تنقذني وتقضي على (مدبولي).. معقول؟

معقول تكون بتبادلني نفس مشاعري!!

مشيت في الشوارع زي الطفل اللي خد عيدية وبيفكر هيحب بيها
إيه ولا إيه..

هي (هالة) وأنا الدرويش..

محدث ممكن يصدق إن ده شكل واحد كان هيموت من دقائق،
وقبلها بشويه حضر واقعة داخل المقابر يشيب لها الولدان.

الفجر نوره بيشقشق وأنا دلوقتي في (موقف عبود) عشان عندي
مشوار للزقازيق لمغامرتي الجديدة.. بس قبلها بعت لزيميل (أشرف) في
الجورنال رسالة قولتله:

«ازيك يا (أشرف) أنا مش هروح لعم (مدبولي) النهارده، بلغ
(حاتم) أني هروح الشرقية أخلص التحقيق هناك الأول، ولما آجي
هبقى أقعد مع (مدبولي) الدنيا مش هتطير...»

كده أمنت نفسي مرتين وسايب ورايا جتتين؛ المهندس (عادل)
وأكيد (مدبولي) زمانه بقى جثة هو كمان.

اللي عند (مدبولي) ميعرفونيش ولو عارفيني هيخافوا يتكلموا، ما
هم كلهم شلة حرامية في الآخر، أما ابنه (عزيز) أنا واثق تمامًا إنه عمره
ما هيتكلم بل بالعكس المفروض يشكرني أنه هيعيش لأول مرة حياة
سوية بعيدًا عن دجل أبوه وخز عبلاته وعفرارته..

أما أنا، فعندي مجموعة مهام لازم تخلص:

- أسافر البلد اتطمئن على أمي وأختي واقعد معاهم وأصل رحمي
بعد ما كنت قطعتة.

- أقرب أختي مني وأقرب منها لأن أنا مكان والدي دلوقتي.

- أزور أبويا بانتظام.

- أرجع علاقتي بالشيخ (لطفي) لأنني فعلاً محتاجه الفترة الجايه على المستوى الشخصي عشان أشحن إيماني من جديد، وعلى الناحية العملية، عشان معظم الرسايل الي بتجيلي طالبة علاج أكثر منها تحقيق.

- ولن أنسى أبي الثاني عم (مختار) الي دايمًا مقصر معاه!
كل ده هحاول أعمله بعد ما اخلص مشواري الجاي...

- لكن دلوقتي أنا في ميكروباص متجه إلى الشرقية وتحديدًا الزقازيق.

انتظروني من جديد في.... نادر فوده ٤..

ختامًا..

أدعو لكم الله براحة البال، وتحقيق الآمال، والحفظ من غلبة الدين وقهر الرجال


ادعو لكم الله بأن تكونوا تجار سعادة

وأن يغزو الفرح حياتكم بلا هوادة

طبتم وطابت أوقاتكم

ﷺ

نادر فودة



للمزيد من الروايات والكتب الحصرية
انضموا لجروب ساحر الكتب



من لم يشكر الناس لم يشكر رب الناس..

اسمحوالي أشكر خلية نحل واقفين في ضهري عشان أكمل الرواية
عشان تطلع في زمن قياسي:

عائلتي المعلمين

أستاذ محمد عبد المنعم

مصطفى أبو العز

دكتور نهال علام

نوران أيمن

إسلام بكر

مدحت يونس

دينا

وختامًا، معز أحمد يونس «ملهمي الصغير»

للمزيد من الروايات والكتب الحصرية
انضموا لجروب ساحر الكتب

sa7eralkutub.com

او زيارة موقعنا



نادى ...
 أكتب إليك هذا الخطاب .. وأنا أعلم أنك لن تقرأه ..
 لكنني أكتبه لك .. وأنا أعلم أنك لن تقرأه ..
 فقد قرأته لك في الأخرى ، والله كلما كتبت لك القصص من الروايات
 سأكتب لك الكثير ..
 فبما حذرتك من النزول تحت الأضواء .. فإنه كل تقارى من إله لم
 تحصل على مرادك أبداً ...
 ولم أنت أعلم أبداً أنه لن يكون مشكله مع أهل الأضواء مع الجبهه الحاكم ..
 علمت ذلك بعد إقتضائك ما تحت بالدخول إلى غنيتك وحصلت
 على كل أدوات التحضير وأعدت التحريم بالفاعل والفاعل حضر
 المخلوق وأخذت إلى باطنه الأضواء ووجدت كل كل ما حدث ..
 وشاهدت محالته ، وشاهدت عنتك ووجدته أنه ~~مخلوق~~
 خالص ويأخذك على الخلاء فأخبرتك أنه لا حول له ولا قوة
 أمام جبروت وقوه محله الجبهه ...
 ولكنه .. إذا علمت بنزول إلى باطنه الأضواء لتعلم محالته
 ونفدت ما طلبت من سابقاً ... أنكوم أفره متوجهه صلاه مخلوقه
 التي هاجمتك وهاجمتك وفي هذه الظاهر سلكه في الجبهه من طلب
 الشفاعة والعضو عليك ، ويتحتم علينا التعجيل في اتخاذ القرار لذلك
 سموت في فتره خروج أبناء قادمه من مجرم وموافقك ..
 فكله القرار ..
 الليل أنكوم في باطنه الأضواء للذبح ... كنت على أي حال سأفعل
 شئ أم أبى ...
 فلم لا أحمل بذلك كل أنت ذلك ..
 فكله ليصنعه مني وأعتقد ليصنعه من كل هذا وأخبر عما أخبرنا
 به ... أفره يوماً أنكوم موجوده في باطنه الأضواء إذا حدثت وقررت
 يوماً أنه تأخذ وتترك فوه الأضواء وتقرر أهل الأضواء

للمزيد من الروايات والكتب الحصرية
 انضموا لجرؤب ساحر الكتب

نادر فوده 3

(النقش الملعون)

زي النهارده من سنه هدرت أول حدوته ليا، كنت حابب أعرّفكم فيها بيا
لكني أكتشفت إنّي عرّفتم علي الوقاد!

بعدها نزلت الحدوته التانيه عشان تعرفوا حجم معاناتي مع كساب
لكن بردو لقيتني بقحكمكم في العالم بتاعه!

معرض هل هم أستغلوني عشان يخترقوا حياتكم عن طريقّي؟!
ولا أنا اللي حبيت مكنش لوحدّي فدخلكم في الدايرة معايا!

طيب المرء دي هم بعيد عن اللعبه بنسبه كبيره جداً..

عيشوا التجربة دي كهان وهنشوف مين العذّيب في النهايه
هم ولا أبهال النقش الملعون ولا أنا ولا إنتم!!!!

نادر فوده



القدس_عاصمة_فلسطين

الراعي الإعلامي

FM
الراديو
80.90 FM
صوتها من مصر

سما
المجموعة الدولية
للنشر والتوزيع